

Bàu Lem tiaq
Luca
Achìh Biac Chuaq Jêxu Broq wa Hnài
Bàu Patô Adroi

Hiniq wa Bàu Xèm Da Sech:
 Luca.

Mangai Achìh wa Hanam Achìh:

Luca mangai Hilap. Haq khoi achìh Sech cô òiđiq paro ca mangai Hilap, can rih da mangai Yothaiq 'màng leq. Haq hadai achìh bàu patô ca mangai đóc waq ca loq xinoi da Chuaq Jêxu enh miq Haq hlài trùh Adam. (Ngan 3:23-38).

Ừ i hiniq Luca ta sech cô, mahaq bèn loq joq 'nàng cla Luca khoi achìh sech cô. Haq hadai achìh Sech Biac Yiang Hadròih. Luca mangai 'bacsì sì. Bàc yàng haq lam pajùm ca Paulô. Cla haq broq mangai achìh bàc bàu da Paulô. Sech cô khoi achìh ta'ne hanam 59-63 Atìq C.

Bàu Anoi:

Luca achìh loh biac can rih Chuaq Jêxu. Luca patô Chuaq Jêxu loq waq rìm mangai. Ta bàu aliah haq achìh biac mangai pa wa nan xa. Bèn jah ngan hnoq bàu bùi jò Luca achìh biac xa-ông ca Chuaq Jêxu, biac ngèh canòm wa biac dèch claih khoi ca crống taneh tòiđiq lôih cô.

Rìm 'Nat:

1. Bàu Baxèm: 1:1-4
2. Chuaq Jêxu loh ca crống taneh: 1:5—2:52

3. Chuaq Jêxu padon broq dèh biac broq: 3:1—4:13
4. Biac Broq ta gùng Ga-li-lê: 4:14—9:9
5. 'Bàì yàng Chuaq Jêxu wìh hlài enh gùng Ga-li-lê: 9:10-50
6. Biac Broq da Chuaq Jêxu òi ta gùng Judia: 9:51—13:21
7. Biac Broq da Chuaq Jêxu òi dudan Jôđan: 13:22—19:27
8. Chuaq Jêxu broq ngè tadreo xam chac Haq, èh Haq ta'blêq: 19:28—24:53

Thò Achìh Am ca Thê-ô-phi-lu

¹ I bàc ngai khoi achìh dìq ca biac da Chuaq Jêxu Crich, biac ma khoi broq gêh òi ta'ne nhèn, ² tiaq mangai ma enh jò baxèm khoi hnoq wa mangai anoi hnài Bàu Chuaq khoi anoi hlài ca nhèn. ³ 'Màng aih, ôi Thê-ô-phi-lu mangai broq cwan càn, jò au khoi bòch ngan thù wa khoi loq ma ro dìq ca biac aih joq 'nàng, au hèm khòh achìh hlài òi dìq patô ca ìh, ⁴ waq ca ìh jah cajap manoh loq bàu ma wì khoi hnài ìh, aih bàu joq 'nàng.

Bàu Loq Adroi Biac Xa-ông Jon 'Baptit

⁵ 'Nhòng Hêrôt broq bùa Diac Judia, i mòiq ngai broq pajàu Boc Plình òi ta 'bôq A-bi-ja, hiniq haq Xa-cha-ri. Mai haq Ê-li-sa-bet, xinoi Arôn. ⁶ Wa haq mangai caq òi ta-atoq enh ngìa ca Boc Plình, ùh i nòi leq jah trech, dìq ca manoh dì tiaq bàu thê wa bàu hnài da Chuaq. ⁷ Wa haq ùh i ca con, ma jah 'màng aih Ê-li-sa-bet xon. Wa dìq khoi bàc hanam.

⁸ Hì aih, khai trùh lù da 'bôq Xa-cha-ri broq pajàu enh ngĩa ca Boc Plinh. ⁹ Wì pàih panàih troq ca haq mùt Hnem Cùh Waiq, nòi òiòiq bùh jreo i hòi xua thùm. ¹⁰ 'Nang jò haq bùh, òiòiq ca mangai tagop pajùm enh gùng waiq khàn.

¹¹ I 'bình plinh loh mahno ca Xa-cha-ri. Haq yòng pah 'ma ca ca'bông bùh jreo i hòi xua thùm. ¹² Xa-cha-ri hnoq, haq lèt wa yùq crè. ¹³ Mahaq 'bình plinh doi ca haq: "Xa-cha-ri apaq yùq, ma jah 'màng Boc Plinh khai tàng bàu waiq khàn ìh. Mai ìh Ê-li-sa-bet cô èh haq xa-ông mòiq toq con calô. Ìh phai hiniq ca haq Jon. ¹⁴ Ìh jah bùi lem òiòiq jaq, bàc ngai jah lem bùi jò xa-ông ca haq. ¹⁵ Ma jah 'màng aih haq jah padèch enh ngĩa ca Chuaq wa haq ùh jò leq ôq alac, mahaq jah ùc bình Yiang Hadròih jò haq òi ta cliac miq haq. ¹⁶ Haq jah broq ca con caiq Is-ra-ên bàc ngai wìh hlài tiaq Chuaq, aih Boc Plinh da wì haq. ¹⁷ Cla haq lam adroi ca Chuaq, yóc manoh xam yiang i cwàng itai tiah ca Êli, òiòiq thê òiòiq ca baq yóc manoh hatroq ca con caiq, wa thê mangai ùh loq iu tawìh caq òi xam manoh ta-atoq, òiòiq padon manoh con mangai gòm Chuaq lam trùh."

¹⁸ Xa-cha-ri bòch 'bình plinh: "'Màng leq au jah loq bàc aih? Ma jah 'màng aih au khai craq, mai au khai bàc hanam."

¹⁹ Bình plinh padreo bàu hlài ca haq doi: "Au cô Gap-ri-ên ma yòng enh ngĩa ca Boc Plinh. Haq thê au lam trùh ti ìh, doi ca ìh bàu lem cô. ²⁰ Cô èh, ìh 'bìq lâu, ùh jah capoch trùh jò jah hnoq bàc aih trùh, taiq ìh ùh lùlì bàu au, aih bàu jah xit jò troq."

²¹ Wì mangai pajùm gòm Xa-cha-ri hamàih, ma jah 'màng aih haq òi dùnh ta Hnem Cùh Waiq. ²² Jò haq loh, haq ùh jah capoch cleq ca wì. Wì loq haq khi hnoq bìac mahno ta Hnem Cùh Waiq. Haq yõc tì patiah ca wì taiq haq xôq òi làu.

²³ Trùh hì khi hêq ca broq bìac ta Hnem Cùh Waiq, haq hlài ta hnem haq. ²⁴ Khi ca aih, mai haq Ê-li-sa-bet òi jiang. Padam khê haq ùh loh enh hnem. ²⁵ Ê-li-sa-bet doi: “Cò xôq ramõt Chuaq khi broq am ca au. Haq loq xa-õch ca au waq ca au ùh hìaq camaih enh ngìa ca phù cròng, taiq cò èh au jah xa-ông con.”

'Bình Plình Bahìa Bìac Xa-ông Chuaq Jêxu

²⁶ Ta khê ma tadràu, Boc Plình thê 'bình plình Gap-ri-ên lam trùh ta phòq Na-xa-ret, gùng Ga-li-lê, ²⁷ trùh ti mòiq ngai gu cadrì adrùh xriu hiniq haq Mari, khi rùp bàu broq mai mòiq ngai gù radam hiniq haq Jôsep, xinoi bùa Đawit. ²⁸ 'Bình Plình mùt nòi gu cadrì ma òi, doi: “Ô mangai jah xôq ramõt, Chuaq òi ti ìh.”

²⁹ Mari tàng bàu aih haq lèt dìq jaq, hèm ta manoh 'nì bàu aih enh doi cleq. ³⁰ 'Bình Plình doi ca haq: “Ô Mari apaq yùq, taiq Boc Plình enh am xôq ca ìh. ³¹ Cò èh, ìh jah òi jiang, xa-ông mòiq toq Con Calô, ìh hiniq ca Haq Jêxu. ³² Haq jah padèch ha'nhèq, jah creò Haq Con Calô Boc Plình ma Yi Ha'nhèq. Boc Plình jah am ca Haq gèq bùa Đawit boc yaq da Haq. ³³ Haq jah broq Bùa wì con caiq Jacôp, rìh halình hloi hloi, Diac Haq ùh jò leq lùch.”

³⁴ Mari doi ca 'bình plình: “Au cô 'nhòq i ǒng, broq 'màng leq jah i biác aih.”

³⁵ 'Bình Plinh padreo bàu hlài ca haq: “Yiang Hadròih jah loh ǒi ti chac ìh. Cwìang itai Boc Plinh jah wawenh ca ìh. 'Màng aih Con Hadròih jah xa-ông phai creo Haq Con Boc Plinh. ³⁶ Hadaì khòh loq: Ê-li-sa-bet, oh daq ìh, hadai khoi ǒi jiang con calô ta cliac 'nhac ca jò haq khoi craq, haq ma wì doi mangai xon. Manàiq haq khoi ǒi jiang tadràu khê. ³⁷ Ma jah 'màng aih ùh i biác cleq Boc Plinh ma ùh broq jah.”

³⁸ Mari doi: “Au cô hapǒng 'yoh Chuaq. Xìn biác aih trùh ca au tiaq bàu ìh doi!” Khoi èh 'bình plình loh lam.

Mari Lam Hmàih ca Ê-li-sa-bet

³⁹ Toq leq hì atiq ca aih Mari dahòiq lam trùh mòiq nòi gùng rôm wang ǒi ta phòq cròng Juda, ⁴⁰ mùt hnem Xa-cha-ri, bòch hmàih Ê-li-sa-bet. ⁴¹ Jò Ê-li-sa-bet tàng bàu haq, con haq hatrêh ta cliac. Ê-li-sa-bet jah 'bình Yiang Hadròih. ⁴² Haq dêh bàu doi: “Ìh jah xôq ramǒt yi hnao ta dìq dǒng ca gu cadrì. Con ìh ta cliac hadai jah xôq! ⁴³ Xôq ramǒt dìq jaq ca au ma jah 'màng aih au jah miq Chuaq trùh hmàih? ⁴⁴ Ngan cô, jò au tàng bàu ìh bòch hmàih ca au, tajòì 'mòi con ta cliac au lem bùi hatrêh. ⁴⁵ Xôq ramǒt ca gu cadrì ma khoi lùì bàu Chuaq khoi doi ca haq taiq biác aih jah broq gêh.”

Bàu Calêu Da Mari

⁴⁶ Mari doi:
“Mahua Yiang au manè apôi Chuaq!

- 47 Manoh au lem bùi ỏi ta Boc Plính, Haq Chuaq ma dèch au.
- 48 Ma jah 'màng aih Haq
 khoi hnoq au mangai hapǒng 'yoh 'yit.
 Pàng cô ta èh rìm ca 'nhòng jah doi au mangai i
 xôq ramốt,
- 49 Taiq Boc Plính ma i cwiang itai yi ha'nhèq
 đống khoi broq biac càn am ca au.
 Hiniq Haq Hadròih.
- 50 Haq xa-ốch ca wì ma iu Haq,
 enh 'nhòng cô trùh 'nhòng 'noiq.
- 51 Tì cǒng Haq khoi broq biac càn caiq.
 Haq khoi hnan đac wì ma padèch dèh
 manoh thê wì cadàu lam lac.
- 52 Haq khoi broq mangai i cwiang cađac dèh gèq
 nòi wèq,
 Haq dèch atốc mangai ùh nèn.
- 53 Haq broq ca wì mangai pangot jah i dahwèq
 caq,
 hnan wì mangai can padrǒng lam tì dech.
- 54 Haq jùp đò Is-ra-ên hapǒng 'yoh Haq.
 Haq hmàng pa'noh manoh loq xa-ốch.
- 55 'Màng ca Haq khoi doi ca boc bèn, Ap-ra-ham,
 wa con xau Ap-ra-ham trùh rìm 'nhòng."
- 56 Mari ỏi ti Ê-li-sa-bet piq khê, khoi èh, haq
 hlài dèh ta hnem haq.

Xa-ông ca Jon 'Baptit

- 57 Khoi trùh hì xa-ông, Ê-li-sa-bet xa-ông mòi
 ngai con calô. 58 Dìq ca oh daq, plài haten ca haq,
 hnoq Chuaq khoi pa'noh biac xa-ốch ca Ê-li-sa-
 bet. Wì lem bùi pajùm ca haq.

⁵⁹ Trùh hì rahem, jò broq lè cat akia ca con nga cô, wì enh hiniq ca haq Xa-cha-ri tiaq hiniq baq haq, ⁶⁰ mahaq miq haq doi: “Ùh jah. Ep hiniq ca haq Jon.”

⁶¹ Wì rahen: “ 'Bàì 'bôq ìh ùh i cabô hiniq aih.”

⁶² Wì broq patiah ca baq haq, bòch haq enh am hiniq leq. ⁶³ Xa-cha-ri thê wì yôc ca haq mòiq capiac long ban 'yoh. Haq achìh 'màng cô: “Hiniq haq Jon.” Cabô ji hamàih. ⁶⁴ Tajòì 'mòì hacùng haq tapèh, jah capoch. Haq manè pôi Boc Plình. ⁶⁵ Dìq ca wì òi ti hnem haten ca aih yùq crè. Wì hatuàng bìac cô jàp ca gùng rôm wang Judia. ⁶⁶ Rìm ngai tàng bìac cô òiq hèm ta manoh, ùh 'nì con nga cô jah 'màng leq cô èh, taiq joq 'nàng cwiang tì da Chuaq òi ti haq.

Bàu Manè Pôi da Xa-cha-ri

⁶⁷ Xa-cha-ri baq con nga aih jah 'bình Yiang Hadròih. Haq capoch bàu loq adroi doi:

⁶⁸ “Manè pôi Chuaq, Boc Plình da Is-ra-ên,
ma jah 'màng aih Haq khoi lam hmàih ca bèn, rôt dèch hlài mangai jàn Haq.

⁶⁹ Haq khoi dèch am ca bèn mòiq Ngai i cwiang itai jah dèch bèn,
trùh enh xinoi Đawit, hapông Boc Plình.

⁷⁰ Tìah ca bàu Chuaq,
nhò 'bài mangai capoch thai Boc Plình khoi anoi calah nèh.

⁷¹ Haq jah dèch bèn claih enh mangai ma tagit bèn,
dõih bèn claih enh tì wì ma git ca bèn.

⁷² Haq pa'noh manoh xa-öch trùh ti boc yaq bèn,
hmàng hlài bàu wêh jao hadròih,

- 73 tiah ca bàu pachac Haq khoi doi ca Ap-ra-ham boc yaq bèn.
- 74 Haq jah dèch bèn claih enh mangai ma ta'blêq ca bèn,
 ðòiq bèn jah patih biac Haq ùh hiaq yùq crè ca wì.
- 75 ðòiq ðiq ca 'nhòng rih bèn jah hadròih wa ta-atoq enh ngia ca Boc Plinh ma ha'nhèq.
- 76 “Ôi con 'yoh, wì jah creo ca con: Mangai capoch thai Boc Plinh, aih Boc Plinh ma Yi Ha'nhèq,
 taiq con lam adroi ca Chuaq padon am trong ca Haq.
- 77 ðòiq am ca con jàn Haq
 manoh loq 'nì biac dèch claih nhò baxǒng tôiq lôi wì.
- 78 Boc Plinh broq biac cô taiq Haq xa-ǒch ca bèn.
 Jah i can 'ngah daxroq enh Diac Plinh padon xreo enh 'nhèq ca bèn,
- 79 xreo 'ngah ca wì ma ha'ngui nòi clam clôiq,
 ti yàp cachit, ðòiq 'ràng jèn bèn lam trong catèm.”
- 80 Con 'yoh aih yòng càn, manoh tadêh, ǒi nòi ðùng hawit trùh hì pa'noh dađeh ca jàn Is-ra-ên.

2

Chuaq Jêxu Jah Xa-ông Loh

- ¹ Jò aih, Sêsa Âu-gut-tô bùa Diac Rôma, wa bàc Diac ma 'noiq, 'noh ranenh thê ðiq ðong mangai rìm nòi, ep achih dèh hiniq ta sô rèn con jàn.
- ² Cô yàng baxèm wì achih 'mùt dèh hiniq ta sô rèn con jàn, patep jò tình trùang Cwi-ri-ni-u wèq

cwiang taneh Diac Siri. ³ Dìq dǒng ca jàn hlài dèh ta gùng òiđiq achìh 'mùt dèh hiniq ta sô rèn con jàn.

⁴ Ma jah 'màng aih Jôsep, xinoi Đawit, haq hadai lam enh phôq Na-xa-ret gùng Ga-li-lê, loh ta gùng Judia, trùh 'Bêl-lê-hem phôq da Đawit, ⁵ òiđiq achìh dèh hiniq wa hiniq Mari, mangai khoi jap bàu yǒc haq, 'nang ǒi jiang. ⁶ Jò wa ǒi ta 'Bêl-lê-hem, khoi trùh jò Mari xa-ông. ⁷ Haq xa-ông Con Ramua, yǒc mù ta'màn dèh Con, ta'ngùi ta atong nhat, ma jah 'màng aih ta hnem tamoi ǒi òi pì i nòi ca wì haq.

Mangai Ban Trùu wa 'Bình Plình

⁸ Ta gùng aih i 'bài mangai ban trùu ǒi ta òiđing, rìu damang gòm dèh trùu. ⁹ Ta'ngàc i 'bình plình da Chuaq lam trùh patô dađeh ca wì. 'Nghah 'ngai Chuaq xreo wawenh ca wì. Wì yùq crè òiđiq jaq. ¹⁰ 'Bình plình doi: “Apaq yùq, ma jah 'màng aih, cô au anoi ca pì Bàu Lem, aih can bùi càn wa Bàu Lem jah am ca rìm ngai. ¹¹ Mang cô ta 'Bêl-lê-hem khoi xa-ông Mangai Dèch con mangai, Haq Crich, Haq Chuaq. ¹² Cô èh teo òiđiq pì jah loq ca Haq: Pì jah hnoq Con Nga, ta'màn xam mù cùi ta atong nhat.”

¹³ Ta'ngàc jò aih, i bàc 'bình plình ma 'noiđiq loh mahno dađeh pajùm ca 'bình plình aih. Wì anoi bàu manè Boc Plình:

¹⁴ “ 'Nghah ca hiniq Boc Plình enh 'nhèq ca Plình, catèm ǒi crǒng taneh, am xǒq ramǒt ca mangai lem manoh Haq.”

¹⁵ Atìq ca wì 'bình plình hlài dèh ta plình, wì mangai ban trùu adràc dabau: “Beq bèn lam mùt

ta phôq 'Bêt-lê-hem, ngan biac ma neo i troi Chuaq khoi am ca bèn loq.”

¹⁶ Wì hoiq haiq loh lam cadàu mùt ta phôq, chaq hnoq Mari, Jôsep, wa Con Nga cùi ta atong nhat. ¹⁷ Jò wì mangai ban trùu hnoq 'màng aih, wì ta'mon hlài rìm bàu 'bình plình ma khoi anoi ca wì biac Con Nga cô. ¹⁸ Rìm ngai òiq hamaih jò wì tàng 'bài mangai ban trùu ta'mon hlài. ¹⁹ Mari hmàng òoiq rìm biac cô ta manoh. ²⁰ Wì mangai ban trùu hlài dèh ta trùu, manè padèch Boc Plình òiq ca biac wì ma khoi tàng, khoi hnoq. Biac cô khoi i joq 'nàng troi bàu 'bình plình khoi doi ca wì.

²¹ Trùh hì rahem, hì phai cat akia, wa haq hiniq am Con Nga aih Chuaq Jêxu, ma jah 'màng aih 'bình plình khoi am ca Con Nga hiniq cô adroi ca jò Mari òi jiang.

Lè Jao Am Chuaq Jêxu ta Hnem Cùh Waiq

²² Jò biac hruah da Mari tiaq ranenh Môise hnài khoi gèh, wa haq 'ràng Chuaq Jêxu tọc ta phôq Jê-ru-sa-lem òoiq jao am ca Boc Plình, ²³ tiaq bàu khoi achìh ta sech ranenh Chuaq: “Òiq con calô ramua, ep jao am ca Boc Plình,”[✧] ²⁴ wa am tadreo tiaq ranenh Boc Plình hnài: “Baiq toq trù gùng loq baiq toq trù clôi tiaq ranenh Chuaq hnài.”[✧]

Bàu Manè Da Si-mê-ôn

²⁵ Wop jò aih, i mòiq ngai hiniq haq Si-mê-ôn rìh òi ta Jê-ru-sa-lem. Craq aih mangai ta-atoq, i manoh lem, loq iu bàu Boc Plình. Haq 'nang

✧ **2:23** 2:23 LEA 13:2,12. ✧ **2:24** 2:24 Lêwi 12:8.

gòm Boc Plình 'ràng trùh Can Alòng ca mangai Is-ra-ên. I Yiang Hadròih òi ti haq. ²⁶ Yiang Hadròih khoi mahno ca haq, haq 'nhòq cachit adroi ca hnoq Mangai Crich da Boc Plình. ²⁷ Hì aih Yiang Hadròih 'ràng haq mùt ta Hnem Cùh Waiq, adrình ca jò Mari wa Jôsep 'ràng Chuaq Jêxu trùh, òiòiq broq bìac ranenh ma khoi thê broq. ²⁸ Si-mê-ôn hnoq Con Nga, ca'mình mùt dèh ta chac, rai manè pôi Boc Plình xam bàu waiq khàn:

²⁹ “Waiq Chuaq, manàiq cô xìn am hapǒng ìh jah cachit catèm,

tiag bàu ìh khoi doi,

³⁰ Ma jah 'màng aih mat au khoi hnoq bìac dèch claih da ìh.

³¹ ìh khoi padon Mangai aih am ca rìm ngai jah hnoq.

³² Mangai aih Can 'Nghah, òiòiq xreo òiq ca phù cròng,

wa òiòiq jah broq 'ngah 'ngai ca jàn Is-ra-ên, aih jàn ìh.”

³³ Jôsep wa Mari òiq jaq hamàih ca rìm bàu Si-mê-ôn anoi bìac Chuaq Jêxu. ³⁴ Si-mê-ôn waiq xôq ramöt am ca wì, èh doi ca Mari, miq Chuaq Jêxu: “I bàu khoi pajaq, Con Nga cô broq bàc ngai ta Is-ra-ên catóih cro, mahaq broq bàc ngai ma 'noi q jah dèch claih, mahaq èh Con Nga cô 'bìq bàc ngai tajraq hlài. ³⁵ Èh manoh ìh mango òiq ca jaq tìah ca chang gùm bìt manoh, òiòiq òiq ca bìac ta manoh wì haq jah mahno loh.”

Bàu Anna

³⁶ Hadai jò aih i mòiq ngai gù cadrì capoch thai Boc Plình hiniq haq Anna, con Pha-nu-ên xinoi Ase, khoi craq. Haq mangai hadrô taiq òng haq khoi cachit atiq ca wa yóc dabau tapèh hanam. ³⁷ Manàiq haq khoi 84 hanam, haq òi yôt ta Hnem Cùh Waiq, rôn ca acaq, waiq khàn dahì damang broq biac Boc Plình. ³⁸ Wop jò Si-mê-ôn đàng capoch ca Mari, Anna trùh baxèm manè Boc Plình, hi khoi, anoi biac Chuaq Jêxu am ca rìm ngai ma 'nang gòm Boc Plình dèch mangai Jê-ru-sa-lem.

³⁹ Jôsep wa Mari broq gêh rìm biac tiaq ranenh Boc Plình ma thê wì ep broq. Khoi èh, hlài Ga-li-lê ta phôq Na-xa-ret phôq cla wì. ⁴⁰ Chuaq Jêxu yòng càn, tadêh tadon, bình halùih biac rabiaq wa xôq ramôt Boc Plình òi ti Haq.

Chuaq Jêxu Jò Mòiq Jàt Baiq Hanam

⁴¹ Rìm hanam trùh hì Lè Lam Cwa, miq baq Chuaq Jêxu lam ta Jê-ru-sa-lem. ⁴² Jò Haq khoi jah 12 hanam, Haq hadai tiaq dèh miq baq tọc phôq Jê-ru-sa-lem broq lè. ⁴³ Jò lè khoi gêh, miq baq Haq hlài dèh ta gùng, mahaq Chuaq Jêxu òi ta Jê-ru-sa-lem, miq baq haq ùh 'nì. ⁴⁴ Wa xoh dèh Haq hadai lam ti wì ma hlài, lam xèq hì aih, wa men ti chaq Haq ta oh daq canao, ⁴⁵ mahaq ùh hnoq Haq. Wa wìh hlài Jê-ru-sa-lem chaq hòim. ⁴⁶ Atiq ca piq hì, wa chaq hnoq Haq ta Hnem Cùh Waiq 'nang ha'ngui ta'ne 'bài thài ranenh, rai tamàng, rai bòch. ⁴⁷ Mangai leq tàng, wì hamàih dìq jaq ca can khôn rabiaq wa bàu Haq tèo wì. ⁴⁸ Jò wa chaq hnoq Haq, wa hamàih. Miq Haq bòch: “Con ôi, gleq Con ma

broq 'màng cô? Ngan cô, ma baq Con khoi xalep òi q jaq ti chaq Con.”

⁴⁹ Haq doi ca wa: “Miq baq chaq broq cleq ca Au? Chôp 'nhòq 'nì Au phai broq bìac Baq Au 'mòh?” ⁵⁰ Mahaq wa ùh 'nì bàu aih Haq doi cleq.

⁵¹ Khoi èh, Haq tiaq wa hlài ta phòq Na-xa-ret, loq iu bàu dèh miq baq. Miq Haq wèq òi q bàu aih ta manoh. ⁵² Chuaq Jêxu khôn rabiaq rai bàc, chac hamac rai càn, lem manoh ca Boc Plinh wa ca con mangai.

3

Bìac Broq Da Jon

(Mat 3:1-12; Mỗc 1:1-8; Jon 1:19-28)

¹ Hanam ma 15, 'nhòng bùa Sêsa Ti-bê-ri, jò 'Bonti Philat broq tình truang cròng Judia, Hêrôt broq bùa cròng Ga-li-lê. Philip oh bùa aih broq tình truang cròng I-tu-rê wa tình Tra-cô-nit. Li-sa-ni-a broq tình truang cròng A-bi-len. ² Jò Anne wa Caiphe broq pajàu ha'nhèq, i bàu Boc Plinh doi ca Jon, con Xa-cha-ri, òi ta nòi ðùng hawit. ³ Jon lam jàp òi q ca gùng haten ca ðiac Jôðan, hnài rìm ngai phai chiuq 'baptem ðòi q patô wì khoi caðac dèh manoh broq tôiq, wìh hlài tiaq Boc Plinh ðòi q jah baxõng tôiq. ⁴ Troq tiaq bàu khoi achih ta sech Êsai mangai capoch thài Boc Plinh:

“I bàu creo ta nòi ðùng hawit:

‘Padon trong Chuaq beq,

broq ma tamang trong ca Haq.

⁵ ði q nòi hlõng catùh ðòi q haq 'bình,
nòi bôh wang ca'nìh ðòi q ha'neq;

trong tawech broq ðòiq haq jang;
 trong adùq adìq broq ðòiq haq tamang.

⁶ Wa rìm ngai jah hnoq bìac dèch claih da Boc Plình. '✧"

⁷ Jon baxèm anoi ca wì mangai pajùm ma khi lam trùh xìn haq broq 'baptem am ca wì: "Ô con caiq bìh plông, cabô khi hnài pì trong cadàu claih can nòih Boc Plình ma padon loh? ⁸ 'Màng aih, pì phai wìh wìa ma lem beq ðòiq tajì ca pì khi cadac dèh manoh broq tôiq. Apa q doi ca dadèh: 'Ap-ra-ham, aih boc bèn,' ma jah 'màng aih Au doi ca pì, Boc Plình jah broq hmu cô loh con caiq am ca Ap-ra-ham. ⁹ Manàiq cô chòng khi ðòiq axèm long; long leq ùh loh plì lem, jah coh tèm đac ta ùnh."

¹⁰ Wì bòch Jon: "Nhèn phai broq cleq?"

¹¹ Haq tèo wì: "Cabô i baiq blah eo, am mòi q blah ca mangai ùh i beq. Cabô i dahwèq caq, hadai broq 'màng aih."

¹² Hadai i mangai gop thèq trùh ðòiq chiùq 'baptem. Wì haq bòch: "Thài ôi, nhèn phai broq cleq?"

¹³ Haq doi ca wì: "Apa q gop thèq enh gùng ca ranenh khi pajaq."

¹⁴ Wì mangai lình hadai bòch: "Nhèn phai broq cleq?"

Haq tèo wì: "Apa q padit, apa q 'nùt mangai 'noi q, mahaq phai lem bùi dèh ca cùng baha cla."

¹⁵ 'Bài mangai pajùm xôq òi gòm, wa mangai leq ji hèm ta manoh: "Jon cô joq Crich loq ùh?"

¹⁶ Jon tèo wì haq, doi: "Au broq 'baptem ca pì

✧ 3:6 3:6 Êsai 40:3-5.

xam diac, mahaq i mòiq Ngai i cwìang itai yi hnao ca au jah trùh, au ùh taji òdiq dôi h caxi jai Haq. Haq jah broq 'baptem am ca pì xam Yiang Hadròih wa xam ùnh. ¹⁷ Tì Haq jah wê tòn dè 'mau hreo, yõc pliang 'mau lem 'mùt ta hapom, mahaq manùh bùh ta ùnh ma ùh pat." ¹⁸ Jò Jon 'nang hnài Bàu Lem, èh ji hnài bàc biac ma 'noi q hò m.

¹⁹ Mahaq bùa Hêrôt, taiq Jon khoi trech tàt haq biac yõc Hê-rô-đia mai oh haq, wa biac dù bùa khoi broq, ²⁰ haq tam mòiq biac dù hò m, aih rùp Jon 'mùt hnem tù.

Chuaq Jêxu Chiuq 'Baptem

(Mat 3:13-17; Mõc 1:9-11)

²¹ Jò diq ca mangai pajùm chiuq 'baptem, Chuaq Jêxu hadai chiuq 'baptem. Haq 'nang waiq khàn hnoq plinh tapèh, ²² èh Yiang Hadròih yõc 'mù chìm trù loh jràp ti plêh Haq. I bàu enh plinh doi: "Ìh cô Con Au ma Au loq waq; lem manoh Au rìm trong."

Xinoi Chuaq Jêxu

(Mat 1:1-17)

²³ Chuaq Jêxu khoi jah 30 hanam, Haq baxèm broq biac Haq. Tiaq mangai ma hèm, Haq con Jòsep,

Jòsep con Hêli, ²⁴ Hêli con Mathat,

Mathat con Lêwi, Lêwi con Mênchi,

Mênchi con Janê, Janê con Jòsep,

²⁵ Jòsep con Ma-ta-thia, Ma-ta-thia con Amôt,

Amôt con Nahùm, Nahùm con Êchli,

Êchli con Nagê, ²⁶ Nagê con Ma-at,

Ma-at con Ma-ta-thia, Ma-ta-thia con Sê-mê-in,

Sê-mê-in con Jôsêch, Jôsêch con Jôđa,
²⁷ Jôđa con Jô-a-nan, Jô-a-nan con Rêsa,
 Rêsa con Xô-rô-ba-bên, Xô-rô-ba-bên con Sa-
 an-thi-ên,
 Sa-an-thi-ên con Nêri, ²⁸ Nêri con Mênchi,
 Mênchi con Ađi, Ađi con Cômam,
 Cômam con Ên-ma-đan, Ên-ma-đan con Êrò,
²⁹ Êrò con Jôsuê, Jôsuê con Ê-li-ê-se,
 Ê-li-ê-se con Jôrim, Jôrim con Mathat,
 Mathat con Lêwi, ³⁰ Lêwi con Si-mê-ôn,
 Si-mê-ôn con Juđa, Juđa con Jôsep,
 Jôsep con Jôam, Jôam con Ê-li-a-kim,
³¹ Ê-li-a-kim con Mê-lê-a, Mê-lê-a con Mena,
 Mena con Mat-ta-tha, Mat-ta-tha con Nathan,
 Nathan con Đawit, ³² Đawit con Jê-sê,
 Jê-sê con Ôbêt, Ôbêt con Bô-ô,
 Bô-ô con Sala, Sala con Na-ach-son,
 Na-ach-son con A-mi-na-đap. ³³ A-mi-na-đap
 con Atmin,
 Atmin con Ram, Ram con Hêtrôn,
 Hêtrôn con Perex, Perex con Juđa,
³⁴ Juđa con Jacôp, Jacôp con Isac,
 Isac con Ap-ra-ham, Ap-ra-ham con Terah,
 Terah con Nacô, ³⁵ Nacô con Sêruc,
 Sêruc con Reu, Reu con Pêlec,
 Pêlec con Êbe, Êbe con Sêlah,
³⁶ Sêlah con Cainan, Cainan con A-bac-sat,
 A-bac-sat con Sem, Sem con Noah,
 Noah con Lamec, ³⁷ Lamec con Ma-tu-sê-la,
 Ma-tu-sê-la con Ênoc, Ênoc con Jarêt,
 Jarêt con Mê-lê-ên, Mê-lê-ên con Cainan,
³⁸ Cainan con Ênot, Ênot con Sêt,
 Sêt con Ađam, Ađam con Boc Plinh.

4

*Can Kiác Satan Padô 'Nùt Chuaq Jêxu
(Mat 4:1-11; Mõc 1:12-13)*

¹ Chuaq Jêxu jah bình halùih Yiang Hadròih òi enh diác Jôđan hlài. Yiang Hadròih 'ràng Haq trùh ta ðùng hawit. ² Haq òi ta aih 40 hì. Can kiác Satan padô 'nùt Haq. Haq ùh i caq cleq trùh ðìq ca hì aih. Haq pangot.

³ Can kiác Satan doi ca Haq: “Tàng joq Ìh Con Boc Plình, broq hmu cô loh 'benh beq.”

⁴ Chuaq Jêxu tèo: “Sech Hadròih khai achìh: ‘Con mangai rìh ùh xài toq nhò 'benh.’✧”

⁵ Can kiác Satan 'ràng Haq tọc nòi ha'nhèq, am Haq ngan ðìq ca Diác ta crống taneh ta mòiq rahyàc, ⁶ hi doi ca Haq: “Au am ca Ìh ðìq ðống cwìang itai wa can ca-ah da 'bài Diác aih, ma jah 'màng aih, cwìang khai am ca au, au enh am ca mangai leq, au am. ⁷ Tàng Ìh hacùn cràng cùp gàu waiq au, ðìq ca bìác aih jah Ìh.”

⁸ Chuaq Jêxu tèo: “Sech Hadròih khai achìh: ‘Ìh phai cùh waiq Chuaq, aih Boc Plình ìh, broq toq bìác Haq hêq.’✧”

⁹ Can kiác Satan 'ràng Haq trùh phòq Jê-ru-sa-lem, ðòiq Haq tí bòi của Hnem Cùh Waiq, doi ca Haq: “Tàng Ìh joq Con Boc Plình, ca'nìh Đađeh beq, ¹⁰ ma jah 'màng aih Sech Hadròih khai achìh:

“ ‘Chuaq jah thê 'bình plình Haq wèq Ìh,

¹¹ wì aih jah gêh Ìh ta tì,

✧ 4:4 4:4 RAH 8:3. ✧ 4:8 4:8 RAH 6:13.

yùq ìh tacro, jènh ìh troq hmu.'☆”

¹² Chuaq Jêxu tèo: “Sech Hadròih khoi achìh: Ìh paq 'bàt thù Chuaq Boc Plình ìh.'☆”

¹³ Can kiac Satan chaq khoi òiq ca trong òòiq padô 'nùt Haq, èh lam khoi ca Haq, gòm jò ta'nàih ma 'noiç.

*Chuaq Jêxu Baxèm Hnài ta Gùng Ga-li-lê
(Mat 4:12-17; Mõc 1:14-15)*

¹⁴ Chuaq Jêxu jah bình halùih cwìang itai enh Yiang Hadròih, hlài ta gùng Ga-li-lê. 'Bang tiàng Haq jah anoi jàp gùng wawenh ca aih. ¹⁵ Haq hnài wì òi ti rìm hnem tagop, mangai leq ji manè Haq.

¹⁶ Chuaq Jêxu lam trùh phòq Na-xa-ret, aih nòi ma wèq ban Haq yòng càn. Glàm hì Sabat, Haq mùt ta hnem tagop, yòng enh ngìa ca wì, đóc Sech Hadròih. ¹⁷ I mangai am ca Haq sech Êsai, mangai capoch thai Boc Plình. Haq hlià sech, glàm nòi khoi achìh:

¹⁸ “Yiang Chuaq òi ti Au,
ma jah 'màng aih Haq khoi xùt dàu ca Au
òòiq anoi Bàu Lem am ca mangai pa;
Haq thê Au anoi ca mangai òi tù, jah ca'naih;
mangai ùh xao, jah hnoç;
mangai wì ma padit,
jah ca'naih;

¹⁹ wa anoi hlài hanam lem da Chuaq am ca wì.”☆

²⁰ Đóc gèh, Haq canua sech am hlài ca wì, èh ha'ngui. Rìm ngai òi ta hnem tagop aih ngan Haq.

☆ **4:11** 4:11 BCP 91:11,12. ☆ **4:12** 4:12 RAH 6:16. ☆ **4:19** 4:19 Êsai 58:6; 61:1,2.

21 Haq doi: “Hì cô bàu ta Sech Hadròih pì neo tàng, aih khoi jah xit.”

22 Cabô ji anoi hlài Haq, yõc manoh broq hamàih dìq ca bàu lem ma loh enh hacùng Haq. Wì doi: “Haq cô con Jôsep 'mòh?”

23 Haq doi ca wì: “Pì enh doi ca Au bàu aliah cô: ‘Ô 'bacsì sì, broq brêh ca dadêh beq; rìm biac nhèn tàng Ìh khoi broq ta Ca-bê-na-um, Ìh hadai phai broq òi ta cô, aih nòi gùng Ìh.’

24 “Au doi ca pì bàu joq 'nàng: Òh i ca mangai capoch thai Boc Plinh leq jah wì nhàn yõc òi ta gùng cla. 25 Au doi ca pì bàu joq 'nàng: 'Nhòng Êli òi ta Is-ra-ên i bàc gu cadrì hadrô. Plinh ùh mè piq hanam tadrâu khê, dìq ca cròng pangot hrah, 26 mahaq Êli ùh jah thê trùh ti mòiq ngai hadrô leq enh gùng ca mangai cadrì hadrô òi ta Sa-rep-ta, gùng Sidôn. 27 'Nhòng Ê-li-sê, mangai capoch thai Boc Plinh, i bàc ngai bacùn òi ta Is-ra-ên, mahaq ùh i mangai leq jah brêh, enh gùng ca Na-a-man, mangai Siri.”

28 Dìq ca wì ma òi ta hnem tagop tàng bàu cô, wì loh nòih dìq jaq. 29 Wì yòng, ca'nhùt Chuaq Jêxu loh enh gùng ca phôq, 'ràng Haq ta ha'mai go wang nòi wì ma broq phôq, òoiq cachùt Haq loh ta criang, 30 mahaq Chuaq Jêxu lam ta'ne wì mangai pajùm loh khoi nòi aih.

*Chuaq Jêxu Broq Brêh Mangai i Can Kiac
(Môc 1:21-28)*

31 Khoi èh, Chuaq Jêxu Lam phôq Ca-bê-na-um, ta gùng Ga-li-lê, hnài wì hì Sabat. 32 Wì

hamàih ta manoh ca bàu Haq ma hnài, ma jah 'màng aih Haq yõc cwìang itai hnài wì.

³³ Õi ta hnem tagop aih i mòiq ngai i kiac òi ta chac, haq cachech bàu dèh doi: ³⁴ “Ô Chuaq Jêxu mangai Na-xa-ret! Nhèn i biac cleq ca Ìh ùh? Ìh trùh ðòiq jêh ðac nhèn joq ùh? Au loq Ìh cabô: Ìh Mangai Hadròih da Boc Plình!”

³⁵ Mahaq Chuaq Jêxu tèo bàu gao lech ca haq, doi: “Hatenh beq, loh khoi enh mangai cô!” Can kiac ranhùq mangai aih, loh khoi enh chac haq, ùh broq habau ca Haq.

³⁶ Dìq ca wì hamàih, bòch dabau: “Cô bàu cleq? Ma jah 'màng aih Haq yõc cwìang itai hnan ðac can kiac, wì iu bàu Haq!” ³⁷ Wì anoi hlài cwìang itai Chuaq Jêxu dìq ca cròng aih.

Miq Mai Pêtrô

(Mat 8:14-17; Mõc 1:29-39)

³⁸ Chuaq Jêxu loh enh hnem tagop, mùt hnem Simôn. Miq mai Simôn 'nang ùh hrõc tacat. Wì ta aih xìn Chuaq Jêxu broq brêh ca haq. ³⁹ Chuaq Jêxu lam trùh yòng jang haq, lech ca tacat. Tajòì 'mòi haq jah brêh. Khoi èh haq yòng patìh ca wì.

⁴⁰ Jò mat mahì padon mùt, mangai leq ma i mangai ùh hrõc, ùh kè ùh hrõc cleq, wì 'ràng trùh ca Chuaq Jêxu. Haq dèch tì bèq chac tang ngai broq brêh ca wì. ⁴¹ I can kiac loh khoi enh chac bàc ngai, cachech bàu dèh doi: “Haq Crich Con Calô Boc Plình!” Mahaq Chuaq lech pagau ca wì, ùh am wì doi taiq wì khoi loq ca Haq Cabô.

⁴² Bu 'ngah, Chuaq Jêxu lam trùh mòiq nòi hawit. Bàc ngai lam chaq Haq. Jò wì hnoq Haq, wì ran padràng Haq, ùh enh Haq lam khoi ca wì. ⁴³ Mahaq Haq doi ca wì: “Au phai anoi Bàu Lem Diac Boc Plình ti bàc phôq ma 'noiq, taiq biac aih ma jah thê Au trùh ta cô.” ⁴⁴ Khoi èh, Haq hnài Bàu Lem ti rìm hnem tagop gùng Judia.

5

Biac Ranang Ca Halac (Mat 4:18-22; Mõc 1:16-20)

¹ I mòiq hì aih Chuaq Jêxu đàng yòng ỏi ti 'bò diac raxìq Gê-nê-sa-rêt. I mangai bàc dahnen wawenh ca Haq, tamàng Haq hnài Bàu Boc Plình. ² Haq hnoq baiq toq bong ỏi haten ca 'bò diac, mahaq wì mangai rùp ca khoi loh ta diac 'nheo hlàm. ³ Chuaq Jêxu tọc ta bong, aih bong Simôn. Haq thê Simôn chùng bong lam hangai ca 'bò diac toq 'biaq. Haq ha'ngui ta bong hnài wì.

⁴ Jò Haq khoi hêq ca hnài, Haq doi ca Simôn: “Chùng bong loh nòi jrùq ca'naih hlàm rùp ca beq.”

⁵ Simôn doi: “Thài ôi, nhèn khoi broq 'ngah ca mang, mahaq ùh i rùp jah cleq. Mahaq 'nhac ca 'màng aih, au xôq tiaq bàu Ìh, ca'naih hlàm.”

⁶ Wì ca'naih hlàm jah bàc ca, trùh ten catech 'mòi ca hlàm. ⁷ Wì creo bua wì ỏi ta bong 'noiq lam jùp wì haq. Bua wì lam yóc ca 'bình baiq bong, ten cram ca bong.

⁸ Jò Simôn Pêtrô hnoq 'màng aih, haq hacùn cràng enh ngĩa Chuaq Jêxu, doi: “Waiq Chuaq

xìn ìh lam khoi ca au beq, ma jah 'màng aih au cô mangai i tôiq.”⁹ Wì hnoq biac rúp ca 'màng aih, Simôn wa òiq ca bua haq hamàih òiq jaq.¹⁰ Jacò wa Jon, con Xê-bê-đê, wa ma wiang broq pajùm ti Simôn, hadai hamàih 'màng aih.

Chuaq Jêxu doi ca Simôn: “Apaq yùq, pàng cô èh, ìh jah wìa mangai ca'naih hlàm dèch mangai.”¹¹ Wì òiq bong tọc ta 'bò. Hi khoi, cađac dèh bong lam tiaq Chuaq.

*Chuaq Jêxu Broq Brêh ca Mangai Bacùn
(Mat 8:1-4; Mõc 1:40-45)*

¹² Jò Chuaq Jêxu mùt ta mòiq phòq aih, i mòiq ngai, mangai bacùn caq jàp ta chac haq. Jò bu hnoq Chuaq, haq bla-op enh ngìa Haq, xìn: “Chuaq ôi, tàng ìh enh, ìh jah broq brêh ca au!”

¹³ Chuaq Jêxu dèch tì bèq chac haq, rai doi: “Au enh, brêh beq!” Tajòì 'mòì haq jah brêh.

¹⁴ Chuaq Jêxu ùh am haq anoi biac aih ca mangai leq, mahaq Haq tanap: “Ìh phai lam patô òiq dèch ca pajàu. Khoi èh, am tadreo tiaq Môise khoi hnài, òiq biac aih jah patô am ca wì.”

¹⁵ Khoi èh, bàc ngai anoi hlài biac Chuaq Jêxu wa cwìang itai Haq. Mangai pajùm bàc lam trùh ti Haq tamàng Haq hnài, òiq Haq broq brêh can hiniq ca wì.¹⁶ Mahaq Haq lam nòi òiq hawit waiq khàn.

*Chuaq Broq Brêh ca Mangai Pen
(Mat 9:1-8; Mõc 2:1-12)*

¹⁷ I mòiq hì, Chuaq Jêxu 'nang hnài wì. I mangai Pha-ri-si wa thài ranenh trùh enh 'bài

phôq ta gùng Ga-li-lê, gùng Judia, phôq Jê-ru-sa-lem, ha'ngui ti aih. Cwìang itai Boc Plình ỏi ti Chuaq Jêxu ðòi q Haq broq brêh ði q ca can hinì q wì haq. ¹⁸ Jò aih, i wì tòng mòiq ngai pen ta dradrah, chaq trong 'mùt haq jang ngìa Chuaq Jêxu. ¹⁹ Mangai bàc hrìn, wì ùh i ca trong mùt. Wì heo tồc ta của hnem, ðôi h ngoiq, 'nhùa 'noh mangai pen ỏi ta dradrah jang ngìa Chuaq, ta'ne mangai bàc.

²⁰ Chuaq Jêxu hnoq manoh lùì wì. Haq doi! “Ô con, tôiq lòi con khi jah baxông.”

²¹ Jò wì thài ranenh wa mangai Pha-ri-si tàng bàu aih, wì bòch dabau: “Haq cô cabô ma hùa capoch 'mèq ðùng Chuaq 'màng aih? Enh gùng ca Boc Plình ùh i ca cabô jah baxông tôiq.”

²² Chuaq Jêxu loq ta manoh wì hèm 'màng leq. Haq doi ca wì: “Gleq pì ma hèm ta manoh 'màng aih?” ²³ Haq bòch: “Ma leq ma yi xùang ca doi: ‘Tôiq ìh khi jah baxông,’ loq: ‘Ìh yòng lam beq?’ ²⁴ Mahaq ðòi q pì loq ỏi crõng taneh Con Mangai i cwìang baxông tôiq”, Haq doi ca mangai pen: “Au thê ìh yòng xùì dradrah hlài ta hnem beq!” ²⁵ Tajòi 'mòi mangai pen aih yòng enh ngìa ca mangai pajùm, xùì ðèh dradrah haq ma ca'nùng, hlài ta hnem, manè pôi Boc Plình. ²⁶ Rìm ngai ði q hamàih, manè pôi Boc Plình, rai crè yùq. Wì doi: “Hì cô bèn khi hnoq biac halac.”

Chuaq Jêxu Creo Lêwi

(Mat 9:9-17; Mốc 2:13-22)

²⁷ Atìq ca aih, jò Chuaq Jêxu loh enh gùng, hnoq mòiq ngai, mangai gop thèq 'nang ha'ngui

õi ta hnem gop thèq, hiniq haq Lêwi. Chuaq Jêxu doi ca haq: “Lam tiaq Au beq!” ²⁸ Lêwi cađac ðìq rìm biac, yòng lam tiaq Chuaq.

²⁹ Lêwi padon hiniang càn ca Chuaq ta hnem cla. I 'bài ngai gop thèq wa mangai 'noiç hadai ha'ngui caq pajùm ti wì. ³⁰ Wì mangai Pha-ri-si wa thài ranenh mamùc, doi ca mangai hõc tiaq Chuaq: “Gleq pì ma caq pajùm ti mangai gop thèq wa mangai i tõiç?”

³¹ Chuaq Jêxu doi ca wì: “Ùh xài toq mangai tadêh ma nhet ca 'bacsì sì, mahaq mangai ma ùh hrõc ma nhet. ³² Au trùh ùh xài creò mangai ta-atoq, mahaq creò mangai i tõiç waq ca wì haq cađac ðèh manoh broq tõiç.”

³³ Wì bòch Haq: “Mangai hõc tiaq Jon rôn ca acaq waiç khàn; mangai hõc tiaq mangai Pha-ri-si hadai, mahaq mangai hõc tiaq ìh caq wa ôç?”

³⁴ Haq tèò wì: “Jò con ỡng 'nang õi pajùm ti bua haq, wì lem bùi caq hiniang haq, 'màng leq ma thê wì rôn ca acaq? ³⁵ Mahaq jò leq con ỡng chiuq 'ràng lam hangai ca wì haq, hì aih wì men õi rôn.”

³⁶ Haq yõc bàu aliah cô hnài wì. Haq doi: “Ùh i ca cabô ma hich bai neo, jìp 'mùt jang eo dùnh. Tàng broq 'màng aih, haq hyah, èh ha'nech ma neo ùh hatroq ca eo ma dùnh. ³⁷ Hadai ùh i cabô ma ùc alac neo 'mùt ta 'bao akia dùnh. Tàng 'màng aih, alac neo broq padah ca 'bao akia dùnh. ³⁸ Mahaq alac neo phai ùc 'mùt ta 'bao akia neo. ³⁹ Hadai ùh i cabô ôç alac dùnh khi ùh bòch alac neo, ma jah 'màng aih, wì haq doi: ‘Alac dùnh yi jìang.’”

6

*Prot Hadròc 'Mau**(Mat 12:1-8; Mõc 2:23-28)*

¹ Hì Sabat Chuaq Jêxu wa mangai hõc tiaq Haq lam cwa ðùng 'mau. Mangai hõc tiaq prot hadròc 'mau tuta ta tì, èh caq. ² Wì mangai Pha-ri-si trech doi: “Gleq pì ma broq bìac ùh khòh broq hì Sabat?”

³ Chuaq Jêxu doi ca wì: “Pì ma 'nhòq ðõc Sech Hadròih bìac Ðawit ma broq jò haq wa mangai lam ti haq, hadai pangot? ⁴ Haq mùt ta Hnem Cùh Waiq, yõc 'benh ma padon ðòiq ta Hnem Cùh Waiq caq, hi khi am ca mangai ma tiaq haq hadai caq. Aih 'benh toq wì pajàu Boc Pình ma khòh caq?” ⁵ Haq doi tam: “Con Mangai, Haq Chuaq da hì Sabat.”

*Mangai 'Yoh Tì**(Mat 12:9-14; Mõc 3:1-6)*

⁶ Mòiq hì Sabat ma 'noiç, jò Chuaq Jêxu hnài wì òi ti hnem tagop, i mòiq ngai òi ta aih 'yoh tì pah 'ma. ⁷ Wì thài ranenh wa wì Pha-ri-si ngan thù Haq hìaq broq brêh ca mangai aih hì Sabat ùh, ðòiq jah chaq trong kian Haq. ⁸ Mahaq Chuaq Jêxu loq ca manoh wì. Haq doi ca mangai 'yoh tì: “Yòng beq, yòng òi ta'ne wì cô.” Haq lam ti Chuaq Jêxu, yòng enh ngìa ca wì.

⁹ Chuaq Jêxu doi ca wì: “Au bòch pì: Ta hì Sabat, khòh broq bìac lem loq bìac 'mèq, jêh mangai loq dèch mangai?”

¹⁰ Khi èh, Haq ngan wì tang ngai ma wawenh ca haq, hi doi ca mangai 'yoh tì: “Padoh tì beq!” Haq padoh tì. Tì haq jah brêh. ¹¹ Wì thài ranenh

wa mangai Pha-ri-si loh nòih dìq jaq, hatình ca dabau: “Bèn broq 'màng leq ca Chuaq Jêxu cô èh.”

Chuaq Jêxu Ràih Mòiq Jàt Baiq Ngai
(*Mat 10:1-4; Mõc 12:13-19*)

¹² Ta 'bài hì aih, Chuaq Jêxu tõi ta wang waiq khàn. Dìq mòiq mang Haq waiq khàn ca Boc Plình. ¹³ Jò mat mahì loh, Haq creò wì mangai hõc tiaq Haq ðòi q raih 12 ngai broq sùq ðò.

¹⁴ Hiniq wì 'màng cô: Simôn, Chuaq hiniq ca haq Pêtrô. Anrê oh Simôn, Jacò wa Jon, Philip wa 'Ba-thê-lê-mi, ¹⁵ Mathêu wa Thôma, Jacò con Aphê, Simôn, wì creò Xêlôt. ¹⁶ Juda con Jacò wa Juda Ich-ca-ri-ôt, aih mangai ma blòq Chuaq atìq cô èh.

¹⁷ Khoi ca aih, Haq wa mangai hõc tiaq loh trùh nòi tamang. Òi ti aih, i mangai hõc tiaq haq wa mangai pajùm bàc enh gùng Juda, phòq Jê-ru-sa-lem, wa gùng Tirò, wa Sidôn, ¹⁸ trùh tamang Haq hnài wa xìn Haq broq brêh can ùh hróc am ca wì. Wì mangai 'bìq can kiác broq jìq xa òi ta chac hadai jah brêh. ¹⁹ Dìq ca wì chaq trong bèq Haq, ma jah 'màng aih jò wì bèq Haq, i cwiang itai loh, broq brêh dìq ca wì.

Bàu Xôq Ramõt wa Nan Xa
(*Mat 5:1-12,38-48; 7:12*)

²⁰ Chuaq Jêxu ngan mangai hõc tiaq, hi khoi Haq doi:

“Xôq ramõt ca pì mangai pa,
ma jah 'màng aih Diác Boc Plình, aih Diác da pì.

²¹ Xôq ramõt ca pì 'nang pangot,

ma jah 'màng aih cô èh pì jah panàc!
 Xôq ramõt ca pì 'nang loh diac mat,
 ma jah 'màng aih pì jah lem bùi!

²² Xôq ramõt ca pì,
 jò wì git ca pì, hnan pì,
 capoch 'mèq ca pì,
 hanip pì taiq pì tiaq Au!

²³ “Hì aih pì jah aplôh taiq manoh lem bùi dìq
 jaq, ma jah 'màng aih biac baha da pì òi ta Diac
 Plinh càn dìq jaq; wì boc yaq hadai khoi broq
 'mèq ca mangai capoch thai Boc Plinh 'màng aih.

²⁴ “Mahaq, nan xa ca pì mangai padrông can,
 ma jah 'màng aih pì khoi jah dèh biac alông!

²⁵ Nan xa ca mangai manàiq 'nang panàc,
 ma jah 'màng aih jah pangot!

Nan xa ca mangai manàiq 'nang do,
 ma jah 'màng aih èh jah mango wa crò hmoi!

²⁶ Nan xa ca pì jò i bàc ngai manè,
 ma jah 'màng aih boc yaq wì nèh hadai
 khoi capoch pajiang 'màng aih ca wì 'bài
 mangai amòng capoch bàu loq adroi!

Khòh Loq Waq Mangai Tagit Pì

²⁷ “Mahaq Au doi ca pì ma 'nang tamàng Au.
 Pì phai loq waq ca mangai ma broq 'mèq ca pì,
 broq lem ca mangai ma git ca pì. ²⁸ Waiq xôq
 ramõt ca mangai ma hanip pì, wa waiq khàn am
 ca mangai ma jù lê pì. ²⁹ Tàng cabô tep hadrò pì
 pah 'ma, am hloi ca haq tep da pì pah 'ngeo; Tàng
 cabô yóc eo pì ma enh gùng, am hloi ca haq eo
 enh dalam. ³⁰ Tàng i mangai xìn, pì am. Tàng i
 mangai yóc da pì dahwèq, apaq bòch hlài. ³¹ Pì

enh wì broq am ca pì 'màng leq, pì phai broq ca wì 'màng aih.

³² “Tàng pì loq waq toq ca mangai ma loq waq ca pì, pì jah xôq cleq? Wì ma i tôiq hadai loq waq ca mangai ma loq waq ca wì. ³³ Tàng pì broq lem toq ca mangai ma broq lem ca pì, 'màng aih jah xôq cleq? Mangai i tôiq hadai loq broq 'màng aih. ³⁴ Tàng pì am wì bòch ðò, hi khi, nèh ca wì ca'naih hlài, 'màng aih jah xôq cleq? Mangai i tôiq hadai am dabau bòch ðò, khi èh yôc hlài. ³⁵ Mahaq pì phai loq waq ca mangai ma git ca pì; phai broq lem wa am ðò, mahaq apaq bòch wì am hlài. 'Màng aih biac baha pì ta Diac Pình càn ðiq jaq. Pì jah broq con caiq da Boc Pình ma enh 'nhèq, ma jah 'màng aih Boc Pình hadai yôc manoh lem broq am ca mangai ùh 'nì yôc manoh manè, wa mangai dù. ³⁶ Pì phai loq xa-ôch 'màng ca Baq pì ma loq xa-ôch.

Biac Hadrah Mangai 'Noiq

(Mat 7:1-5,16-20,24-27; 12:33-35)

³⁷ “Apaq hadrah, èh pì ùh hìaq chiùq hadrah. Apaq ta'mòq tôiq ca wì, èh pì ùh hìaq 'bìq wì ta'mòq hlài. Baxõng lôi ca wì beq, èh lôi pì hadai jah baxõng. ³⁸ Am beq, èh pì jah nhàn yôc: cađap càn, tống bình ra'nhùn bàc, hi khi, tah tam ta eo pì hòm; ma jah 'màng aih pì tống ca wì dàng leq, wì hadai tống ca pì dàng aih.”

³⁹ Chuaq Jêxu hnài bàu aliah, Haq doi: “Mangai ùh xao jah tìch mangai ùh xao 'mòh? ðiq ca wa baiq ngai jah taclih ta hàm joq ùh? ⁴⁰ Mangai hõc tiaq ùh yi hnao ca thài, mahaq tàng mangai hõc tiaq lem rìm trong, èh jah dàng dèh thài.

⁴¹ “Gleq ìh ngan hnoq khenh ta mat oh daq ìh, mahaq ùh hnoq caxaih ta mat dađeh? ⁴² Gleq ìh ma doi ca oh daq ìh: ‘Ê bua, ðoìq au ðoìh khenh ta mat ìh,’ mahaq ìh ùh ðoìh caxaih ta mat dađeh? Ô mangai bàu lem manoh dù, ðoìh caxaih loh khoi enh mat ìh beq, khoi èh men xao hnoq khenh ta mat oh daq ìh.

⁴³ “Ma jah 'màng aih long lem ùh loh plì 'mèq, long 'mèq hadai ùh jah loh plì lem. ⁴⁴ 'Màng aih, ngan plì, èh loq ca long. Ùh i cabô gich plì póc nòi long hila, loq gich plì nho nòi ramù hila. ⁴⁵ Mangai i manoh lem, hloh bàu lem rangot. Mangai i manoh dù, hloh bàu 'mèq, bàu dù, ma jah 'màng aih manoh hèm 'màng leq, hacùng hloh bàu 'màng aih.

⁴⁶ “Gleq pì ma creo Au: ‘Chuaq, Chuaq,’ mahaq ùh broq tiaq bàu Au? ⁴⁷ Au jah patô ca pì loq, mangai leq trùh ti Au, tàng bàu Au, broq tiaq bàu Au, haq tìah ca cabô: ⁴⁸ Mangai aih tìah ca mòiq ngai broq hnem, chìa trom jrang trùh hmu, broq xàn enh 'nhèq ca xèm hmu. Jò diac làn ðeh trùh glàm hnem aih, haq ùh jah ra'nhùn hnem aih, taiq haq khoi jah broq cajap. ⁴⁹ Mahaq mangai leq tàng bàu Au ma ùh broq tiaq, haq tìah ca mòiq ngai tau broq hnem ta taneh, ùh i xèm hmu. Diac ðeh glàm hnem aih. Tajòì 'mòì haq tacro raliang đac càn ðìq jaq.”

7

*Đoìq Trùng ỏi ta Ca-bê-na-um
(Mat 8:5-13)*

¹ Khoi ca Chuaq Jêxu hnài òiq bàu aih am ca mangai pajùm tàng, Haq mùt phôq Ca-bê-nam. ² I mòiq ngai hapǒng da òoig truang ma haq loq waq, ùh hróc ten cachit. ³ Tàng wì doi i Chuaq Jêxu, haq thê wì craq broq gàu Yothaiq lam xin Chuaq broq brêh am ca hapǒng haq. ⁴ Wì lam truh ti Chuaq Jêxu xin Haq, doi: “Đòiq truang cô đang ca Thài jùp òò, ⁵ taiq haq loq waq ca jàn bèn, wa khoi broq hnem tagop am ca nhèn.” ⁶ 'Màng aih, Chuaq Jêxu lam ti wì.

Jò Haq ten truh hnem, òoig truang thê dèh bua lam doi ca Chuaq Jêxu: “Chuaq ôi, ùh enh pangài ca Chuaq hòm, ma jah 'màng aih au ùh tajì ca òoig Chuaq mùt dèh ta hnem. ⁷ Au hadai hnoq òòdèh ùh tajì òoig truh ta ìh. Xin ìh capoch mòiq nà, èh hapǒng au jah brêh. ⁸ Ma jah 'màng aih au hadai loq iu bàu wì enh 'nhèq ca au. Au hadai i linh loq iu bàu au. Au thê mangai cô: ‘Lam beq!’ Haq lam. Au thê mòiq ngai ma 'noi:q: ‘Thia beq!’ Haq thia. Au doi ca hapǒng au: ‘Broq bìac cô beq!’ Haq broq.”

⁹ Jò Chuaq Jêxu tàng 'màng aih, Haq hamàih ta manoh, tawìh hlài doi ca wì ma tiaq Haq: “Au doi ca pì bàu joq 'nàng. Òi ta Is-ra-ên, Au 'nhòq lah hnoq mòiq ngai leq ma i manoh lùì 'màng cô.” ¹⁰ Wì bua òoig truang hlài ta hnem hnoq hapǒng aih khoi brêh.

Mangai Gu Radam òi Na-in

¹¹ Hì atiq ca aih, Chuaq Jêxu mùt ta mòiq phôq hiniq Na-in. 'Bàì mangai hóc tiaq Haq wa mòiq lù mangai pajùm bàc lam tiaq Haq. ¹² Jò Haq truh haten ca ngo phôq, hnoq wì tòng 'noh

mangai cachit, aih con calô mòiq da mangai cadrî hadrô. Bâc ngai ta phôq lam tiaq haq. ¹³ Jò Chuaq hnoq, Haq xa-öch ca haq doi: “Apaq hmoi!”

¹⁴ Khoi èh, Haq lam haten bèq hom. Wì ma tòng hom yòng. Haq doi: “Ôi mangai gu radam, Au thê ìh ha'ngui!” ¹⁵ Mangai ma cachit aih tajòì 'mòi ha'ngui, èh capoch tùang, hi khoi Chuaq Jêxu am haq da miq haq.

¹⁶ Mangai leq ji crê yùq, manè Boc Plình doi: “I mangai capoch thai Boc Plình càn, khoi mahno yòng ta'ne bèn. Boc Plình khoi trùh hmàih dèh ca con jàn Haq.” ¹⁷ Biac cô anoi jàp ca cròng Judia, wa cròng wawenh ca aih.

Bàu Bòch da Jon (Mat 11:2-19)

¹⁸ Wì mangai hõc tiaq Jon anoi hlài ca haq dìq ca biac aih. ¹⁹ Jon creò ca mangai hõc tiaq haq baiq ngai, thê wa lam trùh ta Chuaq Jêxu bòch: “Ìh joq Mangai nhèn ma ngèh ca trùh ùh, loq nhèn ep gòm Mangai ma 'noiq hòm?”

²⁰ Wa baiq ngai lam trùh ta Chuaq Jêxu wa doi: “Jon thê ma lam bòch: ‘Ìh joq Mangai nhèn ma ngèh ca trùh ùh, loq nhèn ep gòm Mangai ma 'noiq?’ ”

²¹ Wop jò aih, Chuaq Jêxu broq brêh ca bàc mangai ùh hřc crài ca dabau, hnan đac can kiac enh mangai, wa broq ca mangai ùh xao jah hnoq. ²² Chuaq Jêxu tèò wa: “Hlài beq, anoi ca Jon loq biac chõp khoi hnoq, khoi tàng: Mangai ùh xao jah hnoq, mangai cwê jah lam, mangai bacùn jah brêh, mangai clich jah tàng, mangai cachit jah

rìh hlài wa mangai pa jah tàng Bàu Lem. ²³ Xôq ramöt ca mangai leq ùh cađac manoh lúi taiq Au.”

²⁴ Jò wa mangai hỏc tiaq Jon khoi lam, Chuaq Jêxu anoi biac Jon am ca mangai pajùm tàng: “Pì lam enh ngan cleq nòi ðùng hawit? Ngan long drê 'bìq cayeo hlôi ra'nhùn 'mòh? ²⁵ Èh pì lam ngan cleq hòm? Pì ngan mangai caxùnh eo rahù 'mòh? Tau mangai caxùnh eo rahù caq òi nòi xùang, haq òi ta hnem bùa! ²⁶ Mahaq pì lam ngan cleq hòm? Chaq mangai capoch thai Boc Plình ùh xài? Joq, Au doi ca pì, haq yi hnao ca mangai capoch thai Boc Plình. ²⁷ Ta Sech Hadròih khoi achìh biac haq 'màng cô:

“ ‘Cô, Au the hapỏng Au trùh adroi Ìh,
haq jah padon trong am ca Ìh.’[☆]

²⁸ Au doi ca pì, ðìq ca con mangai gu cadrì ma xa-ông 'noh, ùh i cabô yi càn ca Jon 'Baptit, mahaq ta Diac Boc Plình, mangai 'yoh ðìq jaq, haq xôq yi càn ca Jon.”

²⁹ ðìq ca mangai pajùm wa mangai gop thèq chiuq Jon 'baptem, wì doi trong Boc Plình aih ta-atoq. ³⁰ Mahaq mangai Pha-ri-si wa thài ranenh, taiq wì ùh chiuq 'baptem da Jon, wì haq khoi chòiq đac biac manoh Boc Plình ma enh ca wì haq.

³¹ Chuaq Jêxu doi: “Au aliah wì da 'nhòng cô tìah ca cabô? ³² Wì tìah ca con 'yoh ha'ngui ta chòq, doi ca dabau:

“ ‘Nhèn khoi hlôi taliaq,
gleq pì ùh nhaiq muaq?

☆ 7:27 7:27 Mal 3:1.

Nhèn khoi ta-oih,
gleq pì ùh hmoi?’

³³ Taiq Jon 'Baptit trùh, ùh caq 'benh, ùh ôq alac, pì doi: 'Haq i kiac òi ta chac.' ³⁴ Con Mangai trùh, caq ôq, pì doi: 'Haq Mangai ham ca caq, ham ca ôq, broq bua ca mangai gop thèq wa mangai dù.' ³⁵ Mahaq bìac khôn rabiaq jah dìq dõng ca con caiq Haq patô 'noh lem troq.”

Mangai Cadrì i Tôiq Jah Baxõng

³⁶ I mòiç ngai, mangai Pha-ri-si adràc Chuaq Jêxu mùt ta hnem haq, caq pua. Jò khoi mùt ta hnem mangai Pha-ri-si, Chuaq ha'ngui. ³⁷ Òi ta phòq aih, i mòiç ngai gu cadrì manhài trài, tàng doi i Chuaq Jêxu 'nang ha'ngui caq ta hnem mangai Pha-ri-si. Haq 'ràng mòiç toq cabi nõc taboc bình dầu xua thùm. ³⁸ Haq yòng enh cloh nõi jènh Chuaq Jêxu, haq hmoi. Jò loh diac mat catõh ta jènh Chuaq, haq yõc dèh xàc gàu, xùt jènh Chuaq; hip jènh Chuaq, hi khoi xùt dầu xua thùm ta jènh Chuaq.

³⁹ Mangai Pha-ri-si ma khoi adràc Chuaq Jêxu hnoq 'màng aih; haq hèm ta manoh: Mangai cô, tàng Haq joq mangai capoch thai Boc Plình, Haq hadai loq ca gu cadrì cô manhài trài.

⁴⁰ Chuaq Jêxu doi bàu ca haq: “Ô Simôn, Au i toq 'biaq bàu enh anoi ca ìh.”

Haq tèo: “Thài ôi, doi beq.”

⁴¹ “I mòiç ngai aih, i baiq ngai pòq dòih haq: Mòiç ngai pòq 500 ðê-na-ri, mòiç ngai pòq 50. ⁴² Wa baiq ngai aih dìq ùh i ca cleq ca'naih dòih, taiq 'màng aih haq cađac ca wa dòih aih. Ta wa baiq ngai aih, mangai leq loq waq ca haq yi bàc?”

⁴³ Simôn tèo: “Au doi, mangai ma khi jah cađac ca haq yi bəc aih.”

Chuaq Jêxu doi: “Ìh doi khi troq.”

⁴⁴ Khi èh, Haq tawìh ta gu cadrì, Haq doi: “Ìh hnoq mangai cadrì cò ùh? Au mùt hnem ìh, ìh ùh am diac Au 'nheo jènh, mahaq haq khi yəc diac mat 'nheo jènh Au; yəc dèh xəc gàu xùt.

⁴⁵ Ìh ùh hìp Au, mahaq enh jò mùt hnem ìh, haq hìp yòt jènh Au. ⁴⁶ Ìh ùh xùt dàu ta gàu Au, mahaq haq yəc dàu thùm xùt ta jènh Au.

⁴⁷ 'Màng aih au doi ca ìh: Tôiq mangai cadrì cò bəc, mahaq khi jah baxống ðìq đống, ma jah 'màng aih haq khi loq waq bəc, mahaq cabò khi jah baxống 'biaq, haq loq waq 'biaq.”

⁴⁸ Haq doi ca gu cadrì: “Tôiq ìh khi baxống.”

⁴⁹ Wì ma ha'ngui caq pua ti Haq, hèm ta manoh: “Mangai cò Cabò, ma i cwìang baxống tôiq?”

⁵⁰ Mahaq Haq doi ca gu cadrì aih: “Manoh lùì ìh khi dèch ìh; lam catèm beq.”

8

Bàu Aliah Mangai rai Adrech

¹ Atìq ca aih, Chuaq Jêxu lam enh phòq cò trùh phòq tau, enh gùng cò trùh gùng 'noiq, anoi hnài Bàu Lem da Diac Boc Plình. ² I 12 ngai, mangai həc tiaq òi ti Haq. Hadai i mangai cadrì tiaq haq, aih 'bài mangai khi jah Haq hnan đac kiac dù wa khi jah brèh ca ùh hrəc: Mari, aih Ma-đò-len, enh chac haq Chuaq khi hnan đac tapèh toq kiac dù, ³ Jò-an-na, mai Chuxa, mangai ma wèq biac hnem Bàu Hêrôt, Su-sa-na wa bəc ngai

ma 'noiq. Wì yǒc dahwèq dađeh jùp ðò Chuaq wa mangai hǒc tiaq Haq.

Aliah Mangai Rai Adrech
(*Mat 13:1-23; Mǒc 4:1-20*)

⁴ Jò bàc ngai tagop ta aih, wa wì mangai enh bàc phòq trùh ta Haq, Haq yǒc bàu aliah hnài wì, doi: ⁵ “I mòiq ngai loh lam rai adrech. Jò haq rai i adrech clih ti trong 'bìq jòiq đac, èh chìm trù caq ðiq. ⁶ Mòiq 'nah clih ǒi ti hmu raga. Jò bu hon, tajòì 'mòì hǒnh đac, ma jah 'màng aih ùh i ca hòì diac. ⁷ Mòiq 'nah clih ǒi ta nòì hila. Adrech plòh pajùm ti hila, broq ca adrech aih ùh jah càn. ⁸ I mòiq 'nah clih ǒi ti nòì taneh jàng. Haq hon wa yòng càn, loh pli, mòiq loh mòiq hrinh.”

Jò anoi bàu aih, Chuaq creò bàu dèh doi: “Mangai leq i don, tamàng beq!”

⁹ Mangai hǒc tiaq bòch Haq bàu aliah aih doi cleq. ¹⁰ Haq tèò: “Khoi am ca pì jah loq biac halac haluài da Diac Boc Plinh, mahaq wì ma 'noiq, am ca wì tàng bàu patiah
“ ‘đòiq wì ngan mahaq ùh hnoq, tàng mahaq ùh loq 'nì cleq.’[☆]

¹¹ “Cò, bàu aliah aih 'màng cò: Adrech aih bàu Boc Plinh. ¹² Adrech ma clih ǒi ti trong, aih wì ma khoi tàng bàu Boc Plinh; khoi èh can kiac Satan lam atùng yǒc bàu aih khoi ca manoh wì ðòiq wì haq ùh lùì wa ùh jah dèch. ¹³ Adrech clih ǒi nòì raga, aih wì ma lem bùì tamàng bàu Chuaq, mahaq ùh mùt jrùq ðòiq i riah. Wì tiaq Chuaq ùh dùnh. Jò glàm biac 'bàt thù trùh, wì

[☆] **8:10** 8:10 Êsai 6:9.

haq cađac Chuaq. ¹⁴ Adrech clih nòi hila, aih wì ma tamàng bàu Chuaq, èh lam tiaq, mahaq taiq wì lo hrìn biac òi crống taneh cô, biac padrống can, biac baxùang dađeh, broq ca bàu Chuaq ta manoh wì haq ùh jah càn, ùh loh plì. ¹⁵ Mahaq adrech ma clih nòi taneh jiang, aih mangai yỏc manoh joq 'nàng tamàng bàu Chuaq, wẻq bàu aih ta manoh; xam manoh cajap jah loh plì.

Aliah Can 'Nghah
(Mỏc 4:21-25)

¹⁶ “Ùh i cabô bủn đẹn, khoi èh yỏc thùng gủp đac, loq đòiq enh ca'nàm jùang, mahaq đòiq nòi ha'nhẻq, xreo 'nghah đìq ca mangai trom hnem. ¹⁷ Ùh i ca biac hẻp leq ma ùh jah paro. Ùh i ca biac cleq cadoc ma ùh jah patô. ¹⁸ 'Màng aih, pì ep rabiaq biac ma pì tàng, ma jah 'màng aih, mangai khoi i, jah am tam, mangai ùh i, jah yỏc hloi biac haq ma hẻm dađeh khoi i.”

Miq wa Oh Chuaq Jẻxu
(Mat 12:46-50; Mỏc 3:31-35)

¹⁹ Miq wa oh Chuaq chaq Haq, mahaq taiq mangai bẻc hrìn, ùh jah trủh haten ca Haq. ²⁰ 'Màng aih i mangai doi ca Haq loq: “Miq wa 'bài oh Ìh òi enh gùng, enh glàm Ìh.”

²¹ Mahaq, Haq tẻo: “Miq Au wa oh Au, aih mangai tàng bàu Boc Plình, hi khoi, broq tiaq bàu aih.”

Bahùt
(Mat 8:23-27; Mỏc 4:35-41)

²² I mòiq hì, Chuaq Jẻxu tỏc ta bong dẻh ti 'bài mangai hỏc tiaq, Haq doi: “Bẻn cwa pah tau

beq.” Hi khoi wì lam. ²³ Jò bong 'nang cadàu, Haq cùi. I bahùt trùh ta diac, 'nang dìq jaq yat.

²⁴ Mangai hõc tiaq trùh padriu Haq doi: “Thài ôi! Thài ôi! Bèn cachit!”

Haq rìu yòng, lech cayeo wa diac lai laq phai hatenh. Tajòi 'mòi cayeo hatenh wa diac pi lai laq hòm. ²⁵ Haq doi ca mangai hõc tiaq: “Manoh lùì pì ta leq?”

Mangai hõc tiaq yùq rai hamaih, bòch dabau: “Mangai cô Cabô, cayeo wa diac ma dì tiaq bàu Haq?”

*Mangai ỏi ta Jê-ra-sê Jah Brêh
(Mat 8:28-34; Mõc 5:1-20)*

²⁶ Khoi ca aih, wì chùng bong trùh ta gùng Jê-ra-sê, ta jang ca gùng Ga-li-lê. ²⁷ Jò Chuaq Jêxu tõi ta 'bò, i mòiq ngai ỏi ta phòq aih i kiac ỏi ta chac, haq lam trùh ta Chuaq. Khoi dùnh mangai cô ùh caxùnh eo, ùh ỏi ta hnem, mahaq haq ỏi toq nòi cadràng hanang. ²⁸ Bu hnoq Chuaq Jêxu, haq cachech bàu dêh, pacro dađeh tì jènh Chuaq, haq doi: “Waiq Chuaq Jêxu, Con Boc Pình ma ha'nhèq dìq jaq, au wa Ìh i biac cleq? Xìn Ìh apaq broq au jìq xa.” ²⁹ Ma jah 'màng aih Chuaq Jêxu khoi thê can kiac loh khoi enh haq. Mangai cô khoi bàc yàng kiac rùp haq, 'nhac ca wì gòm haq, cật jènh tì haq xam caxì mem tagwat, xôq haq goh đac. Kiác dù 'ràng haq mùt nòi đùng wang wê.

³⁰ Chuaq Jêxu bòch haq: “Gè hiniq cleq?”

Haq tèo: “Hiniq au Lình Cràm!” Ma jah 'màng aih i kiac bàc mùt ỏi ta haq.

³¹ Can kiac chang xìn yôt Chuaq Jêxu, apaq ca'nih wì haq ta hàm jrùq.

³² Jò aih i mòiq calùh chùà 'nang acaq ti cachình criang. Wì xìn Chuaq Jêxu ca'naih wì mùt ta chùà. Chuaq broq tiaq bàu wì. ³³ Dìq ca can kiac aih loh khoi enh mangai, mùt ta chùà. Chùà cadàu enh bôì wang hadrúc ta diac cram cachìt dõng.

³⁴ Wì mangai ma ban chùà, cadàu mot, anoi biác aih jàp ta phôq wa ta gùng aih. ³⁵ Bàc mangai loh ngan biác aih. Jò wì trùh ti Chuaq Jêxu, hnoq mangai ma can kiac neo loh khoi enh chac haq, ha'ngui òi ti jènh Chuaq Jêxu, caxùnh eo cwàn, manoh hèm khoi wìa lem, wì yùq crè òiq jaq. ³⁶ 'Bài mangai ma khoi hnoq biác halac aih, anoi hlài ca mangai 'noi q biác mangai ma can kiac rùp khoi jah brêh aih 'màng leq. ³⁷ Dìq ca mangai gùng Jê-ra-sê xìn Chuaq Jêxu lam khoi ca wì, ma jah 'màng aih wì crè hrìn. Haq tõi ta bong wìh hlài pah tau.

³⁸ Mahaq mangai ma khoi claih enh can kiac, xìn lam tiaq Chuaq Jêxu. Mahaq Chuaq Jêxu thé haq hlài, òi: ³⁹ "Hlài ta hnem ìh beq. Anoi hlài rìm biác Boc Plình khoi broq am ca ìh." 'Màng aih, haq lam anoi hlài rìm biác Boc Plình khoi broq am ca haq, jàp ca phôq.

*Con Cadri Jairu wa Gu Cadri ùh Hrõc
(Mat 9:18-26; Mõc 5:21-43)*

⁴⁰ Jò Chuaq Jêxu hlài, i bàc ngai gòm òiq yõc Haq, ma jah 'màng aih mangai leq ji gòm Haq.

⁴¹ I mangai craq hnem tagop, hiniq haq Jairu, trùh hacùn cràng enh ngìa Chuaq Jêxu, xìn haq

mùt dèh ta hnem. ⁴² Ma jah 'màng aih haq i dèh mòiq toq con cadrì 12 hanam, ten cachìt.

Jò Chuaq Jêxu 'nang lam ti trong, i bàc ngai diq jaq enh pôn pah hnen Haq. ⁴³ Jò aih, i mòiq ngai gu cadrì ùh hróc loh mahem khoi 12 hanam. Haq khoi yam bàc 'bac trùh ta 'bacsì sì leq xôq ùh brêh. ⁴⁴ Haq lam enh cloh bèq ha'mai eo Chuaq Jêxu. Tajòì 'mòì mahem haq xòt.

⁴⁵ Chuaq Jêxu bòch: “Cabô ma bèq Au?”

Ma leq xôq doi ùh 'nì. Pêtrô wa bua haq doi: “Thài ôi, mangai bàc 'màng cô hnen Ìh wa Ìh bòch: Cabô ma bèq Au!”

⁴⁶ Mahaq Chuaq Jêxu doi: “I mangai khoi bèq Au, ma jah 'màng aih au mòn i cwìang itai loh enh Au.”

⁴⁷ Con cadrì aih tàng dađeh pi jah cadoc. Haq yùq crè tarìt, trùh hacùn cràng ajènh Chuaq, anoi dèh biac hagleq haq ma bèq Chuaq, wa 'màng leq haq khoi jah brêh tajòì 'mòì. ⁴⁸ Mahaq Chuaq Jêxu doi: “Con cadrì ôi, manoh con ma lùì khoi broq brêh ca con. Catèm ca con, lam beq.”

⁴⁹ Haq òi capoch, i craq hnem tagop trùh doi ca Jairu: “Hêq! Con cadrì ìh khoi cachìt. Apaq pangài ca Thài hòm.”

⁵⁰ Mahaq Chuaq Jêxu tàng 'màng aih, doi ca Jairu: “Apaq yùq, canòm ma joq 'nàng, con ìh jah brêh.”

⁵¹ Jò wì trùh hnem, Haq toq am ca Pêtrô, Jacò, Jon, wa miq baq con mangai aih mùt ti Haq. ⁵² Diq ca wì òi ta hnem ta-oih ca con mangai aih. Mahaq Chuaq Jêxu doi: “Apaq hmoi. Con mangai cô ùh cachìt, haq cùi.”

⁵³ Wì do halê Chuaq, ma jah 'màng aih wì loq con mangai aih khoi cachit. ⁵⁴ Mahaq Chuaq Jêxu rúp tì con mangai aih, doi bàu dêh: “Con cadrì ôi, yòng beq!” ⁵⁵ Mahua yang mùt hlài ta chac haq wa haq tajòi 'mòi yòng ha'ngui. Chuaq Jêxu thê am ca con 'yoh aih acaq. ⁵⁶ Miq baq con 'yoh cô hamàih ta manoh òiq jaq, mahaq Chuaq Jêxu ùh thê anoi hlài ca wì loq ca bìac aih.

9

Chuaq Jêxu Thê Mòi q Jàt Baiq Ngai Lam (*Mat 10:5-15; 14:1-12; Mõc 6:7-29*)

¹ Khoi èh Chuaq Jêxu creo ca 12 ngai sùq đô, Haq am ca wì cwìang itai òòiq ta'blêq wa hnan òiq can kiac wa broq brêh ca mangai ùh hróc. ² Haq thê wì loh lam hnài bìac Diac Boc Plình wa broq brêh ca mangai ùh hróc. ³ Haq tanap ca wì: “Jò pì lam tì trong, apaq wê cleq; long canhra, 'bao, 'benh, 'bac wa ji apaq 'ràng eo baiq blah. ⁴ Jò pì mùt hnem leq, òi hnem aih trùh jò pì lam. ⁵ Phòq leq ùh pachùh pì mùt, pì loh khoi enh phòq aih, hapùih blo top ta jèn h, aih broq teo tajraq hlài ca wì.” ⁶ Khoi èh, 'bài sùq đô loh lam enh phòq cô trùh phòq tau, hnài Bàu Lem jàp crông broq brêh ca mangai ùh hróc.

Bìac Bùa Hêrôt Yùq Crè

⁷ Bùa Hêrôt tàng òiq ca bìac Chuaq Jêxu ma broq, Haq hamàih ta manoh, ma jah 'màng aih i mangai doi: “Cô Jon khoi rìh hlài enh mangai cachit.” ⁸ Mangai 'noi q doi: “Êli khoi mahno loh.” Mangai ma 'noi q hò m doi: “Wì mangai capoch thài Boc Plình calah nèh khoi rìh hlài.”

⁹ Bùa Hêrôt doi: “Jon, au khoi thê pốt gàu haq. Mangai cô raq ma broq biac aih!” Bùa chaq trong hnoq Chuaq Jêxu.

*Chuaq Jêxu Broq 'Benh Loh Bâc
(Mat 14:13-21; Mốc 6:30-44; Jon 6:1-14)*

¹⁰ Jò wì sùq đô da Chuaq Jêxu hlài, wì anoi hlài biac wì ma khoi broq. Chuaq 'nong wì haq lam lah ti Haq trùh haten ca phòq 'Bêt-sai-đa.

¹¹ Mahaq wì mangai pajùm loq 'màng aih. Wì tiaq Haq. Haq lem bùi đìh yốc wì, hnài wì biac Diac Boc Plình, broq brêh am ca bàc ngai ùh hrốc.

¹² Jò ten xèq, mangai hốc tiaq lam trùh haten ca Haq doi: “Xìn Ìh am wì hlài đòiq wì mùt ta plài wa chaq hloi dahwèq caq, ma jah 'màng aih ỏi ta cô nòi hawit.”

¹³ Mahaq Chuaq Jêxu doi: “Pì raq phai am ca wì dahwèq caq.”

Wì sùq đô tèo Haq: “Tàng ùh lam rốt òn, bèn ỏi i padam toq 'benh wa baiq pliang ca raq.” ¹⁴ I 5.000 ngai gu calô ỏi ta aih.

Mahaq Chuaq doi ca mangai hốc tiaq: “Thê wì ha'ngui tang lù, mòi q lù 50 ngai.” ¹⁵ Mangai hốc tiaq broq tiaq bàu Haq, thê wì ha'ngui òiq đống.

¹⁶ Khoi èh, Chuaq Jêxu yốc padam toq 'benh wa baiq pliang ca, ngoi ngan ta plình, manè pôi, hi khoi hich am ca mangai hốc tiaq axong ca wì mangai pajùm. ¹⁷ Òiq ca wì caq panàc. Wì tóch hlài rah ma ha'nech jah 12 rajo.

*Pêtrô Pa'noh Chuaq Jêxu, Haq Crich
(Mat 16:13-19; Mốc 8:27-29)*

18 I mòiq hì aih, 'nang jò Chuaq waiq khàn mòiq ngai, 'bài mangai hõc tiaq tagop òi wawenh ca Haq. Haq bòch wì: “ 'Bài jàn doi Au Cabô?”

19 Mangai hõc tiaq tèo: “Wì mangai cô doi: Jon 'Baptit. Mangai tau doi: Êli. Mangai 'noiq doi: Mangai capoch thai Boc Plình calah nèh ma khoi rìh hlài.”

20 Haq bòch hòm: “Pì doi Au Cabô?”

Pêtrô doi: “Ìh Crich da Boc Plình.”

21 Chuaq Jêxu ùh am mangai hõc tiaq Haq anoi hlài biac aih ca mangai 'noiq. 22 Haq doi tam ca wì: “Con Mangai phai chiùq nan xa. Wì craq broq gàu Yothaiq, wì pajàu càn, wì thài ranenh jah gít ca Haq, jêh cađac Haq, hì piq Haq rìh hlài.”

23 Khoi èh, Haq doi ca wì: “Tàng enh tiaq Au, phai cađac dađeh; rìm hì xùi dèh long pagat lam tiaq Au. 24 Ma jah 'màng aih cabô enh dèch dèch can rìh, jah hnhung, mahaq mangai leq cađac dèh can rìh taiq tiaq Au, haq jah rìh. 25 Tàng mangai leq jah òiq ca crõng taneh cô, mahaq hù hnhung dèh mahua yiang, jah i lòiq cleq? 26 Tàng mangai leq camaih ca Au wa bàu Au, èh Con Mangai hadai jah camaih ca haq, jò Haq òi ti can 'ngah 'ngai cla Haq, Baq Haq, wa 'bình plình lam trùh.

27 “Au doi ca pì bàu joq 'nàng: I mòiq 'nah mangai òi ta pì 'nang yòng jang cô ùh cachit adroi jò wì 'nhòq hnoq Diac Boc Plình.”

*Biac Chuaq Halih 'Mù
(Mat 17:1-8; Mõc 9:2-8)*

²⁸ Rahem hì atìq ca Haq ma capoch bàu aih, Chuaq Jêxu 'nong Pêtrô, Jacò wa Jon lam ti Haq tồc ta wang waiq khàn. ²⁹ 'Nang jò waiq khàn, chac hamac Haq loh ca crài, eo Haq loh taboc camla. ³⁰ Wop jò aih, i baiq ngai capoch tùang ca Haq, aih Môise wa Êli, ³¹ mahno ôi ti 'ngah 'ngai, anoi biac Chuaq chiuq cachit, wa biac Haq padon broq gêh ta Jê-ru-sa-lem. ³² Pêtrô wa bua haq enh cùi dìq jaq, mahaq jò hnoq can 'ngah 'ngai Chuaq Jêxu wa baiq ngai yòng haten ca Haq, wì prau hlài. ³³ Jò wa aih lam khoi ca Chuaq Jêxu, Pêtrô doi ca Chuaq Jêxu: “Thài, bèn ôi ta cô lem dìq jaq, beq bèn broq piq toq traiq, mòi q toq ca Thài, mòi q toq ca Môise, mòi q toq am ca Êli.” Ma jah 'màng aih Pêtrô ùh 'nì ca dađeh anoi cleq.

³⁴ Jò Pêtrô 'nang anoi, i cato yùc trùh lom wì haq. Wì haq loh ca yùq crè. ³⁵ Jò aih, i bàu enh yùc doi: “Cô Con Calô Au ma Au loq waq, phai tàng bàu Haq!” ³⁶ Jò bàu anoi aih loh, Chuaq Jêxu ôi mòi q Ngai raq. Ta 'bài hì aih, mangai hỏc tiaq ôi haten, ùh anoi ca mangai leq biac wì khoi hnoq.

*Chuaq Jêxu Hnan Can Kiac Enh Con Calô
(Mat 17:14-18,22-23; Mỏc 9:14-27,30-32)*

³⁷ Hì atìq, jò Chuaq wa mangai hỏc tiaq Haq loh enh wang, i bacc ngai khoi gòm. ³⁸ I mòi q ngai ôi ta wì ma bacc, creo bàu dêh doi: “Thài ôi, xìn xa-ỏch ca con calô au, ma jah 'màng aih au i dêh mòi q toq haq raq. ³⁹ Can kiac ma ôi ta chac haq, cachech bàu dêh. Kiac aih ranhùq haq, broq haq loh diac hai camùh hacùng, broq chac

hamac haq loh habau, men loh khoi. ⁴⁰ Au khoi xìn mangai hõc tiaq ìh hnan kiac aih, mahaq wì hnan ùh jah.”

⁴¹ Chuaq Jêxu tèo: “Ô xinoi ùh i manoh lùì wa manhài trài tau! Au òi ti pì, àt ca pì, trùh jò leq? 'Ràng con ìh jang cô beq.”

⁴² Con calô aih 'nang trùh haten, kiac rapàt haq tacro ta taneh, ranhùq haq. Mahaq Chuaq Jêxu lech thê kiac loh khoi. Haq broq brêh ca con 'yoh aih, am hlài da baq haq. ⁴³ Dìq ca wì hamàih bìac cwàng itai Boc Plính.

Chuaq Jêxu Anoi Adroi Bìac Haq Cachit

Jò wì 'nang manè bìac Chuaq Jêxu broq, Haq doi dèh ca mangai hõc tiaq: ⁴⁴ “Pì phai tamàng bàu Au doi adroi ca pì cô: Cô èh wì rùp Con Mangai 'mùt ta tì mangai dù.” ⁴⁵ Mahaq mangai hõc tiaq Haq ùh 'nì tàng bàu aih doi cleq, ma jah 'màng aih bìac aih khoi cadoc òiòiq wì ùh jah loq, ùh jah 'nì i hiniq cleq. Wì crè, ùh hùa bòch Chuaq bàu aih doi leq.

Mangai Leq ma Yi Càn

(Mat 18:1-5; Mõc 9:33-40)

⁴⁶ Bòi mangai hõc tiaq ta rahen ca dabau chaq ta'ne dìq ca wì, cabô ma yi càn dõng. ⁴⁷ Mahaq Chuaq Jêxu loq ca manoh wì. Haq yõc mòiq ngai con 'yoh òiòiq haten ca Haq. ⁴⁸ Haq doi: “Mangai leq nhò hiniq Au òiò yõc con 'yoh cô, aih khoi òiò yõc Au. Mangai leq òiò yõc Au, aih òiò yõc Haq ma thê Au trùh. Ma jah 'màng aih dìq ca pì ma leq ma yi ùh nèn dìq jaq, aih mangai càn joq 'nàng.”

⁴⁹ Jon tèo doi: “Thài ôi, nhèn hnoq wì mangai canòm hiniq Ìh hnan can kiac. Nhèn khoi tàt wì broq, ma jah 'màng aih wì ùh i tiaq bèn.”

⁵⁰ Mahaq Chuaq Jêxu doi: “Apaq tàt wì, ma jah 'màng aih mangai leq ùh tajraq hlài ca pì, aih hatroq ca pì.”

Chuaq Jêxu Trùh Gùng Sa-ma-ri

⁵¹ Ten trùh jò Chuaq Jêxu lam khoi ca crõng taneh. Haq tình joq 'nàng lam Jê-ru-sa-lem.

⁵² Haq thê mangai hõc tiaq lam adroi. Wì loh lam, mùt ta hnem mòiq plài da mangai Sa-ma-ri, padon hnem padài am ca Haq. ⁵³ Mahaq mangai Sa-ma-ri ùh pachùh Haq mùt, ma jah 'màng aih taiq Haq khoi dì ca tõi phòq Jê-ru-sa-lem. ⁵⁴ Jacò

wa Jon hnoq 'màng aih, doi: “Chuaq ôi, Ìh enh ma thê ùnh enh plình loh bùh cađac wì ùh?”

⁵⁵ Mahaq Chuaq Jêxu tawìh hlài lech ca wa, doi: “Chõp ùh 'nì yiang leq ta manoh ma xùiq chõp”.

⁵⁶ Khoi èh, Haq wa mangai hõc tiaq lam cwa trùh plài 'noiç.

Khòh Broq 'Màng Leq Đòiç Tiaq Chuaq Jêxu (Mat 8:19-22)

⁵⁷ Jò 'nang lam ti trong, i mangai doi: “Chuaq lam ta leq, au tiaq ta aih.”

⁵⁸ Chuaq Jêxu tèo: “Chôn i trom, chìm i pù, mahaq Con Mangai ùh i ca nõi angèn gàu.”

⁵⁹ Haq doi ca mangai 'noiç: “Ìh lam tiaq Au beq.”

Mangai aih tèo: “Xìn gòm au lam catùh dèh baq hòiq.”

⁶⁰ Mahaq Chuaq Jêxu doi ca haq: “Đòiq mangai cachit catùh mangai cachit. Ìh phai lam hnài biac Diac Boc Plinh beq!”

⁶¹ I mangai ma 'noi q hòm, bòch: “Waiq Chuaq, au lam tiaq Ìh mahaq gòm au hlài hangah dèh ca mangai hnem au hòiq.”

⁶² Chuaq Jêxu doi ca haq: “Mangai leq khoi rùp long cai, mahaq òi hwi ngan enh cloh, mangai aih ùh đàng ca patìh biac Diac Boc Plinh.”

10

Tapèh Jàt Ngai Loh Lam Anoi Hnài

¹ Atiq ca aih, Chuaq ràih 70 ngai, mangai hõc tiaq 'noi q, thê wì loh lam mòiq trong baiq ngai lam adroi ca Haq, trùh rìm phòq wa nòi Haq ma padon lam. ² Haq doi ca wì: “'Mau dùm khoi bàc, mahaq mangai gat 'biaq, 'màng aih phai xìn cla craq ma i 'mau dùm, thê tam mangai gat trùh. ³ Lam beq! Cô, Au thê pì lam tiàh ca trìu con òi ta'ne calùh coq yiang. ⁴ Apa q wê 'bayôp, 'bao, jai. Hadai apa q chao mangai leq ti trong.

⁵ “Jò pì mùt hnem leq, adroi dõng, pì doi: ‘Catèm am ca hnem cô!’ ⁶ Tàng hnem aih i mangai tajì ca jah can catèm, can catèm aih jah òi ti haq; tàng ùh, can catèm jah hlài òi ti cla pì. ⁷ Pì òi hnem aih, caq ôq dahwèq mangai hnem aih am ca pì. Ma jah 'màng aih mangai abroq tajì đòiq yõc dèh cùng cla wì. Apa q lam hnem cô tõi hnem tau.

⁸ “Jò pì mùt phòq leq, ma i mangai pachùh adràc pì mùt, dahwèq leq wì padon ca pì, pì caq.

⁹ Broq brèh ca mangai ùh hrõc òi phòq aih, wa

anoi ca wì: 'Diac Boc Plình khoi trùh haten ca pì.' ¹⁰ Mahaq jò pì mùt ta phòq leq ma wì ùh pachùh adràc pì mùt, pì loh lam òi ti trong, hi doi: ¹¹ 'Pì ngan cô: Nhèn hapùih blo ta phòq pì ma top ta jènh nhèn, aih broq teo tajraq hlài ca pì, mahaq pì phai loq, Diac Boc Plình khoi haten ca pì.' ¹² Au doi ca pì bàu joq 'nàng: Trùh hì ma lùch, phòq Sôđôm chiuq nan xa yi 'biaq ca phòq cô.

¹³ "Nan xa ca gè, phòq Cô-ra-xin! Nan xa ca gè, phòq 'Bê-t-sai-đa! Ma jah 'màng aih, tàng biac halac ma khoi broq am òi ta'ne pì, 'ràng broq ca phòq Tirò wa phòq Sidôn, baiq phòq aih khoi caxùnh eo briang, côi blo tanùh, cađac dèh manoh broq tôiq khoi dùnh. ¹⁴ 'Màng aih, trùh hì Boc Plình hadrah baxa, phòq Tirò wa phòq Sidôn chiuq nan xa yi 'biaq ca pì. ¹⁵ Gè, phòq Ca-bê-na-um jah dèch atóc gè trùh ta plình 'mòh? ùh òh! Mahaq jah ca'nih đac gè ta nòi cachit!

¹⁶ "Mangai leq tamàng pì, aih tamàng Au. Mangai leq cađac pì, aih cađac Au. Èh mangai leq cađac Au, aih cađac Baq Au ma thê Au trùh."

¹⁷ Tapèh jàt ngai, mangai hóc tiaq Haq hlài lem bùi, doi: "Waiq Chuaq, nhò hiniq Chuaq òiq ca can kiac ep iu bàu nhèn."

¹⁸ Chuaq Jêxu doi ca wì: "Au khoi hnoq kiac Satan cùh enh plình bu dàng camlet plình. ¹⁹ Cô, Au khoi am ca pì cwàng itai òòiq pì jôiq cađac bìh wa agôt enh 'neq ca jènh pì; ùh i cleq nui broq raliang ca pì. ²⁰ 'Màng aih paq lem bùi biac can kiac khoi iu pì, mahaq pì phai lem bùi taiq hiniq pì khoi achih òi ta Diac plình."

Chuaq Jêxu Bùì Manoh Dìq Jaq

²¹ Hadai jò aih, Chuaq Jêxu dìq jaq lem bùì ta Yiang Hadròih, Haq doi: “Waiq Baq, Au manè pôi Baq, Chuaq ma wèq plình crông taneh, ma jah 'màng aih Ìh khi cadoc biac cô ca mangai khôn rabiaq, mangai 'ngah manoh, òiđiq patô 'noh am ca wì 'yoh loq! Baq ôi, hi loq joq 'màng aih, ma jah 'màng aih taiq Ìh khi hnoq biac aih lem manoh Ìh.

²² “Baq Au khi am ca Au òiđiq ca biac. Enh gùng ca Baq, ùh i mangai leq loq ca Con aih cabô; enh gùng ca Con wa mangai leq ma Con enh mahno 'noh am, hadai ùh i mangai leq loq ca Baq aih Cabô.”

²³ Khi òh, Haq tawìh ngan mangai hóc tiaq doi ca wì: “Xôq ramõt am ca mat mangai leq jah hnoq biac pì hnoq! ²⁴ Ma jah 'màng aih Au doi ca pì: Bâc mangai capoch thai Boc Plình wa bâc bùa enh hnoq biac pì ma hnoq, mahaq ùh jah hnoq; enh tamàng biac pì ma tàng, mahaq ùh jah tàng.”

²⁵ I mòiq ngai thài ranenh yòng bôch Chuaq Jêxu òiđiq thù Haq doi: “Thài ôi, au phai broq cleq òiđiq jah can rih hloi hloi?”

²⁶ Chuaq Jêxu bôch: “Sech Ranenh khi achìh biac cleq? Ìh đóc cleq ta aih?”

²⁷ Haq tèò: “ Ìh phai òiđiq ca manoh, òiđiq ca mahua yiang, òiđiq ca padren, òiđiq ca manoh hêm, loq iu wa loq waq ca Chuaq, Haq Boc Plình ìh'✧;

✧ **10:27** 10:27 RAH 6:5.

wa 'loq waq ca mangai haten hatia ca ìh tìah ca loq waq cla dađeh.'☆"

²⁸ Chuaq Jêxu doi: "Ìh tèo diq jaq troq. Lam broq bìac aih beq, ìh jah rìh."

²⁹ Mahaq thài aih enh padèch dađeh, haq mangai ta-atoq. Haq bòch Chuaq Jêxu: "Cabô mangai haten hatia ca au?"

Mangai Sa-ma-ri Lem Manoh

³⁰ Chuaq Jêxu doi: "I mòiq ngai enh phòq Jê-ru-sa-lem loh phòq Jê-ri-cô, glàm mangai atùng. Wì yỏc diq ca cùng hang haq, jêh haq loh habau, khi òh, wì lam òòiq haq ỏi ti aih, hlàc hlai ten cachit. ³¹ Jò aih i mòiq ngai pajàu lam trong aih, hnoq mangai aih, haq wia lam hloi pah tau trong."

³² Khi òh i mòiq ngai, mangai Lêwi hadai lam trùh nòi aih, thia haten, ngan, khi òh, hadai wia lam hloi pah tau trong. ³³ Mahaq i mòiq ngai mangai Sa-ma-ri lam ti trong aih, thia trùh haten ca mangai aih, ngan mangai aih, òh haq i manoh loq xa-ỏch. ³⁴ Haq yỏc dàu wa alac xùt nòi ma habau. Khi òh cật hlài, dèch mangai aih enh crông lùa, haq 'ràng trùh hnem tamoi ỏi ò, hi wèq ban haq. ³⁵ Trùh hì atìq, am ca cla craq hnem tamoi ỏi ò baiq đê-na-ri, haq tanap: 'Wèq ngan mangai cô oq, tàng diq yi hnao ca cô, jò au hlài au ca'naih ò ìh.'

³⁶ "Ta piq ngai aih, ìh hèm mangai leq ma mangai haten hatia ca mangai wì ma atùng?"

³⁷ Thài ranenh tèo: "Aih mangai ma khi yỏc manoh xa-ỏch ca haq." Chuaq Jêxu doi: "Lam beq, broq tiaq 'màng aih!"

☆ **10:27** 10:27 Lêwi 19:18.

Mathê wa Mari

³⁸ Jò Chuaq Jêxu wa mangai hóc tiaq lam ti trong, trùh ta mòiq plài tau, i mangai cadri, hiniq haq Mathê, adràc Chuaq mùt dèh ta hnem.

³⁹ Haq i mòiq ngai oh cadri, hiniq Mari, ha'ngui ti jènh Chuaq Jêxu tamàng bàu Haq. ⁴⁰ Mahaq Mathê jiang broq bàc bìac patih, trùh doi ca Chuaq Jêxu: “Chuaq ôi, oh au òiôiq au broq mòiq ngai, Chuaq ma ùh hèm trùh 'mòh? Xìn thê haq wiang ti au.”

⁴¹ Chuaq tèo: “Ô Mathê, Mathê! Ìh chiùq lep wa lo broq bàc bìac, ⁴² mahaq toq i mòiq bìac raq ma nhet. Mari khoi ràih phàn ma lem, aih phàn ùh i cabô jah yóc!”

11*Bìac Waiq Khàn*

(Mat 6:9-13; 7:7-11)

¹ I mòiq hì, òi ta mòiq nòi, Chuaq Jêxu waiq khàn. Jò Haq waiq khàn khoi hêq, mòiq ngai, mangai hóc tiaq trùh doi: “Chuaq ôi, xìn Ìh hnài nhèn waiq khàn, 'màng ca Jon khoi hnài mangai hóc tiaq haq.”

² Chuaq Jêxu doi: “Jò pì waiq khàn, phai anoi 'màng cô:

“ ‘Waiq Baq,
xìn hiniq Baq jah hadròih.

Xìn Diac Baq jah trùh.

³ Xìn am ca nhèn dahwèq caq rìm hì.

⁴ Xìn baxǒng tôiq lôi nhèn,

'màng ca nhèn hadai baxǒng tôiq lôi wì ma broq tôiq ca nhèn.

Apaq 'ràng nhèn mùt ta nòi ma chiùq padô 'nùt.' ”

⁵ Khoi èh, Haq doi ca mangai hõc tiaq: “Tàng i mòiq ngai òi ta pì i bua 'ne mang trùh doi: ‘Ê ôi, am đồ ca au piq toq 'benh. ⁶ Ma jah 'màng aih bua au enh hàngai neo trùh. Au ùh i ca cleq am haq caq.’ ⁷ Mangai òi ta hnem padreo hlài bàu doi: ‘Apaq pangài ca au. 'Mang khoi clenh. Au wa con caiq au 'nang cùi, ùh jah yòng yõc 'benh am ca ìh.’ ⁸ Au doi ca pì, 'nhac ca mangai aih ùh yòng am 'benh, mahaq taiq bua haq xìn hrìn, èh haq xôq yòng am ca bua haq òiq ca bìac bua haq ma nhet.

⁹ “Au doi tam ca pì: Xìn beq, jah am. Chaq beq, jah hnoq. Clôq 'màng beq, 'màng jah tapèh am ca pì. ¹⁰ Ma jah 'màng aih, mangai leq xìn, haq jah nhàn. Mangai leq chaq, jah hnoq. Mangai leq clôq 'màng, jah pèh am.

¹¹ “Òiq ca pì i mangai leq broq baq, jò con bòch 'benh, haq am dèh ca con hmu, loq bòch ca, haq am bìh ùh? ¹² Bòch catap haq am agôt ùh? ¹³ 'Màng aih, tàng pì mangai 'mèq, ji loq am dèh ca con caiq bìac lem, ùh dùh dèh ca Baq pì òi ta Diac Plình ma ùh am ca pì Yiang Hadròih jò pì xìn Haq!”

*Wì Capoch Ha'nhèq ðùng ca Chuaq
(Mat 12:22-30,38-45; Mõc 3:20-27)*

¹⁴ Chuaq Jêxu hnan cađac mòiq toq kiac làu. Jò kiac aih loh khoi, mangai làu jah capoch. Òiq ca mangai pajùm hamàih. ¹⁵ Mahaq i bàc ngai doi: “Mangai cô nhò cwìang 'Bê-ên-xê-bun, bùa can kiac, ðòiq hnan đac can kiac.” ¹⁶ Mangai ma

'noiç hòm xìn Haq broq bìac halac loh enh plình òiç thù Haq.

¹⁷ Chuaq Jêxu loq manoh wì hèm. Haq doi: “Diac leq talah ca dabau, Diac aih jah raliang. Hnem leq talah ca dabau, hnem aih jah tacro. ¹⁸ 'Màng aih, tàng kiac Satan git ca cla, Diac aih broq 'màng leq ma jah òi? Ma jah 'màng aih pì doi, Au canòm cwìang 'Bê-ên-xê-bun hnan can kiac? ¹⁹ Tàng Au canòm cwìang 'Bê-ên-xê-bun hnan ðac kiac, èh con calô pì canòm ca cabô òiç hnan kiac? 'Màng aih wì haq jah hadrah pì. ²⁰ Mahaq tàng Au canòm tì da Boc Plình ma hnan ðac can kiac, aih Diac Boc Plình khi trùh ta nòi pì.

²¹ “Jò mòiq ngai mangai dêh padren wê ranac wèq dèh hnem, cùng hang haq cajap. ²² Mahaq jò i mòiq ngai yi dêh ca haq 'blêq haq, men jah yóc da haq ranac haq ma canòm, wa yóc hloi da haq cùng hang ðiq ðong.

²³ “Mangai leq ùh pajùm ca Au, mangai aih tajraq hlài ca Au. Mangai leq ùh mòiq manoh gop tì Au, mangai aih broq tac mac.

²⁴ “Jò can kiac dù loh khi enh chac mòiq ngai, haq lam mùt nòi croh crenh chaq nòi padài. Chaq ùh jah, haq hèm ta manoh, Au hlài ta hnem au ma neo loh. ²⁵ Haq hlài, hnoq hnem hwit khi hreo, mahaq ùh i cabô òi. ²⁶ Haq lam adràc tapèh toq kiac dù yi hnao ca haq, mùt òi ta hnem aih. 'Màng aih, chac mangai aih chiuq xalep bàc yi hnao ca adroi.”

²⁷ Chuaq Jêxu 'nang anoi bàu aih, i mòiq ngai gu cadrì òi ta'ne wì bàc ngai, dêh bàu manè:

“Xôq ramõt ca cliac mangai ma khoi wê Ìh, wa tòi ma khoi am Ìh ùq!”

²⁸ Chuaq Jêxu padreo hlài bàu doi: “Mangai leq tamàng, khoi èh wèq bàu Boc Plinh, i xôq ramõt yi hnao ca aih!”

²⁹ Jò wì mangai pajùm tagop bàc òiq jaq, Chuaq Jêxu doi: “Xinoi cô xinoi 'mèq manoh. Wì chaq teo halac, mahaq ùh jah am ca wì teo halac leq enh gùng ca teo halac Jôna. ³⁰ 'Màng ca Jôna broq teo halac am ca mangai phôq Ni-ni-we, hadai 'màng aih, Con Mangai broq teo halac am ca xinoi cô. ³¹ Trùh hì hadrah, i mai bùa Diac Sêba jah yòng ta'mòq ca wì xinoi cô, ma jah 'màng aih haq khoi trùh enh nòi gàu crống taneh lam trùh, òiq tamàng bàu khôn rabiaq da bùa Sa-lô-môn, mahaq òi ta cô i Mangai càn yi hnao ca bùa Sa-lô-môn! ³² Trùh hì hadrah, mangai phôq Ni-ni-we jah yòng ta'mòq tòi ca wì xinoi cô, ma jah 'màng aih wì haq khoi tàng bàu Jôna, èh cađac dèh manoh broq tòi, wa joq 'nàng òi ta cô i Mangai càn yi hnao ca Jôna!”

³³ “Ùh i cabô bùh đen, khoi èh òiq nòi hnàp, loq tah đac ta trom thùng, mahaq òiq ha'nhèq waq ca òiq ca wì mùt ta hnem jah 'ngah. ³⁴ Mat aih đen da chac hamac. Tàng mat ìh 'ngah, òiq chac hamac ìh jah 'ngah, mahaq tàng mat ìh hnoq ùh ro, chac hamac ìh clam clôi. ³⁵ 'Màng aih, pì ngan oq, èh can 'ngah ta chac pì clam clôi. ³⁶ Tàng chac hamac pì 'ngah, ùh hìa q mòiq nòi leq clam; pì jah 'ngah òiq đong, tìah ca mòiq toq đen xreo 'ngah.”

Nan Xa ca Mangai Pha-ri-si

³⁷ Chuaq Jêxu hnài bàu cô bu gêh, i mòiq ngai, mangai Pha-ri-si xìn Haq hlài dèh ta hnem caq pua. Chuaq ha'ngui nòi ca'bông acaq. ³⁸ Mangai Pha-ri-si hnoq Haq ùh 'nheo tì adroi ca acaq. Wì hamàih ta manoh.

³⁹ Mahaq Chuaq doi ca wì: “Ô Mangai Pha-ri-si, pì haliang dòch wa doi chrõng toq enh gùng, mahaq enh trom pì toq bình biac dù wa biac atùng. ⁴⁰ Pì mangai blùng! Haq ma broq biac enh gùng, hadai broq biac enh dalam 'mòh? ⁴¹ Mahaq yi lem pì phai yõc dèh cùng hang am ca mangai pa beq, èh jah lem hreo rìm biac.

⁴² “Mahaq nan xa ca pì mangai Pha-ri-si! Ma jah 'màng aih pì am mòiq phàn mòiq jàt cachiq 'bõchà, cachiq xang, wa rìm hiniq cachiq ma 'noi q ca Boc Plình, aih biac pì phai broq, mahaq pì ùh broq tiaq biac ta-atoq wa can loq waq da Boc Plình.

⁴³ “Nan xa am ca pì, mangai Pha-ri-si! Ma jah 'màng aih pì enh ha'ngui nòi ha'nheq õi ta hnem tagop, wa loq enh wì chao dađeh 'ne chòq!

⁴⁴ “Nan xa am ca pì! Ma jah 'màng aih pì tìah ca ralùng hanang, ùh i ca teo hadro. Wì jôi q enh 'nhèq mahaq ùh canao!”

⁴⁵ Mòi q ngai thài ranenh doi: “Thài ôi, Ìh capoch 'màng aih khai broq òi q ca nhèn ca-maih.”

⁴⁶ Chuaq Jêxu tèo doi: “Nan xa am ca pì, thài ranenh! Ma jah 'màng aih pì pabôi am ca wì can nan xa, can trap, wì mech pì nui pòq, mahaq cla pì ùh òùng mòi q hadrang tì!

⁴⁷ “Nan xa am ca pì! Ma jah 'màng aih pì broq ralùng hanang mangai capoch thai Boc Plình, ma

'bài boc yaq pì khai jêh đac calah nèh! ⁴⁸ 'Màng aih, pì patô pì khai mòiq manoh ca boc yaq pì ma khai jêh đac 'bài mangai capoch thai Boc Plình wa pì broq lem ralùng ca wì ma khai broq 'mèq 'màng aih. ⁴⁹ Taiq 'màng aih, biac khôn rabiaq Boc Plình khai doi: 'Au thê dèh mangai capoch thai Au wa sùq đô Au, trùh ti wì haq. Wì haq jêh đac mangai cô, rùp cật mangai tau,' ⁵⁰ òoiq òiq ca mahem da mangai capoch thai Boc Plình, khai ta-ùc enh jò baxèm broq plình cởng taneh, jah ta'mòq ca xinoi cô, ⁵¹ aih enh mahem Abên trùh mahem Xa-cha-ri wì khai jêh đac ỏi ta'ne ca'bống tadreo wa nòi hadròih wì haq. Au doi ca pì, joq 'nàng jah bòch hlài mahem aih ta xinoi cô.

⁵² "Nan xa am ca pì, thài ranenh! Ma jah 'màng aih pì khai atùng yốc chìa khwaq can 'nì loq, cla pì ùh mùt, mahaq i mangai 'noi q enh mùt, pì tạt ùh am!"

⁵³ Jò Chuaq Jêxu anoi gêh biac aih, wì mangai Pha-ri-si wa 'bài thài ranenh òiq jaq nòih ca Haq. Wì dèh nhang chaq trong ta'blêq ca Haq, èh 'noh bàu bòch Haq bàc trong, ⁵⁴ òoiq chaq trong wech bahlac Haq ta bàu capoch cla Haq.

12

Bàu Capoch Lem Manoh Dù (Mat 10:26-31)

¹ Jò aih, mangai pajùm tagop hlài bình ngống ngai trùh 'mòi ta padit dabau. Chuaq Jêxu doi adroi dèh ca mangai hóc tiaq: "Pì wèq òoiq oq, yùq ca blo mangai Pha-ri-si, ma aih trong caq ỏi bàu lem manoh dù da wì haq. ² ùh i biac cleq

cadoc ma ùh jah pa'noh, ji ùh i bìac cleq hlèp cô èh ma ùh jah loq. ³ 'Màng aih rìm bìac pì khi capoch nòi clam, òiq jah tàng nòi 'ngah; rìm bìac pì khi bahech nòi don ta adùq hlèp, jah pa'noh ti cùa po hnem.

⁴ “Au doi ca pì, mangai bua Au: Apaḡ crè ca mangai jah jêh đac toḡ chac hamac, khi èh ùh jah broḡ cleq hòm. ⁵ Mahaḡ Au doi ca pì loḡ, pì khòh yùḡ crè ca Boc Plình, khi ca Haḡ jêh đac chac hamac, Haḡ hadai i cwìang tèm pì mùt ta 'bau ùnh. Joḡ, Au doi ca pì, Haḡ aih pì phai yùḡ crè! ⁶ I joḡ wì tech padam toḡ chìm xê jah baiḡ hliac 'bac ùh? Mahaḡ ùh i mòiq toḡ ta wì Boc Plình ma hêt! ⁷ Rìm hadrang xác pì ta gàu khi jah rèn đõng òiq. Apaḡ crè, ma jah 'màng aih pì canaḡ yi hnao ca chìm xê.”

*Nhàn Yõc Chuaḡ Loḡ Chòiq Đac Haḡ
(Mat 10:26-31)*

⁸ “Au doi ca pì, mangai leḡ pa'noh hiniḡ Au enh ñgia ca con mangai, Con Mangai hadai pa'noh hiniḡ haḡ enh ñgia 'bình plình da Boc Plình. ⁹ Mahaḡ mangai leḡ chòiq Au enh ñgia con mangai, Au hadai chòiq haḡ enh ñgia ca 'bình plình da Boc Plình. ¹⁰ Mangai leḡ capoch tajraḡ ca Au, Au jah baxõng tôiq ca haḡ; mahaḡ mangai leḡ capoch 'mèḡ ðùng ca Yiang Hadròih, ùh jah baxõng tôiq haḡ.

¹¹ “Jò wì 'ràng pì trùh ta hnem tagop, enh ñgia ca cwan hadrah wa cwan wèḡ cwìang, apaḡ lèt cô èh anoi caḡ 'màng leḡ, loḡ capoch cleḡ òòiq ðõih ðaḡeh, ¹² ma jah 'màng aih, adrình ca jò aih Yiang Hadròih jah hnài pì bàu phai capoch.”

Allah Mangai Padržong Can Blùng

¹³ Jò aih, i mòiq ngai ỏi ta'ne mangai pajùm doi: “Thài ôi, xin Ìh thê daq au axong cùng hang am ca au beq.”

¹⁴ Chuaq Jêxu tèo: “Ô mangai tau, cabô thê Au broq mangai tình hiniq, loq axong cùng hang am ca chốp?” ¹⁵ Khoi èh, Chuaq doi ca wì: “Pì phai wèq dèh manoh ma lem, apaq loq ham cùng hang wa biac padržong can ỏi ta crống taneh cô, ma jah 'màng aih can rìh lem bùi ùh xài canòm cùng hang bàc.”

¹⁶ Haq hnài wì bàu allah, doi: “I mòiq ngai padržong can, rùang haq loh 'mau bàc hrìn.

¹⁷ Haq hèm ta manoh: ‘Au phai broq 'màng leq cô èh? Ma jah 'màng aih, pì anòh nòi ðòiq ðìq ca dahwèq aih.’

¹⁸ “Haq doi dèh ca cla: ‘Cô biac au padon broq: Au raliang hapom ma dùnh broq òn yi càn, gop ðìq dahwèq wa cùng hang 'mùt ta aih; ¹⁹ khoi èh au doi dèh ca mahua yiang cla au: “Mahua yiang ôi, ìh khoi jah bàc cùng hang ðòiq caq bàc hanam; hêq, padài beq, caq ôq, lem bùi beq.”’

²⁰ “Mahaq Boc Pình doi ca haq: ‘Ô mangai blùng tau! Mang cô raq jah yóc hlài mahua yiang gè; 'màng aih cùng hang gè khoi don ðòiq 'mat jah bô?’

²¹ “Mangai leq toq broq padržong can ca dađeh mahaq ùh broq padržong can nòi Boc Pình, èh xòq 'màng aih.”

Apaq Loq Lo

²² Chuaq Jêxu doi dèh ca mangai hỏc tiaq: “ 'Màng aih, au doi ca pì: Apaq hèm trong can rìh

pì, pì lèt caq cleq, loq chac hamac pì caxùnh cleq.
²³ Can rìh yì nhet ca dahwèq caq, chac hamac yì nhet ca ngè caxùnh. ²⁴ Pì ngan chìm ac: Wì haq ùh rai, ùh gat, hadai ùh i ca hapom don ðòiq, mahaq Boc Plình xôq ban wì haq. Pì ma ùh yì hnao ca chìm 'mòh? ²⁵ I ca mangai leq òi ta pì nhò loq lo, haq broq dèh can rìh jah halình tam toq 'biaq ùh? ²⁶ Tàng biac 'yoh ðiq jah 'màng aih pì broq ji ùh jah, gleq pì ma lèt biac 'noiq?

²⁷ “Pì ngan riang tacreo beq: Haq ùh abroq, hadai ùh caxenh brai, mahaq Au doi ca pì, 'nhac ca bùa Sa-lô-môn rahù dàng leq, ji ùh jah caxùnh lem tìah ca hiniq riang aih. ²⁸ Ô 'bài mangai 'biaq manoh lùì, tàng riang nhat òi ta ðùng aih hì cô òi rìh, hì da èh tah ta ùnh bùh, mahaq Boc Plình xôq am haq caxùnh lem 'màng aih, ùh dùh dèh ca pì! ²⁹ 'Màng aih pì apaq cadàu tiaq dahwèq caq, dahwèq ôq, hadai apaq òi lo ta manoh. ³⁰ Ma jah 'màng aih rìm biac aih mangai jàn ðiq crông taneh xôq loq chaq. Baq pì khi loq pì nhet rìm biac aih. ³¹ Mahaq pì chaq Diac Boc Plình beq. Khi èh jah am tam ca pì ðiq ca biac aih.

³² “Ô pì con trùu 'yoh, apaq yùq; ma jah 'màng aih Baq pì khi lem manoh am ca pì Diac Plình. ³³ Tech cùng hang axong ca wì mangai pa beq. Padon ca dađeh 'balet tah 'bac ma ùh hyah, wa hapom cùng hang ùh raliang òi ta Diac Plình, aih nòi ùh i mangai atùng jah thia hatenh, hadai ùh i ca 'mài damang raliang đac. ³⁴ Ma jah 'màng aih cùng hang pì òi ta leq, manoh pì òi ta aih.”

Baiq Hapõng ca Acrài

³⁵ “Ca'nam pì phai càt wa đen pì phai bủh yôt.
³⁶ Pì phai broq tiah ca mòiq ngai gòm craq haq ỏi
 nòi caq hiniang hlài; jò craq haq bu clôq 'mang,
 haq pèh tajòi 'mòi. ³⁷ Xôq ramõt ca hapõng aih,
 jò craq wì hlài, hnoq wì rìu hmàng gòm haq
 trủh! Joq 'nàng Au doi ca pì, craq aih càt dèh
 ca'nam, thê 'bài hapõng ha'ngui ti 'bõng, hi khoi,
 haq patìh ca wì. ³⁸ Xôq ramõt am ca mangai
 hapõng ỏi rìu hmàng gòm craq haq hlài, 'nhac
 ca jò 'ne mang, loq adroi ca ia rõng. ³⁹ Mahaq ðìq
 ca pì phai loq ma ro, tàng craq hnem loq mangai
 atùng trủh jò leq, haq jah rìu gòm. Mangai atùng
 ùh jah pùng da haq panàt. ⁴⁰ Hadai 'màng aih,
 pì phai rìu hmàng, gòm; ma jah 'màng aih Con
 Mangai trủh ta jò ma pì ùh ngò.”

⁴¹ Pêtrô bòch: “Chuaq ôi, bàu aliah cô Ìh doi
 toq ca nhèn, loq doi ðìq ca rìm mangai?”

⁴² Chuaq Jêxu doi: “Cabô broq mangai wèq
 hnem, i manoh loq wèq dèh bàu wa khôn rabiaq,
 craq haq jah am ca haq wèq ngan ðìq ca hapõng
 ta hnem, ðòiq axong ca wì dahwèq caq troq jò.
⁴³ Xôq ramõt ca hapõng aih jò craq haq hlài,
 hnoq haq khoi broq troq 'màng aih. ⁴⁴ Au doi ca
 pì bàu joq 'nàng: Craq haq jah am ca haq wèq
 ðìq cùng hang craq haq. ⁴⁵ Mahaq tàng hapõng
 aih hèm: Craq au xòi trủh; khoi èh, haq blai jêh
 wì hapõng calô, hapõng cadri ma 'noiç, caq ôç
 bù bia. ⁴⁶ Craq haq jah trủh hì haq ma ùh ngò, jò
 haq ùh loq; jêh baxa haq ðìq jaç! Hi khoi cađac
 haq ỏi pajùm nòi ti 'bài mangai ùh ta-atoq.

⁴⁷ “Hapõng cô khoi loq ca manoh craq haq
 mahaq haq ùh padon, ùh tiaq manoh aih, haq

'bìq blai baxa bàc. ⁴⁸ Mahaq hapǒng ma ùh 'nì ca manoh craq haq mahaq broq tôiq đàng ca chiuq blai, èh 'bìq blai toq 'biaq; ma jah 'màng aih mangai leq khoi jah am bàc, jah bòch hlài bàc.

*Bàu Hnài ma 'Noiq
(Mat 10:34–35)*

⁴⁹ “Au khoi trùh ðòiq tèm ùnh ta crǒng taneh. Au ngèh enh ùnh aih khoi cheo! ⁵⁰ I mòiq 'baptem Au ep chiuq. Au ðìq jaq chiuq mango nan xa trùh jò leq bìac aih jah broq gèh! ⁵¹ Pì xoh Au trùh ðòiq 'ràng can catèm am ca crǒng taneh 'mòh? Au doi ca pì: Ùh xài 'màng aih, mahaq 'ràng bìac talah. ⁵² Ma jah 'màng aih, pàng cô ta èh, tàng padam ngai òi pajùm mòiq hnem, jah talah dabau, piq ngai tajraq ca baiq ngai; baiq ngai tajraq ca piq ngai; ⁵³ baq tajraq hlài dèh ca con calô; con calô tajraq dèh ca baq; miq tajraq dèh ca con cadrì; con cadrì tajraq dèh ca miq; yaq tajraq dèh ca con mai; con mai tajraq dèh ca yaq.”

⁵⁴ Haq doi hòm ca wì mangai pajùm: “Jò pì hnoq yùc tǒc enh pah mat mahì mùt, tajòì 'mòì pì doi: ‘Cô èh i mè,’ èh joq i 'màng aih. ⁵⁵ Jò pì hnoq cayeo hlôi pah 'ma ca mat mahì loh, pì doi: ‘Cô èh, tôq pa-ùh;’ èh joq i 'màng aih. ⁵⁶ Ô mangai bàu lem manoh dù! Pì loq hadro teo ta plình wa ta crǒng taneh, mahaq gleq pì ùh 'nì hadro bìac Boc Plình broq manàiq cô?”

⁵⁷ “Èh gleq pì ùh 'nì ngan ca dađeh trong leq ma troq?”

Broq Hatroq ca Mangai 'Noiq
(*Mat 5:25-26*)

⁵⁸ “ 'Màng aih, jò pì lam ti mangai ma kian pì trùh enh ngia cwan hadrah ti trong trùh hnem hadrah, ìh ran broq hatroq ca mangai aih beq. Tàng ùh broq 'màng aih, yùq haq 'ràng ìh enh ngia ca cwan hadrah; cwan hadrah jao am ìh ca mangai wèq hnem tù, khoi èh, tah ìh ta hnem tù. ⁵⁹ Au doi ca pì: Pì ca'naih òi thiùq mòiq hliac 'bac, pì ùh jah loh khoi hnem tù.”

13

Ep Cađac Dèh Manoh Broq Tôiq

¹ Hadai jò aih, i mangai anoi hlài ca Chuaq Jêxu biac Philat jêh mangai Ga-li-lê cachit, èh yóc mahem alôn pajùm ca ngè tadreo wì haq. ² Chuaq Jêxu tèo: “Pì xoh 'bài mangai Ga-li-lê aih chiùq nan xa 'màng aih taiq wì haq broq tôiq yi 'mèq ca mangai Ga-li-lê ma 'noiq 'mòh? ³ Au doi ca pì, ùh xài. Mahaq tàng pì ùh cađac dèh manoh broq tôiq, òiq ca pì hadai hù hnhung 'màng aih. ⁴ Loq wì 18 ngai ma 'bìq hnem gòm ha'nhèq Si-lô-am tacro tùc cachit tau, pì hèm wì khoi broq tôiq yi 'mèq ca mangai ma 'noiq òi ta phôq Jê-ru-sa-lem 'mòh? ⁵ Au doi ca pì: Ùh xài. Mahaq tàng pì ùh cađac dèh manoh broq tôiq, òiq ca pì hadai hù hnhung 'màng aih.”

Bàu Aliah Biac Long Pốc Ùh Plì

⁶ Chuaq Jêxu anoi ca wì bàu aliah cô: “I mangai pìt mòiq toq long póc òi ti wùan nho cla haq, mahaq jò trùh gich plì, haq chaq ùh

hnoq. ⁷ Hi khi, haq doi ca mangai ma wèq wùan: 'Khi piq hanam cô, au trùh òi q chaq plì òi ti long pòc cô, mahaq chaq ùh hnoq. Coh cađac beq, gleq òi q haq toq 'ngwan ca taneh?'

⁸ "Mangai wèq wùan nho doi: 'Craq ôi, xìn òi q tam mòiq hanam cô. Au jah bõc wawenh xem haq, khi èh ùc phàn. ⁹ Broq braiq, haq loh plì atiq cô èh; tàng ùh, craq hi coh đac.' "

Broq Brêh ca Mangai Cadri Hì Sabat

¹⁰ Mòiq hì Sabat Chuaq Jêxu hnài wì òi ti hnem tagop. ¹¹ Òi ti aih, i mòiq ngai gu cadri khi 18 hanam cõc cõng, taiq can kiac broq haq ùh jah yòng ma jang. ¹² Chuaq Jêxu hnoq haq, creo ca haq, doi: "Ô mangai cadri tau, ìh khi jah dèch khi ca 'bình." ¹³ Haq òi q tì ti chac mangai aih. Tajòì 'mòi mangai aih jah yòng jang, rai manè pôi Boc Plinh.

¹⁴ Mangai craq wèq hnem tagop loh nòih ca Chuaq Jêxu, taiq Chuaq Jêxu broq brêh ca gu cadri aih ta hì Sabat. Craq aih doi ca wì mangai bàc: "I tadràu hì broq biac, 'màng aih lam trùh ta hì aih òi q jah brêh beq. Apa q trùh òi q jah brêh ta hì Sabat."

¹⁵ Mahaq Chuaq tèo: "Ô mangai bàu lem manoh dù, hì Sabat pì ma ùh dùì dèh 'bo loq lùa lam ôq diac 'mòh? ¹⁶ Con cadri da Ap-ra-ham cô khi 18 hanam kiac Satan cật haq. Ma ùh jah dõih caxi am ca haq ta hì Sabat 'mòh?"

¹⁷ Haq capoch 'màng aih, 'bài mangai ma tajraq hlài ca haq loq camaih. Mahaq òi q ca mangai pajùm lem bùì rìm biac 'ngah 'ngai Haq khi broq.

Aliah Clong Habài wa Blo Cadroh
(*Mat 13:31-33; Mõc 4:30-32*)

¹⁸ Chuaq Jêxu doi: “Diac Boc Plình tìah ca cleq? Yõc cleq ma achùa ca Diac aih? ¹⁹ Diac aih tìah ca mòiq pliang clong habài, mangai aih rai ta wùan. Haq hon loh long càn; chìm trùh broq pù ta hamenh haq.”

²⁰ Haq doi hòm: “Au jah achùa Diac Boc Plình wa cacleq? ²¹ Diac aih tìah ca blo broq 'benh, mangai cadri tau yõc alôn 'mùt ta piq cađap dác, èh dác bôq đõng.”

'Màng Chit
(*Mat 7:13-14,21-23*)

²² Chuaq Jêxu tõi ta Jê-ru-sa-lem. Haq lam cwa rìm phõq, rìm gùng, rai hnài wì Bàu Lem. ²³ I mangai bòch Haq: “Chuaq ôi, i joq toq 'biaq ngai raq ma jah dèch ùh?”

²⁴ Chuaq tèo: “Ran òiq ca padren mùt 'màng chit beq, ma jah 'màng aih, Au doi ca pì: Bác ngai chaq trong mùt mahaq ùh jah mùt. ²⁵ Jò Craq hnem yòng clenh 'mang, pì òi enh gùng clõq 'mang, creo: ‘Chuaq ôi, xin pèh 'mang am ca nhèn!’

“Èh Haq tèo: ‘Au ùh 'nì ca pì trùh enh leq.’

²⁶ “Khoi èh pì doi: ‘Nhèn khoi caq pua ti ìh. Ìh khoi hnài nhèn ti trong phõq nhèn.’

²⁷ “Mahaq Haq doi: ‘Au ùh 'nì pì trùh enh nòi leq, òiq ca mangai dù tau! Wia ma khoi ca Au beq!’

²⁸ “Jò aih, pì jah hnoq Ap-ra-ham, Isac, Jacôp wa òiq ca 'bài mangai capoch thai Boc Plình, òi ta Diac Boc Plình, mahaq pì èh 'bìq tèm 'noh

enh gùng. Aih nòi i crò hmoi cadrit hanenh.
²⁹ 'Bàì mangai enh pah mat mahì loh, pah mat mahì mùt, pah 'ngeo mat mahì loh, pah 'ngeo mahì mùt, trùh ha'ngui caq hiniang òi ta Diac Boc Plình. ³⁰ Mangai atìq jah wìa adroi, mangai adroi jah wìa atìq."

³¹ Wop jò aih i wì mangai Pha-ri-si lam trùh doi ca Chuaq: "Thài lam khoi ca nòi cô beq, ma jah 'màng aih bùa Hêrôt enh jêh đac ìh."

³² Haq tèo doi: "Lam doi ca chôn aih beq: 'Hì cô, hì da èh, Au xôq òi hnan can kiac, broq brêh can ùh hrôc, trùh hì pìq, bìac broq da Au khoi gêh.' ³³ Mahaq hì cô, hì da èh, wa hì ma atìq, Au phai lam, ma jah 'màng aih ùh lah i mangai capoch thai Boc Plình leq ma cachìt enh gùng ca phòq Jê-ru-sa-lem.

³⁴ "Ô Jê-ru-sa-lem, Jê-ru-sa-lem, gè ma jêh đac 'bài mangai capoch thai Boc Plình, tèm hmu wì mangai wê bàu khoi bàc yàng, Au enh tagop con caiq gè, 'màng ca ia can òm dèh con ta panan, mahaq pì ùh enh! ³⁵ Ngan cô, hnem pì jah wìa nòi catù! Joq 'nàng Au doi ca pì: Pì ùh hnoq Au hòm trùh jò leq pì jah doi: 'Xôq ramòt am ca Mangai canòm hiniq Chuaq lam trùh.'✧ "

14

Mangai i 'Bình Liù Jah Brêh

¹ Mòiq hì Sabat ma 'noiq, Chuaq Jêxu mùt caq hiniang ta hnem mangai wèq cwìang Pha-ri-si. Wì òi ta aih ngan paro Haq. ² Enh ngìa ca Chuaq Jêxu i mòiq ngai i 'bình liù. ³ Chuaq

✧ 13:35 13:35 BCP 118:26.

Jêxu bòch 'bài thài ranenh wa mangai Pha-ri-si: “Hì Sabat akhòh broq brêh ca mangai ùh hróc ùh?” ⁴ Mahaq diq ca wì ùh tèo. Chuaq Jêxu 'ràng mangai ùh hróc broq brêh ca haq. Hì khoi thê haq hlài.

⁵ Khoi èh, Haq doi ca wì: “Öi ta pì i ca mangai leq, hì Sabat, tàng con calô haq loq 'bo haq clih ta adràm, haq ma ùh dèch 'mòh?” ⁶ Wì ùh jah tèo cleq ca biac aih.

⁷ Haq hnoq wì mangai tamoi khoi akhen mùt ta hnem, ràih nòi ha'ngui yi ha'nhèq ca ma 'noiç. 'Màng aih Haq doi ca wì bàu aliah cô: ⁸ “Jò wì pachùh ca ìh trùh caq hiniang ìh, paq ha'ngui nòi ha'nhèq, yùq i mangai càn yi hnao ca ìh lam trùh atiq. ⁹ Mangai craq hnem lam trùh doi ca ìh: Xìn am ca mangai cô nòi ìh, èh ìh ep camaih, ma jah 'màng aih ìh phai loh ha'ngui nòi enh cloh dõng. ¹⁰ Mahaq jò khoi pachùh ca ìh, ìh trùh ha'ngui ðeh nòi enh cloh dõng beq, èh mangai craq hnem jah lam trùh doi ca ìh: Ê ôi, xìn tõi ha'ngui nòi ha'nhèq. 'Màng aih èh, ìh jah padèch enh ngia diq ca wì ma caq hiniang. ¹¹ Ma jah 'màng aih mangai leq padèch daðeh, jah ca'nìh haq ha'neq; mangai leq ma paha'neq daðeh, èh jah padèch haq ha'nhèq.”

¹² Haq hadai doi ca mangai ma akhen ca Haq: “Jò ìh i hiniç akhen acaq jò 'ne hì, loq daxèq, apaq akhen dèh ca bua, ca oh daq, loq mangai can padrõng plài cla, yùq wì akhen hlài ðoiç ca'naih dòih ìh. ¹³ Mahaq jò ìh caq hiniang, thê ìh pachùh ca mangai pa, mangai pen, mangai cwé jènèh tì, loq mangai ùh xao mat. ¹⁴ Èh ìh jah xõq

ramöt, ma jah 'màng aih wì ùh hlàt pachùh hlài ca ìh; trùh jò mangai ta-atoq rìh hlài, èh jah am hlài da ìh."

Àliah Biac Caq Hiniang Càn

(Mat 22:1-10; 10:37-38; 5:13; Mõc 9:50)

¹⁵ Mòiḡ ngai, mangai ha'ngui caq pajùm tàng bàu aih, haq doi ca Chuaq: "Xôḡ ramöt am ca mangai leq jah caq hiniang ta Diac Boc Plình."

¹⁶ Mahaq Chuaq Jêxu doi: "I mòiḡ ngai padon hiniang càn, pachùh ca bàc ngai lam caq. ¹⁷ Trùh jò caq, haq thê dèh hapõng lam anoi ca wì mangai ma khi pachùh: 'Lam beq, rìm biac khi padon.'

¹⁸ "Mahaq rìm ngai mòiḡ manoh xìn ùh waq lam. Mangai ma adroi doi: 'Au neo röt mòiḡ ðùng taneh, au phai lam ngan; xìn am au padài.'

¹⁹ "Mangai ma 'noiḡ doi: 'Au neo röt padam ðôi 'bo, au ep lam búc wì haq; xìn am au padài.'

²⁰ "Mangai 'noiḡ hòm doi: 'Au neo yõc mai, au ùh jah lam.'

²¹ "Hapõng aih hlài, anoi biac aih ca craq haq. Craq haq loh nòih, thê dèh hapõng lam ma renh loh ta chòḡ, wa ti trong, 'ràng mangai pa, mangai hinìḡ, mangai ùh xao mat, mangai cwê jènḡ, cwê tì, 'mùt ta cô beq.

²² "Atìḡ ca aih hapõng haq doi: 'Craq ôi, biac ìh thê aih, au khi broḡ, mahaq nòi ha'ngui xôḡ ôi raq bàc.'

²³ "Craq haq doi: 'Loh enh gùng lam ti trong wa roc pagia, èh glàm mangai leq thê wì mùt, waq ca jah bình ta hnem au. ²⁴ Ma jah 'màng aih, au doi ca pì, 'bài mangai Au ma khi pachùh

adroi, ùh i ca mangai leq jah caq hiniang au ma khoi padon.' ”

²⁵ I mangai pajùm bàc lam ti Chuaq Jêxu. Haq tawìh ngan wì, èh doi: ²⁶ “Tàng mangai leq trùh ti Au, mahaq ùh git dèh ca miq baq, ca mai, ca con, ca oh daq calô, oh daq cadrì wa can rih cla haq, ùh jah broq mangai hóc tiaq Au. ²⁷ Mangai leq ùh xùì dèh long pagat tiaq Au, hadai ùh jah broq mangai hóc tiaq Au.

²⁸ “Õi ta pì i mangai leq enh broq hnem gòm ha'nhèq, mahaq adroi haq ùh ha'ngui tình, ngan thù dađeh i tàu 'bac òiđ broq gêh ca hnem aih ùh? ²⁹ Yùq jò khoi broq xàn, mahaq ùh jah broq gêh; rìm ngai hnoq, wì jah do ca haq. ³⁰ Wì doi: ‘Mangai cô khoi baxèm, mahaq ùh hlàt broq gêh!’

³¹ “Loq, i ca bùa leq jò lam tajêh ca bùa 'noiq, adroi haq ma ùh ha'ngui hatình ngan, haq 'ràng 10.000 lình i nui ta'blêq ca bùa tau ma 'ràng 20.000 lình ùh? ³² Tàng ùh nui 'blêq, jò bùa tau òi hangai, haq thê dèh hapông lam xìn broq hatroq. ³³ 'Màng aih, tàng mangai leq òi ta pì, ùh cađac rìm bìac haq ma i, ùh jah broq mangai hóc tiaq Au.

³⁴ “Boh aih lem, mahaq tàng boh hnhung ca can xang, yóc cleq broq am òiđ haq xang hlài? ³⁵ Boh aih hadai pì wìa tah ta taneh loq broq phàn, mahaq phai tèm haq loh enh gùng.

“Mangai leq i don, thê haq tamàng beq!”

15

Bàu Aliah Con Trìu Lam Lac (Mat 18:12-14)

¹ Dìq ca wì mangai gop thèq wa mangai i tôiq trùh haten ca Chuaq Jêxu tamàng Haq hnài. ² Wì mangai Pha-ri-si wa thài ranenh mamùc bàu 'yoh doi: “Mangai cô òi ti mangai i tôiq, caq pua ti wì!”

³ 'Màng aih Haq doi ca wì bàu aliah cô: ⁴ “Ōi ta pì, cabô mangai i 100 con trìu, tàng hnhung mòiq toq, haq ma ùh ðòiq 99 toq ta ðùng, ðòiq lam chaq waq ca hnoq con trìu ma hnhung aih? ⁵ Jò chaq khi hnoq, haq lem bùi dèch con trìu xùì aplêh, ⁶ khi èh, hlài trùh hnem, creò dèh ca bua wa mangai haten, haq doi: ‘Lem bùi ti au beq, ma jah 'màng aih au khi chaq hnoq dèh con trìu ma hnhung.’ ⁷ Au doi ca pì: Ta Diac Plình hadai 'màng aih. Jah lem bùi jò mòiq ngai i tôiq loq cađac dèh manoh broq tôiq, yi hnao ca 99 ngai mangai ta-atoq, mahaq ùh nhet cađac dèh manoh broq tôiq.

Bàu Aliah Hnhung Mòiq Hliac 'Bac

⁸ “Loq, i mòiq ngai gu cadrì, i 10 hliac 'bac, hnhung mòiq hliac, haq ma ùh bùh ðen, hwit hnem, chaq geo dìq jaq waq ca hnoq? ⁹ Jò chaq khi hnoq, haq creò dèh ca bua wa mangai haten ca haq, haq doi: ‘Lem bùi pajùm ti au beq, ma jah 'màng aih au chaq khi hnoq dèh hliac 'bac ma hnhung.’ ¹⁰ Au doi ca pì, enh ngìa ca 'bình plình da Boc Plình hadai 'màng aih. Jah lem bùi am ca mòiq ngai, mangai i tôiq loq cađac dèh manoh broq tôiq.”

Bàu Aliah Con Calô Lam Lac

¹¹ Haq doi: “I mòiq ngai tau haq i baiq ngai con calô. ¹² Mangai ma oh doi dèh ca baq: ‘Baq ôi, xin am da au phàn cùng hang ma jah au.’ Tajòì ‘mòi mangai baq aih axong cùng hang haq, am dèh ca baiq ngai con.

¹³ “Atìq ca aih toq 'biaq hì, mangai ma oh gop dõng dèh cùng hang cla. Haq lam Diac 'noiq. Ôi ta aih, haq caq ôq pagôq racaih òiq ca cùng hang haq. ¹⁴ Jò haq racaih khi òiq ca cùng hang, ta cròng aih loh ca pangot hrah càn; haq loh ca nan tùng. ¹⁵ Haq lam patih caq cùng ca mòiq ngai, mangai ta Diac aih. Wì thê haq loh ta ðùng ban chùa. ¹⁶ Haq pangot òiq jaq enh yõc ca'nhah tòh ma ðòiq chem chùa, mahaq ùh i cabô am.

¹⁷ “Bìac aih bahmàng haq, haq hèm: ‘Ta hnem baq au, bàc mangai broq caq cùng i pua caq panàc, mahaq au ep cachit ca hrah ta Diac co! ¹⁸ Au yòng, hlài ta baq, doi: Baq ôi, au khi broq tôiq ca plình wa broq tôiq ca baq; ¹⁹ Au pi ðang ca broq con ìh hòm; xin baq ngan au tiah ca mòiq ngai, mangai broq caq cùng da baq.’ ²⁰ Khi òh haq yòng, hlài dèh ta baq.

“Jò haq ôi raq hangai, baq haq khi hnoq haq, òiq jaq xa-õch dèh ca haq, cadàu loh oc hìp haq.

²¹ “Mangai con doi: ‘Baq ôi, au khi broq tôiq ca Plình wa ca baq. Au ùh ðang ca broq con ìh hòm.’

²² “Mahaq mangai baq doi dèh hapõng: ‘Yõc eo ma òiq jaq lem pacaxùnh am ca haq beq; axràng ca haq canhàng beq; xrôp jai ca jènh haq. ²³ Rùp 'bo hadròng ma bech, broq jam beq.

Bèn phai lem bùi, ²⁴ ma jah 'màng aih con au cô khoi cachit; manàiq rih hlài; khoi hnhung, mahaq manàiq khoi hnoq hlài.' Khoi ca aih wì lem bùi.

²⁵ "Mahaq, con ramua 'nang ỏi ta ðùng. Jò haq hlài ten trùh hnem, tàng atêh broc bàu calêu, ²⁶ 'màng aih haq creò mòiq ngai hapǒng bòch hagleq. ²⁷ Hapǒng aih tèò: 'Oh ìh khoi hlài. Baq ìh khoi broq jam con 'bo bech, ma jah 'màng aih hnoq oh ìh hlài jah ỏi aiq.'

²⁸ "Con ramua loh nòih, ùh enh mùt ta hnem. 'Màng aih baq haq loh adràc haq mùt. ²⁹ Mahaq haq tèò dèh baq: 'Ngan cô, au khoi broq bìac ca ìh bàc hanam, ùh lah pagôq, ùh lah ùh iu bàu, mahaq ìh 'nhòq lah am mòiq toq bubi 'yoh leq ðòiq au caq lem bùi ti bua au. ³⁰ Mahaq ngan tau con ìh. Haq khoi racaih ðìq cùng hang ìh pajùm ti mangai cadrì 'mèq manoh, èh haq hlài. Taiq haq hlài, ìh khoi broq jam con 'bo bech am ca haq!'

³¹ "Baq haq doi: 'Con ôi, con ỏi yôt ti baq. ðìq cùng hang da baq, aih cùng hang da con. ³² Mahaq khòh padon hiniang wa caq lem bùi, ma jah 'màng aih oh con cô khoi cachit, mahaq rih hlài; khoi hnhung, mahaq hnoq hlài.' "

16

Mangai Wèq Cùng Hang

¹ Chuaq Jêxu doi hòm dèh ca mangai hóc tiaq: "Mangai padrǒng tau i mòiq ngai hapǒng wèq cùng hang haq, 'bìq wì kian doi mangai hapǒng aih racaih ca cùng hang craq haq. ² 'Màng aih,

craq haq creo ca haq bòch: 'Ìh broq leq ma au tàng wì kian ìh? Anoi pa'noh bìac ìh ma wèq cùng hang beq, ma jah 'màng aih, pàng cô ìh pì jah broq mangai wèq cùng hang au hòm.'

³ "Mangai wèq cùng hang hèm ta manoh doi: 'Tàng craq au pì am ca au bìac broq, au broq cleq cô èh? Broq bìac bõc taneh, au ùh i ca padren, lam caq xin, aih broq camaih. ⁴ Au loq bìac au jah broq, ðòiq trùh jò au pì i ca bìac broq, i mangai ðìh yõc au hlài ta hnem.'

⁵ "Mangai aih creo ca tang ngai. 'Bài mangai ma pòq ðòih craq haq trùh. Haq bòch mangai ma adroi: 'Ìh pòq ðòih craq au toq leq?' Mangai aih tèo:

⁶ " 'Mòiq hrinh thùng dầu ôliu.'

"Mangai wèq cùng hang doi ca haq: 'Yõc jàiq ðòih cô beq, ha'ngui jang 'mat, tajòì 'mòi achìh: 50.'

⁷ "Khoi èh, haq bòch mangai tau: 'Ìh pòq toq leq?'

"Mangai aih doi: 'Mòiq hrinh 'bao 'mau.'

"Mangai wèq cùng hang doi ca haq: 'Yõc jàiq ðòih cô, achìh beq: 80.'

⁸ "Craq haq manè mangai wèq cùng hang loq gô pla aih, wa bìac broq khôn rabiaq 'màng aih. Ma jah 'màng aih con caiq crõng taneh cô khôn rabiaq ca gô pla yi hnao ca con caiq da can 'ngah. ⁹ Au doi ca pì: Pì yõc cùng hang 'nhòng cô chaq bua wa jùp ðò wì beq, ðòiq jò cùng hang aih khoi ðìq, bìac broq aih jah ðìh yõc pì mùt ta nòi òi hloi hloi.

¹⁰ "Mangai leq wèq manoh broq troq bìac ðìq jaq 'yoh, haq hadai jah wèq manoh broq troq

biac càn; mangai leq loq gô pla ta biac 'yoh, haq hadai loq gô pla ta biac càn. ¹¹ 'Màng aih, tàng pì ùh wèq manoh broq troq biac cùng hang 'nhòng cô, cabô am ca pì wèq cùng hang joq 'nàng da Diac Plinh? ¹² Tàng pì ùh wèq manoh broq troq cùng hang da mangai 'noiç, cabô ma am ca pì wèq cùng hang cla pì?

¹³ “Ùh i hapõng leq jah broq hapõng baiç toq craç, ma jah 'màng aih haq git ca craç cô, loq waç ca craç tau, loq mòiq manoh ca craç cô, khìn đac craç tau. Pì ùh jah broq hapõng Boc Plinh, khi òh broq hapõng 'bac jèn hòm.”

¹⁴ Mangai Pha-ri-si ma ham ca 'bac jèn, tàng rìm biac aih. Wì do lê ca Chuaç Jêxu. ¹⁵ Chuaç Jêxu doi ca wì: “Pì broq tìah ca mangai ta-atoq enh ngìa ca con mangai, mahaq Boc Plinh loq ca manoh pì; ma jah 'màng aih biac con mangai padèch, aih biac 'mèq 'mac enh ngìa ca Boc Plinh.

¹⁶ “Ranenh wa bàu mangai capoch thai Boc Plinh khi anoi hlài toq trùh 'nhòng da Jon raç; pàng aih Bàu Lem Diac Boc Plinh jah anoi loh; rìm ngai ran òiq jaç òòiq jah mùt ta aih.

¹⁷ Mahaq plinh crõng taneh cô jah cađac, xùang yi hnao ca mòiq teo pliang chủ 'yoh leq ta sech Ranenh jah xùt đac.

¹⁸ “Cabô cađac mai, khi òh yõc mai 'noiç, haq khi broq tòiç tango. Cabô yõc gu cadrì õng haq ma cađac, hadai khi broq tòiç tango.”

Mangai Padrõng Can wa La-xa-ru

¹⁹ “I mòiq ngai mangai padrõng can caxùnh eo gòh drinh lem, canaq 'bac, caç hiniang da-òih

rìm hì. ²⁰ Hadai i mòiq ngai, mangai pa, hiniq haq La-xa-ru, rahenh pachòng jàp ta chac haq, ca'nùng enh gùng ca 'màng mangai can padrõng aih. ²¹ Haq ùac jah caq ðeh rah dahwèq mangai can caq taclìh enh ca'bõng; hadai i coq lam liah rahenh haq.

²² “Mangai pa cachit. 'Bình plình 'ràng òòiq haq ta achong Ap-ra-ham. Mangai can hadai cachit. Wì 'ràng catùh. ²³ Mangai can padrõng chiùq jìq xa òi ta nòi cachit, ngoi ngan hnoq Ap-ra-ham. Òi hangai i La-xa-ru 'nang ha'ngui ta achong Haq. ²⁴ Mangai padrõng can creò: ‘Òi Ap-ra-ham boc au, xìn xa-õch ca au, thê La-xa-ru chùq tì ta diac, paliah ca rapet au òòiq jah hangèp; ma jah 'màng aih, au xa òiq jaq òi ta ùnh cô.’

²⁵ “Mahaq Ap-ra-ham doi: ‘Òi con, hmàng hlài beq, jò ìh òi rìh, khoi hùang bìac lem cla ìh, La-xa-ru phai chiùq pòq bìac xalep. Manàiq haq òi ta cô jah alòng; phàn ìh phai chiùq nan xa. ²⁶ Ngan cô, òi ta'ne ìh wa nhèn i ralùng jrùq. Au enh cwa ta 'mat ùh jah. Cabò òi ta 'mat enh cwa ta cô, hadai ùh jah.’

²⁷ “Mangai padrõng can doi: ‘Boc au ôi, 'màng aih xìn ìh thê La-xa-ru trùh ta hnem baq au. ²⁸ Ma jah 'màng aih, au i padam ngai oh daq, òòiq mangai anoi ca wì haq, waq ca wì haq, jò cachit, ùh taclìh nòi jìq xa cô.’

²⁹ “Ap-ra-ham padreo bàu doi: ‘Wì khoi i Môise wa 'bài mangai capoch thai Boc Plình. Wì phai tamàng bàu aih.’

³⁰ “Mangai can doi: ‘Waiq Ap-ra-ham boc au, ùh xài 'màng aih, mahaq tàng i mangai cachit rih hlài trùh ti wì, wì jah loq cađac dèh manoh broq tôiq.’”

³¹ “Mahaq Ap-ra-ham tèo: ‘Tàng wì ùh tamàng Môise wa bàu mangai capoch thai Boc Plình, 'nhac ca i mangai cachit rih hlài, haq xôq ùh jah panhet wì lùì.’”

17

Bàu Hnài ma 'noiç

(Mat 18:6-7,21-22; Mõc 9:42)

¹ Chuaq Jêxu hnài dèh 'bài mangai hõc tiaq: “Biác broq ca mangai 'noiç broq tôiq, aih ùh nui jê; mahaq nan xa am ca mangai leq ma broq loh biác aih! ² Tàng mangai leq broq ca mòiç ngai mangai 'yoh cô broq tôiq, cật apao hmu jang ranõng haq, hwenh ca'nìh ta diac raxìq yi hnao. ³ Pì phai wèq dađeh!”

“Tàng oh daq ìh broq tôiq, pariaq hnài haq beq. Tàng haq loq cađac dèh manoh broq tôiq, phai baxõng tôiq ca haq beq. ⁴ Tàng mòiç hì haq broq tôiq ca ìh tapèh yàng, èh tapèh yàng haq hlài ta ìh, anoi: ‘Au cađac dèh manoh broq tôiq,’ 'màng aih baxõng ca haq beq.”

⁵ 'Bài sùq đò Chuaq doi: “Xìn tam manoh lùì am ca nhèn!”

⁶ Chuaq padreo bàu ca wì! “Tàng pì i manoh lùì 'yoh toq clong habài, pì thê long dầu cô: ‘Tabùiq lam pìt hlài ta diac raxìq beq;’ haq jah iu bàu pì.”

⁷ “Mangai leq òi ta pì i hapǒng hlài enh cai, loq hlài enh ban trùu, bu trùh hnem, pì doi ca haq: ‘Trùh ha'ngui caq pua ti au beq!’ ⁸ Tablòq hlài, pì con doi ca hapǒng aih: ‘Atùà eo cwàn, yòng patih ca au acaq beq; jò au caq khi hêq, khi èh ìh men jah caq.’ ⁹ Cla craq ùh manè mangai hapǒng aih, ma jah 'màng aih biac aih, biac haq phai broq dèh ca craq haq. ¹⁰ Pì hadai 'màng aih. Jò broq gèh biac phai broq, pì phai doi: ‘Nhèn ùh tajì ca bàu manè, taiq nhèn toq broq biac nhèn phai broq.’ ”

Mòiq Jàt Ngai Mangai Bacùn

¹¹ Ti trong tǒc phòq Jê-ru-sa-lem, Chuaq Jêxu lam cwa ti acang gùng Sa-ma-ri wa Ga-li-lê. ¹² Jò Haq mùt ta plài aih, i 12 bacùn trùh ãih Haq, yòng enh hangai, hnoq Haq. Wì dèh bàu xin: ¹³ “Waiq Thài! Waiq Chuaq Jêxu! Xin xa-öch ca nhèn ãiq!”

¹⁴ Jò hnoq wì, tajòi 'mòi Chuaq doi: “Lam beq, patô ãađeh ca 'bài pajàu Boc Plinh.” Wì 'nang lam, hinìq bacùn wì brêh ãng.

¹⁵ I mòiq ngai òi ta wì hnoq ãađeh khi jah brêh, wìh hlài, ãeh bàu manè pôi Boc Plinh, ¹⁶ bla-op hadrò ta taneh, ti jènh Chuaq Jêxu. Haq manè Chuaq. Ngan cô, mangai aih, mangai Sa-ma-ri.

¹⁷ Chuaq Jêxu bòch: “Ùh xài 12 ãiq jah brêh 'mòh? Hachìn ngai tau ta leq? ¹⁸ Ma hnoq toq i mòiq ngai, mangai Diac 'noi q cô wìh hlài manè pôi Boc Plinh 'mòh?” ¹⁹ Hi khi, Chuaq Jêxu doi ca haq: “Yòng, lam beq; manoh lúi ìh khi broq brêh ca ìh.”

Bìac Diac Boc Plình Trùh
(Mat 24:23-28,37-41)

²⁰ Mangai Pha-ri-si bòch Chuaq Jêxu: “Jò leq Diac Boc Plình ma trùh?” Haq tèo: “Diac Boc Plình trùh ùh xài òi q ca pì jah ngan hnoq xam mat, ²¹ Ùh i ca mangai jah doi: Diac Plình òi ta cô, loq òi ta tau; ma jah 'màng aih, Diac Boc Plình khoi òi ta pì.”

²² Haq doi dèh ca mangai hõc tiaq: “Jah i jò, pì ngèh enh ca jah hnoq mòiq hì da Con Mangai, mahaq ùh jah hnoq. ²³ Wì jah doi ca pì: ‘Haq òi ta cô!’ Loq: ‘Haq òi ta tau!’ Mahaq apaq lam, hadai apaq cadàu tiaq wì. ²⁴ Ma jah 'màng aih tìah ca camlet xreo enh ca'nàm plình cô trùh ca'nàm plình tau 'màng leq, ta hì Con Mangai trùh mahno dađeh, hadai 'màng aih. ²⁵ Mahaq adroi đõng, Haq ep chiùq nan xa bàc trong, wa ep chiùq 'nhòng cô chòiq cađac Haq.

²⁶ “Bìac khoi trùh ta 'nhòng Noah 'màng leq, hì da Con Mangai jah trùh hadai 'màng aih; ²⁷ Wì caq, wì ôq, ban ống, ban mai, trùh hì Noah mùt ta bong. Diac càn trùh jêh òi q phù cròng cachit đõng.

²⁸ “Ta 'nhòng Lot, hadai 'màng aih. Wì caq, wì ôq, padre, pìt chòi, wa broq hnem; ²⁹ Mahaq trùh hì Lot loh khoi enh phòq Sôđôm, i ùnh wa dahwèq ngèq tôq hìu loh enh plình, jêh cachit òi q ca mangai phòq aih.

³⁰ “Hì da Con Mangai trùh, hadai tìah ca 'màng aih. ³¹ Ta hì aih, mangai leq òi ta của hnem, mahaq i cùng hang òi q ta trom hnem, apaq mùt 'nhon; mangai leq òi ta òi q, hadai apaq

hlài. ³² Hmàng hlài mai Lot beq! ³³ Mangai leq chaq trong dèch dèh can rìh cla, jah hnhung. Mangai leq hnhung can rìh, èh jah yóc hlài. ³⁴ Au doi ca pi: 'Mang aih baiq ngai cùi pajùm mòiq jùang; mòiq ngai jah atóc lam, mòiq ngai ðòiq hlài. ³⁵ Baiq ngai gu cadrì xai pajùm mòiq toq apao. Mòiq ngai jah atóc lam; mòiq ngai ðòiq hlài. ³⁶ Baiq ngai gu calô òi ta ðùng; mòiq ngai jah atóc lam; mòiq ngai ðòiq hlài."

³⁷ Wì mangai hóc tiaq bòch Haq: "Chuaq ôi, bìac aih loh òi ta leq?"

Haq doi: "Jam cachìt òi ta leq, chìm cliang kèn tagop òi ta aih."

18

Bàu Aliah Cwan Tình Hiniq ùh Ta-atoq

¹ Chuaq Jêxu aliah ca mangai hóc tiaq Haq ðòiq patô ro ca wì ep hloi hloi waiq khàn; apaq tagah lep. ² Haq doi: "Ta phôq tau, i mòiq toq cwan tình hiniq, ùh crè yùq ca Boc Plình, ùh chè chon ca mangai leq. ³ Ta phôq aih hadai i mòiq ngai gu cadrì hadrô lam trùh bòch haq: 'Xìn hadrah ta-atoq ca au wa mangai ma git ca au.'

⁴ "Cwan aih ùh tình khi dình. Mahaq khi ca aih, haq hèm ta manoh: 'Nhac ca au ùh crè ca Boc Plình, ùh chè chon ca mangai leq, ⁵ mahaq taiq gu cadrì cô khi bàc yàng trùh pangài ca au, au phai tình bìac ta-atoq am ca haq, ðòiq haq pi hìaq trùh èh broq ca au jìq ta manoh.'"

⁶ Khi èh, Chuaq doi hòm: "Pì i tàng, bàu cwan tình hiniq ùh ta-atoq aih khi anoi cleq?"

7 'Màng aih, Boc Plình ma ùh hadrah ta-atoq ca 'bài mangai Haq ma khoi ràih, aih 'bài mangai dahì damang creo xìn Haq, xôq Haq ỏi gòm dùnh hòmh 'mòh? 8 Au doi ca pì: Haq jah renh hadrah ta-atoq am ca wì. Mahaq jò Con Mangai trùh, Haq chaq i hnoq manoh lùì joq 'nàng ỏi ta crống taneh ùh?"

Aliah wì Pha-ri-si wa Wì Gop Thèq

9 Chuaq Jêxu anoi bàu aliah cô ca mangai doi dađeh mangai ta-atoq, canòm dèh ca cla, khìn đac mangai 'noiq: 10 "I baiq ngai mùt ta Hnem Cùh Waiq òiòiq waiq khàn: Mòiq ngai, mangai Pha-ri-si, wa mòiq ngai, mangai gop thèq. 11 Mangai Pha-ri-si yòng waiq khàn 'màng cô: 'Waiq Boc Plình, au manè pôi Ìh, ma jah 'màng aih au ùh xài tìah ca mangai 'noiq, loq yóc caq 'bac wì, loq blàq blènh, loq tango, hadai ùh xài tìah ca mangai gop thèq cô. 12 Au rôn ca acaq mòiq tùang, baiq yàng, am mòiq phàn mòiq jàt rìm ca dahwèq au broq loh.'

13 "Mangai gop thèq yòng hangai; ùh ngoi mat ngan ta plình, tuc dèh rada waiq khàn: 'Waiq Boc Plình, xìn Ìh xa-öch au, ma jah 'màng aih au mangai i tòi!' "

14 "Au doi ca pì: Mangai cô hlài dèh ta hnem jah padèch ta-atoq yi hnao ca mangai tau, ma jah 'màng aih, cabô padèch dađeh, jah ca'nìh ha'neq, cabô paha'neq dađeh, jah padèch ha'nhèq."

*'Bài Con 'Yoh
(Mat 19:13-15; Mốc 10:13-16)*

15 Wì hadai 'ràng con 'yoh trùh ti Chuaq Jêxu, xìn Chuaq Jêxu bèq wì. Mangai hóc tiaq hnoq

'màng aih, lech ca 'bài mangai ma 'ràng trùh.
 16 Mahaq Chuaq Jêxu creó ca wì doi: “Đòiq wì 'yoh trùh ti Au beq, apaq tàt; ma jah 'màng aih Diac Boc Plình jah am ca 'bài mangai leq ma tìah ca 'bài con 'yoh cô. 17 Au doi ca pì joq 'nàng: Mangai leq ùh nhàn yốc Diac Boc Plình tìah ca mòiq ngai con 'yoh, haq ùh jah mùt Diac Plình.”

Mangai Radam Padržng Can

(Mat 19:16–30; Mòc 10:17–31)

18 I mòiq ngai cwan bòch Chuaq Jêxu: “Waiq Thài Mangai Lem, au phai broq cleq đòiq jah yốc can rìh halình?”

19 Chuaq Jêxu doi: “Gleq ìh ma creó ca Au Mangai Lem? Enh gùng ca Boc Plình, ùh i cabô lem. 20 Ìh khoi loq bàu thê cô: ‘Ìh apaq broq tôiq tango anang, apaq jêh đac mangai, apaq atùng, apaq capoch hlài amòng; phai loq iu miq baq.’ ☆”

21 Mangai aih tèo: “Au khoi wèq đìq ca bàu thê aih enh jò 'yoh.”

22 Chuaq Jêxu khoi tàng 'màng aih, Haq doi ca haq: “Ồi i mòiq bìac hòm, aih tech đống cùng hang ìh beq, axong ca mangai pa, èh ìh jah i cùng hang ỏi ta Diac Plình, hi khoi lam tiaq Au beq.”

23 Mahaq jò mangai aih tàng bàu aih, haq loh ca mango, ma jah 'màng aih haq đìq jaq padržng can. 24 Chuaq Jêxu ngan haq doi: “Mangai padržng can mùt Diac Boc Plình xa đìq jaq! 25 Lócđã mùt cloh jrùm xùang yi hnao ca mangai can mùt Diac Boc Plình.”

26 Wì mangai ma tàng bàu aih, bòch Chuaq: “'Màng aih, mangai 'màng leq ma jah dèch?”

☆ **18:20** 18:20 LEA 20:12–16; RAH 5:16–20.

²⁷ Haq padreo bàu: “Bìac mangai ùh broq jah, Boc Plình broq jah.”

²⁸ Pêtrô doi: “Cô nhèn khoi cađac diq ca bìac nhèn ma i, ðòiq lam tiaq Ìh.”

²⁹ Chuaq Jêxu doi: “Au doi ca pì joq 'nàng: Ùh i ca mangai leq taiq Diac Boc Plình, haq cađac dèh hnem, miq baq, oh daq, cadrì con, ³⁰ ma ùh jah nhàn yõc hlài yi bàc yàng, òi ta 'nhòng cô; khoi èh, jah i can rìh hloi hloi ta 'nhòng ma atìq!”

Yàng Piq Chuaq Jêxu Doi Adroi Bìac Haq Cachìt wa Rìh Hlài
(*Mat 20:17-19; Mõc 10:32-39*)

³¹ Khoi ca aih, Chuaq Jêxu 'ràng 12 ngai sùq ðô, lam nòi crài. Haq doi ca wì: “Cô èh, bèn tõi Jê-ru-sa-lem. Rìm bìac mangai capoch thai Boc Plình khoi achìh anoi trùh bìac Con Mangai, èh jah xit. ³² Ma jah 'màng aih, Haq chiùq wì jao am ca mangai jàn 'noiç. Wì lê Haq, hanip Haq, cachôh ca Haq. ³³ Khoi ca wì blai Haq, wì jêh cađac Haq. Trùh hì piq, Haq jah rìh hlài.”

³⁴ Mahaq 'bài mangai hõc tiaq ùh 'nì tàng Haq capoch cleq; ma jah 'màng aih bàu aih khoi cadoc ca mangai hõc tiaq, taiq 'màng aih wì ùh 'nì Chuaq Jêxu anoi cleq.

Mangai ùh Xau òi Phôq Jê-ri-cô
(*Mat 20:29-34; Mõc 10:46-52*)

³⁵ Jò tenh trùh phôq Jê-ri-cô, Chuaq Jêxu hnoq mòiq ngai, mangai ùh xau ha'ngui caq axin òi ti trong. ³⁶ Jò haq tàng atêh bàc ngai lam cwa trong aih, haq bòch bìac cleq aih. ³⁷ Wì padreo

hlài bàu doi: “Chuaq Jêxu, Mangai Na-xa-ret, lam cwa trong cô.”

³⁸ Mangai ùh xau creó bàu dêh: “Waiq Chuaq Jêxu, Con Xau bùa Đawit, xìn xa-õch ca au ðìq!”

³⁹ Wì mangai ma lam adroi lech ca haq, thê haq àt haten, mahaq haq creó yi dêh tam hòm: “Waiq Chuaq Jêxu, Con Xau bùa Đawit, xìn xa-õch ca au ðìq!”

⁴⁰ Chuaq Jêxu hi yòng, thê wì 'ràng mangai ùh xau ta Haq. Jò mangai ùh xau trùh haten, Chuaq Jêxu bòch haq: ⁴¹ “Ìh enh Au broq am ca ìh biàc cleq?”

Haq xìn: “Waiq Chuaq, xìn am ca mat au jah hnoq?”

⁴² Chuaq Jêxu doi: “ 'Nghah hlài beq! Manoh lùì ìh khoi broq brêh ca ìh!” ⁴³ Tajòi 'mòi, mat haq jah hnoq. Haq lam tiaq Chuaq Jêxu, manè pôi Boc Plinh. ðìq ca wì mangai pajùm hnoq 'màng aih, wì manè pôi Boc Plinh.

19

Chuaq Jêxu Mùt Hnem Xachê

¹ Chuaq Jêxu lam pagat trong phòq Jê-ri-cô.
² Ta aih i mòiq ngai, hiniq haq Xachê, broq craq mangai gop thèq padrõng can ðìq jaq. ³ Haq enh ngan Chuaq Jêxu, mahaq ùh jah hnoq, ma jah 'màng aih i mangai bàc wa taiq haq mangai ðèq.
⁴ 'Màng aih Xachê cadàu adroi, heo long póc ðòiq jah hnoq ma ro, taiq Chuaq padon lam cwa trong aih.

⁵ Jò Chuaq Jêxu trùh ti nòi aih, Haq ngoi ngan hnoq Xachê. Haq doi: “Xachê, loh ma renh, ma

jah 'màng aih hì cô Au mùt hnem ih.” ⁶ Xachê tàng 'màng aih, drah loh renh, bùi manoh, ðìh yốc Chuaq Jêxu hlài dèh ta hnem haq.

⁷ Rìm ngai hnoq 'màng aih, wì bahech ca dabau: “Mangai cô mùt hnem mangai i tôiq.”

⁸ Khoi ca aih Xachê yòng enh ngìa Chuaq doi: “Waiq Chuaq, cô au yốc ha'ne cùng hang au, au am ca mangai pa. Tàng joq au i tacaq ca cabô, ùh kè biac cleq, au ðèn hlài pôn phàn.”

⁹ Chuaq Jêxu doi: “Hì cô biac dèch claih khoi mùt hnem cô. Ma jah 'màng aih mangai cô hadai con xau Ap-ra-ham. ¹⁰ Ma jah 'màng aih Con Mangai khoi trùh ðòiq chaq wa dèch wì mangai hù hnhung.”

*Bàu Aliah ca 'Bac
(Mat 25:14-30)*

¹¹ Jò Chuaq Jêxu ten trùh phòq Jê-ru-sa-lem, wì mangai pajùm xoh Diac Boc Plình ten mahno loh, 'màng aih jò wì tàng Haq hnài, Haq aliah tam xam mòiq bàu aliah 'màng cô: ¹² “I mòiq ngai con bùa lam diac 'noi q ðòiq padèch haq broq bùa. Khoi èh haq wìh hlài. ¹³ Haq creò dèh ca hapǒng 12, am ca wì 10 capiac 'bac. Hi khoi thê wì: ‘Yốc 'bac cô broq loh lòi trùh jò au hlài beq.’

¹⁴ “Mahaq jàn da haq ỏi ta aih git ca haq. Wì achìh thò thê mangai 'ràng ca con bùa atìq ca haq lam, doi: ‘Nhèn ùh waq ca haq broq bùa nhèn!’

¹⁵ “Jò haq khoi jah broq bùa, haq hlài, creò hapǒng ma khoi yốc 'bac trùh, ðòiq haq loq tang ngai khoi broq loh toq leq.

16 “Hapǒng adroi lam doi: ‘Waiq craq, capiac 'bac ìh ma am au, broq loh lòi 10 capiac.’

17 “Bùa manè haq doi: ‘Ìh hapǒng au ma broq lem dìq jaq, taiq ìh loq wèq dèh bàu ta biac 'yoh, au am ìh broq craq wèq 10 phôq.’

18 “Hapǒng ma baiq trùh doi: ‘Waiq craq, 'bac ìh ma am ca au, au khoi broq loh lòi padam capiac.’

19 “Bùa doi: ‘Ìh jah wèq cwìang padam phôq.’

20 “Mòiq hapǒng ma 'noi q lam trùh, doi: ‘Waiq craq, cô 'bac ìh ma am. Au khoi caxop ðòiq ta mù. 21 Ma jah 'màng aih au crè ca ìh, loq ìh mangai dìq jaq gang manoh, yǒc nòi ùh ðòiq, gat nòi ìh ùh i rai.’

22 “Bùa doi: ‘Ô hapǒng ma aroh tau! Au tiaq bàu ìh ðòiq hadrah hlài cla ìh. Ìh khoi loq au mangai dìq jaq gang manoh, yǒc enh nòi ùh ðòiq, gat nòi ùh i rai. 23 Gleq ìh ùh yǒc 'bac au aih, am ca hnem wèq 'bac? Jò au hlài au jah yǒc dèh bôn wa lòiq haq.’

24 “Bùa creo ca 'bài mangai ma yòng ti haq doi: ‘Yǒc 'bac haq am ca mangai ma khoi i 10 capiac 'bac beq.’

25 “Wì padreo bàu doi: ‘Bùa ôi, haq meh khoi i 10 capiac.’

26 “Bùa doi: ‘Au doi ca pì: Mangai leq khoi i, jah am tam ca haq. Mangai leq ma ùh i, yǒc hloi phàn wì haq ma khoi i. 27 Wì ma tajraq hlài ca au, ùh waq au broq bùa wì. 'Ràng wì ta cô, jêh đac enh ngĩa ca au.’ ”

Wì ðìh Yǒc Chuaq Jêxu Mùt Jê-ru-sa-lem

28 Khoi ca Chuaq Jêxu anoi biac aih, Haq lam enh ngia ca wì mangai bàc, tồc phôq Jê-ru-salem. 29 Jò Chuaq Jêxu lam ten trùh plài 'Bê-tpha-jê wa 'Bê-tha-ni ỏi ta wang Ôliu, Haq thê baiq ngai, mangai hỏc tiaq lam, tanap ca wa: 30 “Lam plài enh ngia ca chỏp 'mat beq. Jò mùt ta plài, hnoq mòiq toq lùa con wì cật ðoìq, 'nhòq lah i cabô còi. Dỏih caxi ðuì ahlài ca Au. 31 Tàng i cabô bòch: ‘Gleq ma ca'naih haq?’ Chỏp padreo bàu doi: ‘Chuaq nhet ca lùa cô.’”

32 Baiq ngai aih loh lam, glàm joq tìah ca bàu Chuaq Jêxu ma khoi doi. 33 'Nang ca'naih lùa con aih, cla mangai ma ban lùa, bòch wa: “Gleq chỏp ma ca'naih lùa con?”

34 Wa padreo bàu doi: “Chuaq nhet ca haq.”

35 Wa ðuì ahlài ca Chuaq Jêxu; yỏc ðeh eo hlèch enh cởng lùa con; ðèch Chuaq tồc enh 'nhèq. 36 Jò Chuaq Jêxu 'nang lam, i bàc ngai lèh ðeh eo hlèch ti trong.

37 Jò ten loh criang Ôliu, ðìq ðỏng mangai ma loq enh tiaq Haq, calêu manè bùi Boc Plình, taiq ðìq ca halac wì ma khoi hnoq.

38 Xam bàu ðeh wì doi: “Xỏq ramỏt am ca Bùa canòm hiniq Chuaq lam trùh!”✧

“Catèm ỏi ta plình 'ngah 'ngai ti nòi yi ha'nhèq ỏi ta plình.”

39 Jò aih i mòiq 'nah ngai Pha-ri-si ỏi ta mangai jàn bàc, doi ca Chuaq: “Thài ôi: Lech ca mangai hỏc tiaq Ìh beq!”

⁴⁰ Haq padreo bàu: “Au doi ca pì: Tàng wì haq hatenh, 'bài hmu xôq cachech manè apôi lem bùi!”

⁴¹ Jò Chuaq Jêxu ten trùh phôq, Haq ngan hnoq phôq Jê-ru-sa-lem. Haq hmoi ca mangai ta phôq aih, Haq doi: ⁴² “Au ngèh ca cla gè jah loq biac leq ma 'ràng trùh ca gè catèm! Mahaq biac aih khoi gahnàp, mat gè ùh jah hnoq. ⁴³ Cô èh jah trùh ca hì, wì ma git ca gè, broq lì, tagop dudan ca gè, hnen padit gè rìm pah, ⁴⁴ wa jah raliang đac gè, jêh đac đong 'bài con caiq gè. Wì pi òiđiq mòiq pliang hmu leq raxon enh 'nhèq ca dabau, ma jah 'màng aih taiq gè ùh canao loq ca jò Boc Plinh lam trùh ta gè.”

Chuaq Jêxu Hnan Đac Mangai Padre Loh Enh Hnem Cùh Waiq

(Mat 21:12-17; Mỗc 11:15-19; Jon 2:13-22)

⁴⁵ Chuaq Jêxu mùt Hnem Cùh Waiq, drùh hnan cađac 'bài mangai padre loh, ⁴⁶ lech ca wì. Haq doi: “Sech Hadròih i doi: ‘Hnem au cô, hnem waiq khàn’[☆]; mahaq pì broq haq wìa ‘còp atùng.’[☆] ”

⁴⁷ Rìm hì Chuaq hnài ta Hnem Cùh Waiq, mahaq 'bài pajàu càn, thài ranenh wa 'bài craq wèq jàn Yothaiq chaq trong jêh đac Haq. ⁴⁸ Mahaq wì ùh 'nì chaq trong leq, taiq bàc mangai jàn enh tamàng Haq hnài.

☆ **19:46** 19:46 Êsai 56:7. ☆ **19:46** 19:46 Jêr 7:11.

20

Wì Bòch Cwìang Itai Chuaq Jêxu (*Mat 21:23-27; Mõc 11:27-33*)

¹ I mòiq hì jò Chuaq Jêxu 'nang hnài wì ta Hnem Cùh Waiq wa anoi Bàu Lem, i 'bài pajàu càn, 'bài thài ranenh trùh pajùm ti 'bài craq broq gàu Hnem Cùh Waiq, ² bòch Haq 'màng cô: “Doi ca nhèn beq, Ìh yõc cwìang enh leq ma broq jah biac cô, loq mangai leq khoi am ca Ìh cwìang itai cô?”

³ Chuaq doi: “Au hadai bòch hlài pì mòiq nà. Doi ca Au loq beq. ⁴ Biac Jon 'Baptit broq 'baptem, trùh enh plình loq trùh enh mangai?”

⁵ 'Bài mangai aih hatình ca dabau: “Tàng bèn doi: Enh plình, èh Haq doi ca bèn: 'Màng aih, gleq pì ma ùh lùì bàu haq? ⁶ Tàng bèn doi: Enh mangai, èh dìq dõng ca wì tèm hmu bèn trùh cachit, ma jah 'màng aih wì khoi lùì Jon haq mangai capoch thai Boc Plình.”

⁷ 'Màng aih wì tèo: “Nhèn ùh 'nì biac aih trùh enh leq.”

⁸ Chuaq Jêxu doi: “Au hadai ùh doi ca pì loq, Au yõc cwìang enh leq ma broq biac cô.”

Bàu Aliah Mangai Pìt Nho (*Mat 21:33-46; Mõc 12:1-17*)

⁹ Chuaq Jêxu baxèm capoch bàu aliah ca mangai jàn: “I mòiq ngai pìt mòiq wùan nho. Haq am wùan nho aih ca mangai bèq caq axong, khoi èh cla haq lam hangai dùnh hì. ¹⁰ Trùh jò git plì, cla haq thê dèh hapõng lam ta wì ma wèq wùan bèq caq axong òiq yõc plì. Mahaq 'bài mangai ma wèq wùan bèq caq axong aih, tong

hapǒng aih, hnan haq hlài tì dech. ¹¹ Craq haq the mòiq ngai hapǒng ma 'noiç hòm; khi èh wì jêh, wì hanip hapǒng aih, hnan haq hlài tì dech hòm. ¹² Craq wùan nho aih the hapǒng ma piç trùh; khi èh, xôç wì jêh hapǒng aih loh habau, tèm haq loh enh gùng ca wùan.

¹³ “Cla craq wùan aih doi: ‘Cô èh 'màng leq? Au the dèh con calô au ma loç waç, lam, 'màng aih wì loç iu Haq!’

¹⁴ “Mahaq jò hnoç con calô aih trùh, wì tình ca dabau 'màng cô: ‘Cô con ramua haq; bèn jêh đac haq, èh cùng hang haq jah đong bèn.’ ¹⁵ Wì ma wèç wùan bèç axong tèm đac con aih enh gùng ca wùan nho, hi khi jêh cachit haq.

“'Màng aih craq wùan trùh, haq tình ca wì 'màng leq? ¹⁶ Craq wùan nho trùh jêh ðiç 'bài mangai ma wèç wùan bèç caç axong aih, yõç wùan nho am ca mangai 'noiç.”

Khi tàng bàu aih, wì doi: “Bìac cô ùh jò leq i 'màng aih!”

¹⁷ Chuaç Jêxu ngan jang ta wì haq, bòch: “'Màng aih Sech Hadròih ma achìh:

“'Hmu leq ma thòç broç hnem khi cađac.

Hmu aih jah wìa hmu gàu mùm hnem.’[✧]

Bàu aih enh doi cleq? ¹⁸ Cabô cro troç hmu aih hech loh bàc ha'nech, mahaq tàng hmu cô cìh troç bô, mangai aih hech loh ðac!”

¹⁹ Jò aih 'bài pajàu càn wa 'bài thài ranenh chaq trong jêh Haq, ma jah 'màng aih wì loç Haq khi capoch bàu alìah aih patô wì haq. Wì chaq trong jêh Haq, mahaq crè ca mangai jàn.

✧ 20:17 20:17 BCP 118:22.

Boc Plình wa Sêsa

²⁰ Wì ti ta'yoì ngan Haq, èh thê 'bài mangai ma ti rinh ngan patiah ca broq mangai ta-atoq. Wì ngèh ca Haq hlòp dèh xam bàu capoch, òiđiq jah rùp 'ràng Haq ca 'bài mangai ma wèq cwìang da tình trùang Rôma. ²¹ 'Bài mangai aih bòch Haq: “Thài ôi, nhèn loq Ìh mangai capoch hnài trong troq, ùh gen can pah leq, mahaq Ìh hnài biác Boc Plình troq joq 'nang. ²² 'Màng aih nhèn khòh am thèq ca Sêsa ùh?”

²³ Chuaq Jêxu khoi loq ca manoh 'mèq wì. Haq tèò bàu: ²⁴ “Am Au ngan mòiq capiac 'bac beq. Cô 'mù wa hiniq cabô?”

Wì tèò: “Sêsa”.

²⁵ Haq doi ca wì: “ 'Màng aih biác leq da Sêsa, am hlài da Sêsa, biác leq da Boc Plình, am da Boc Plình.”

²⁶ Wì ùh jah bahlac Haq ta bàu capoch da Haq enh ngìa ca mangai jàn, taiq wì òiđiq jaq hamàih ca bàu tèò da Haq, 'màng aih wì hatenh.

Biác Rìh Hlài

(Mat 22:23-33; Mốc 12:18-27)

²⁷ I toq 'biaq ngai Sa-đu-sê, wì mangai ma ùh lùì i biác rìh hlài. Wì trùh haten ca Chuaq Jêxu, bòch Haq: ²⁸ “Thài ôi, Mòise khoi achìh am ca nhèn ranenh cô: Tàng mangai i daq, daq haq yỏc mai hi khoi daq cachìt, ùh i ca con, haq khòh yỏc dèh mai daq òiđiq ta'mốt xinoi thai daq haq. ²⁹ Wì tapèh ngai oh daq. Mangai ma ramua yỏc mai, hi khoi cachìt, ùh tem i con. ³⁰ Mangai ma tìa, hi khoi mangai ma atìq, trùh mangai ma ùch, xỏq yỏc mai aih. ³¹ Wì tapèh ngai òiđiq 'màng aih. Òiđiq

cachit ùh i ca con. ³² Khoi èh gu cadrì aih hadai cachit. ³³ 'Màng aih, trùh jò rìh hlài, con cadrì aih broq mai bô? Ma jah 'màng aih dìq ca wì tapèh ngai aih khoi pajùm mòiq toq mai."

³⁴ Chuaq Jêxu tèo: "Con caiq da 'nhòng cô ma yõc õng yõc mai, ³⁵ mahaq 'bài mangai ma tajì ca jah hùang 'nhòng ma atiq, jò rìh hlài enh mangai cachit, wì pi yõc õng yõc mai hòm. ³⁶ Ma jah 'màng aih wì pi cachit hòm. Wì tìah ca 'bình plình wa broq con caiq Boc Plình, taiq wì khoi rìh hlài. ³⁷ Biac mangai cachit jah rìh hlài, Môise khoi am loq, jò haq hnoq ùnh cheo ta ramù hila, haq creo ca Chuaq: 'Boc Plình da Ap-ra-ham, Boc Plình da Isac, Boc Plình da Jacôp.'[☆] ³⁸ 'Màng aih Boc Plình ùh xài Boc Plình da 'bài mangai cachit, mahaq Boc Plình da mangai rìh, ma jah 'màng aih Boc Plình am dìq đồng ca con caiq Haq jah rìh hloi hloi."

³⁹ I 'nah ngai 'bài thài ranenh doi: "Thài ôi, Ìh doi dìq jaq troq." ⁴⁰ Khoi ca aih wì pi hùà bòch Haq bàu leq hòm.

*Chuaq Jêxu Crich Con Xau Đawit
(Mat 22:41-46; Mõc 12:35-40)*

⁴¹ Chuaq Jêxu bòch wì: "Hagleq wì ma doi Crich, Haq Con bùa Đawit? ⁴² Ma jah 'màng aih cla bùa Đawit khoi doi ta sech Calêu Plình doi: " 'Chuaq doi ca Chuaq au:

"Ha'ngui pah 'ma Au oq,

⁴³ Gòm trùh jò Au rùp mangai ma git ca Ìh, loh wìa long thòt enh 'neq ca jènh Ìh." [☆]

44 Taiq Đawit creo Haq, Chuaq, 'màng leq Haq jah broq Con haq?"

Bàu Trech 'Bài Thài Ranenh Yothaiq

45 Jò wì con jàn 'nang tamàng, Chuaq Jêxu doi ca wì mangai hõc tiaq: 46 "Wèq dađeh oq, apaq tiah ca 'bài thài ranenh. Wì haq loq enh caxùnh eo yôh ðoìq rahù, ti lam ba'yàt ta chòq, enh ca wì chao dađeh, enh ha'ngui nòì adroi ta hnem tagop, enh ha'ngui enh 'nhèq jò caq hiniang. 47 Wì yõc lõn apom xôxech wa hnem da mangai cadrì hadrô wa jò waiq khàn, wì atac 'mòì waq ca yôh. Boc Plình baxa wì haq yi bàc."

21

Gu Cadrì Hadrô Am 'Bac
(*Mõc 12:41-44*)

1 Jò òi ta hnem cùh waiq, Chuaq ngan hnoq 'bài mangai padrõng tah 'bac ta thùng 'bac. 2 Èh hadai hnoq mòìq ngai gu cadrì hadrô pa, tah baiq hliac 'bac. 3 Haq doi: "Jòq 'nàng Au doi ca pì: Gu cadrì hadrô nan tùng cô khoi dèch am yi bàc ca mangai 'noiç, 4 ma jah 'màng aih 'bài mangai 'noiç yõc rah wì ma am, mahaq gu cadrì hadrô nan pabôn h cô, khoi dèch am dõng 'bac haq ma ðoìq ban dađeh."

Chuaq Jêxu Doi Adroi Phôq Raliang
(*Mat 24:1-2; Mõc 13:1-2*)

5 Wì mangai hõc tiaq anoi trùh Hnem Cùh Waiq khoi jah padì xam hmu canaq 'bac, wa 'bài dahwèq wì khoi dèch am ca Boc Plình. Chuaq Jêxu doi: 6 "Dìq ca ngè pì khoi hnoq 'mat, jah i

hì 'bìq raliang, pi i mòiq toq hmu leq raxon enh 'nhèq ca mòiq toq hmu ma 'noiql”

7 Wì bòch Haq: “Thài ôi, jò leq bìac aih jah trùh, i ca teo cleq patò bìac aih khoi ten trùh ùh?”

8 Haq doi: “Wèq dađeh oq, èh yùq pì 'bìq lam trong lac tiaq bàu padô 'nùt. Bàc mangai patiah hiniq Au trùh, wì doi: ‘Au cô Mangai Dèch con mangai,’ èh doi: ‘Hì pulùch da crông taneh khoi ten trùh.’ Pì apaq tiaq wì. 9 Jò pì tàng bàu anoi bìac tabroq tajêh, pì apaq crè hrin, ma jah 'màng aih bìac aih phai trùh adroi, mahaq hì pulùch da crông taneh ùh trùh tajòi 'mòi jò aih.”

10 Èh Haq doi hòm ca wì: “Gùng cô tagit ca gùng tau. Diac tau tagit ca Diac tì, 11 èh i bìac taneh dalac càn, bìac pangot hrah, bàc nòi i bìac jìq blôh, bìac 'mèq ranàc càn, wa bìac halac càn òi ta plinh.

12 “Mahaq adroi ca bìac aih trùh, taiq hiniq Au, wì git 'bõn ca pì, jao pì ta hnem tagop, clêh pì, 'ràng pì enh ngìa ca bùa wa tinh truang. 13 Mahaq cô jò ta'nàih ðòiq pì anoi hlài ca wì loq ca Au. 14 'Màng aih pì phai hmàng ta manoh: Apaq lo hèm adroi phai hatèo 'màng leq, 15 ma jah 'màng aih Au am ca pì bàu capoch wa can khôn rabiaq ðòiq mangai ma enh ta'blêq ca pì, ùh nui ta'blêq wa ùh i trong ðòiq wech hlài pì trong bàu capoch. 16 Pì cô èh, 'bìq miq, baq, oh, daq, wa bua pì blòq pì. Òi ta pì i mòiq 'nah ngai wì jêh cachit. 17 Taiq hiniq Au, ðiq ca mangai ma jah git ca pì. 18 Mahaq mòiq hadrang xàc pì ta

gàu, xòq ùh cađac hnhung. ¹⁹ Nhò manoh chiùq àt, pì jah wèq dèh mahua yiang.

²⁰ “Jò leq pì hnoq lình wawenh ca phòq Jê-ru-sa-lem, jò aih raq hì phòq aih hi ten 'bìq raliang.

²¹ Jò aih mangai leq ma òi ta gùng Judia drah cadàu tóc ta wang. Cabô òi ta phòq phai loh enh gùng; cabô òi ta ðùng, apaq cadàu hlài ta phòq.

²² Hì aih, hì Boc Plình hadrah baxa, troq troi bàu khoi achìh ta Sech Hadròih. ²³ Ta 'bài hì aih èh, joq nan xa ðeh ca mangai ma òi jiang, wa mangai cadrì ban con òi ùq! Jò aih èh, i raliang ranác càn. Aih can nòih Boc Plình trùh ca wì jàn cô.

²⁴ 'Nah ngai cachìt ca chang gùm, 'nah ngai wì rùp 'ràng òi tù ta 'bài Diac 'noiç. Phòq Jê-ru-sa-lem èh 'bìq jàn 'noiç jôiç, trùh jò 'nhòng da mangai jàn 'noiç khoi gèh ca wèq cwiang.

²⁵ “Jò aih i teo patò can halac òi ta mahì, ta khê wa ta ðìq ca halõng. Òi ta crõng taneh rìm Diac loh ca manhài yùq crè. Diac raxìq loh ca lai laq rõng tagràng tagràt. ²⁶ Mangai jò aih hlat taiq yùq crè ðìq jaq. Crõng taneh wa ta plình loh ca tadroq dalác tagràng tagràt. ²⁷ Jò aih mangai rìm nòi jah hnoq Con Mangai lam trùh, òi ta'ne yùc plình bình halùih can 'ngah 'ngai wa cwiang itai ðòiq wèq cwiang. ²⁸ Jò leq biac aih baxèm trùh, pì yòng ma jang haq, wa ngoi ti 'nhèq. Ma jah 'màng aih, jò biac rõt hlài enh tòiç lôi da pì khoi haten.”

²⁹ Haq capoch bàu aliah ca wì: “Pì ngan long póc wa ðìq ca 'bài long 'noiç beq. ³⁰ Jò ðìq ca lóng loh hamõng chet, pì khoi loq, cô khoi ten trùh jò padrang. ³¹ Hadai 'màng aih, jò pì hnoq

bìac aih khoi loh, pì jah loq Diac Boc Plình khoi haten.

³² “Au doi ca pì bàu joq 'nàng: Xinoi da mangai rìh 'nhòng aih ùh cachit adroi ca bìac aih trùh.

³³ Plình crống taneh cô èh jah hnhung, mahaq bàu capoch da Au ùh jò leq hnhung.

³⁴ “ 'Màng aih pì phai wèq dađeh oq, èh yùq ca manoh pì loq cram ta bìac caq ôq, pagôq racaih, bù bia, bìac ep hèm lo ca caq cleq, ôq cleq, èh ùh tem hnoq hì aih trùh traiq ca pì tiah ca pì hlòp ralóc, ³⁵ ma jah 'màng aih hì aih hadai trùh ti dìq đống ca con mangai òi crống taneh. ³⁶ 'Màng aih pì ep hloi hloi hamang wa waiq khàn, òiđiq pì jah claih ca bìac ma padon trùh wa jah yòng enh ngia ca Con Mangai.”

³⁷ Dahì Chuaq Jêxu hnài ta Hnem Cùh Waiq. Trùh xèq, Haq hi tồc ta wang Ôliu. ³⁸ Xrõih xroq 'bài con jàn trùh ta Hnem Cùh Waiq òiđiq tamàng Haq hnài.

22

Thài Ranenh Chaq Trong Bahlac Chuaq

¹ Hì Lè 'Benh ùh Tah Blo khoi tenh trùh, aih hì Lè Lam Cwa. ² 'Bài pajàu càn wa 'bài thài ranenh Yothaiq chaq trong jêh đac Chuaq Jêxu, mahaq wì yùq ca mangai jàn. ³ Kiac Satan mùt òi enh dalam ca Juda Ich-ca-ri-ôt, aih mòiq ngai òi ta 12 ngai, mangai hõc tiaq da Chuaq. ⁴ Juda lam doi ca 'bài pajàu càn wa 'bài mangai wèq linh ma gõc Hnem Cùh Waiq, trong haq jah am Chuaq Jêxu ca wì. ⁵ Wì manè òiđiq jaq, wa mòiq manoh am ca Juda 'bac. ⁶ Juda rùp bàu chaq trong jò

ta'nàih jao am ca wì jah rùp Chuaq Jêxu jò ùh i ca mangai bàc.

⁷ Trùh hì Lè 'Benh Ùh Tah Blo, hì phai jêh trùu con broq Lè Lam Cwa, ⁸ Chuaq Jêxu thê Pêtrô wa Jon, tanap: “Chôp lam padon ca bèn nòi caq Lè Lam Cwa beq.”

⁹ Wa bòch: “Ìh enh ma lam padon ta leq?”

¹⁰ Haq tèo: “Jò chôp mùt ta phôq, hnoq mòiq ngai, mangai calô xùì cabi tùng diac, tiaq mangai aih trùh hnem leq haq mùt. ¹¹ Chôp doi ca craq hnem: “Thài nhèn doi ca ìh: Adùq leq nòi Au wa mangai hóc tiaq Au caq Lè Lam Cwa?” ¹² Craq hnem jah patô ca chôp mòiq adùq càn ôi ta làu òi q caq Lè Lam Cwa, wa dahwèq òi q padon ca caq lè khai tôm ta aih. Chôp padon ta aih beq.”

¹³ Wa baiq ngai, mangai hóc tiaq aih hi loh lam. Wa haq hnoq joq troq troi bàu Chuaq ma khai doi. Wa hi chôn h padon òi q broq Lè Lam Cwa.

Lè Caq Hiniang Hadròih

¹⁴ Trùh jò caq, wì mangai hóc tiaq hadai ha'ngui caq ti Haq. ¹⁵ Haq doi: “Au enh caq Lè Lam Cwa cô ti pì adroi ca Au chiùq jìq xa. ¹⁶ Ma jah 'màng aih Au doi ca pì: Au pì caq lè cô ti pì hò m trùh jò leq lè cô jah gêh ôi ta Diac Boc Plình.”

¹⁷ Chuaq dèch doi chrông, manè, hi khai, Haq doi: “Yóc cô, pì 'nèp ca dabau, ¹⁸ taiq Au doi hò m ca pì: Pàng cô ta èh, Au pì ôq diac nho hò m trùh jò leq Diac Boc Plình trùh.”

¹⁹ Khai èh, Chuaq Jêxu yóc 'benh manè apôi Boc Plình. Haq goh 'benh axong ca 'bài mangai

hốc tiaq rai doi: “Cô chac hamac Au khoi jah am ca pì. Phai broq 'màng cô òiđiq hmàng ca Au.”

²⁰ Caq gêh, Haq yốc doi chrõng am ca 'bài mangai hốc tiaq, rai doi: “Doi cô wêh jao ma neo ta mahem Au chiuq ta-ùc thai ca pì. ²¹ Mahaq ta cô raq, i mangai padon blòq Au, jao am Au ca mangai ma git ca Au. Haq 'nang òiđiq tì ta ca'bõng ti Au. ²² Con Mangai cachit tiaq bàu khoi pajaq òiđiq, mahaq nan xa am ca mangai leq ma blòq Haq.” ²³ 'Bài mangai hốc tiaq bòch dabau cabô ta wì haq ma broq biac aih.

Bìac Tarahen da Mangai Hốc Tiaq

²⁴ Wì hadai ta rahen ca dabau bìac ta wì haq ma leq ma broq yi càn. ²⁵ Mahaq Chuaq doi ca wì mangai hốc tiaq: “'Bài bùa da jàn 'noiđ yốc òh cwiang wèq jàn padip padiang, wa con jàn doi wì haq mangai broq lem.” ²⁶ Mahaq pì ùh xài 'màng aih. Da pì phai broq 'màng cô: Cabô broq yi càn, phai patih tiàh ca yi 'yoh. Cabô ma broq gàu, phai patih tiàh ca hapõng. ²⁷ Ma jah 'màng aih, mangai ha'ngui caq wa mangai patih, ma leq yi càn? Ma ùh xài mangai ma ha'ngui acaq 'mòh? Mahaq Au cô 'nang rìh òi ta'ne pì tiàh ca mangai patih. ²⁸ Pì mangai khoi cajap manoh tiaq Au ta jò 'bài mangai 'noiđ 'bàt thù ca Au. ²⁹ 'Màng aih Au jah am ca pì Diac Au, tiàh ca Baq Au khoi am ca Au, ³⁰ òiđiq pì jah caq ôq pajùm ca Au òi ta Diac Au. Pì jah ha'ngui ta gèq bùa òiđiq hadrah 10 bai xinoi Is-ra-ên.

Chuaq Jêxu Doi Adroi, Pêtrô Chôiđ Haq

³¹ Chuaq doi: “Simôn ôi, Simôn ôi, cô kiac Satan bòch ùm pì, tìah ca ùm 'mau mì. ³² Mahaq Au khoi waiq khàn ca ìh òiđiq manoh lùì da ìh ùh tadroq. 'Màng aih, trùh jò ìh khoi jah dèh hlài, thê ìh broq ca oh daq ìh jah cajap.”

³³ Pêtrô doi: “Chuaq ôi, 'nhac ca au òi tù, loq au cachit, xòq au tiaq Ìh.”

³⁴ Mahaq Chuaq Jêxu tèo: “Pêtrô ôi, Au doi ca ìh: Hì cô, jò ia 'nhòq rống, ìh khoi hangah piq yàng ùh 'nì ca Au.”

³⁵ Khoi èh, Chuaq Jêxu bòch wì: “Jò Au thê pì lam, pì ùh wê 'bac, 'bao, ùh i yep, mahaq pì hìaq thiùq cleq ùh?”

Mangai hỏc tiaq tèo: “Ùh thiùq cleq.”

³⁶ Haq doi hòm: “Mahaq manàiq, cabô i 'bac, wê beq. Cabô i 'bao hadai. Cabô ùh i ca chang gùm, tech eo, rỏt chang gùm beq. ³⁷ Ma jah 'màng aih, Au doi ca pì: Bàu Sech Hadròih cô jah xit ca Au: 'Haq 'bìq wì 'mùt pajùm ti mangai i tòi. ✧ Joq 'nàng bàu aih ma achih ca Au 'nàng jah xit.”

³⁸ 'Bài mangai hỏc tiaq doi ca Haq: “Waiq Chuaq, ta cô nhèn i baiq pla chang.”

Haq tèo: “ 'Màng aih khoi tàu.”

*Chuaq Jêxu Waiq Khàn ta Wang
(Mat 26:36–46; Mỏc 14:32–42)*

³⁹ Chuaq Jêxu tỏc ta wang Ôliu 'màng ca Haq ma loq lam dèh yôt. Wì mangai hỏc tiaq hadai lam ti Haq. ⁴⁰ Trùh nòi, Haq doi ca mangai hỏc tiaq: “Waiq khàn beq, òiđiq pì ùh hìaq mùt ta

✧ **22:37** 22:37 Êsai 53:12.

bìac padô 'nùt.” ⁴¹ Hi khoi, Haq lam ta kenh hangai ca wì bu mòiq atèm hmu, hacùn cràng, waiq khàn: ⁴² “Waiq Baq, tàng lem manoh Ìh, xìn Ìh yỏc doi chrỏng cô khoi ca Au, apaq tiaq manoh Au, mahaq tiaq manoh Baq.” ⁴³ I 'bình plình loh enh plình tam padren ca Haq. ⁴⁴ Haq mango dìq jaq, dìq ca padren waiq khàn lep hrìn, pa-ùh Haq catôh tìah ca mahem catôh ta taneh.

⁴⁵ Hêq ca waiq khàn, Haq yòng lam trùh ti 'bài mangai hỏc tiaq, hnoq wì cùi jàng taiq wì mango hlòm. ⁴⁶ Haq doi: “Gleq pì ma cùi? Waiq khàn beq ðòiq pì ùh hìaq mùt ta bìac padô 'nùt.”

⁴⁷ Jò Chuaq ỏi raq capoch, hnoq mòiq lù mangai trùh, Juda lam adroi 'nong wì; haq mangai ta 12 ngai, mangai hỏc tiaq. Juda thia haten hìp Chuaq Jêxu. ⁴⁸ Mahaq Chuaq Jêxu doi ca haq: “Juda ôi, ìh blòq Con Mangai xam nà hìp 'mòh?”

⁴⁹ Mangai hỏc tiaq ma ỏi ti Haq hnoq bìac 'màng aih, wì doi: “Nhèn khỏh đỏih chang ùh?”

⁵⁰ Ta wì mangai hỏc tiaq i mòiq ngai yỏc chang pỏt catech ca don pah 'ma linh da pajàu ha'nhèq.

⁵¹ Mahaq Chuaq Jêxu doi: “Hêq, paq jêh hòm.” Hi khoi, Haq yỏc tì bèq don hapỏng aih; don haq hi jah brêh hlài.

⁵² Khoi ca aih, Chuaq Jêxu doi ca wì pajàu càn, 'bài mangai ma wèq linh gỏc Hnem Cùh Waiq, wa craq broq gàu Hnem Cùh Waiq: “Gleq pì ma wê chang, wê long dùi, lam rùp Au, tìah ca trùh rùp mangai atùng 'màng cô? ⁵³ Rìm hì Au ỏi ti pì ta Hnem Cùh Waiq, gleq pì ùh rùp Au? Mahaq

jò cô, aih jò da pì, taiq cwàng Diac clam cluiq
khoi am ca pì broq 'màng cô."

Bìac Pêtrô Chôiq Chuaq Jêxu

(*Mat 26:57-58,69-75; Mốc 14:53-54,66-72; Jon 18:12-18,25-27*)

⁵⁴ Khoi ca rùp Chuaq Jêxu, wì 'nong Haq lam, 'ràng Haq ta hnem pajàu ha'nhèq. Pêtrô ta'yoì tiaq enh cloh. ⁵⁵ Jò aih i wì baxù ùnh ta'ne xàn hnem. Wì haq ha'ngui 'nhìa ùnh ti dabau. ⁵⁶ I mòiq ngai hapông cadri hnoq Pêtrô ha'ngui 'nhìa ùnh, ngan Pêtrô rai doi: "Mangai cô hadai òi ti Haq aih!"

⁵⁷ Mahaq Pêtrô hangah doi: "Ê daq, au ùh 'nì ca Mangai aih."

⁵⁸ Mòiq rahyàc hòm i mòiq ngai hnoq Pêtrô, haq doi: "Ìh hadai pajùm ca Haq."

Pêtrô doi: "Daq ôi, au ùh xài!"

⁵⁹ Mòiq jò òùng hô atiq ca aih hòm, i mòiq ngai doi: "Hi loq, mangai cô hadai òi ti Chuaq Jêxu, ma jah 'màng aih haq hadai mangai Ga-li-lé."

⁶⁰ Pêtrô ta rahen ca wì: "Daq ôi, au ùh 'nì tàng ìh doi cleq!" Pêtrô òi raq capoch, tajòì 'mòì ia rông hloi jò aih. ⁶¹ Chuaq Jêxu wìh ngan Pêtrô. Haq hmàng hlài bàu Chuaq Jêxu khoi doi adroi ca haq: "Mang cô, adroi ca ia rông, ìh hangah ùh loq ca Au piq yàng." ⁶² Pêtrô drah cadàu loh enh gùng, hmoi ua-ac.

Chuaq Jêxu Chìuq Jìq Xa

(*Mat 26:67-68; Mốc 14:65*)

⁶³ Jò aih 'bài mangai ma rùp Chuaq, wì capoch halê Haq wa jêh Haq. ⁶⁴ Wì yóc hadret càt mat

Haq, bòch halê Haq. Wì doi: “Capoch bàu loq adroi beq, doi thù cabô ma jêh ìh!” ⁶⁵ Wì yôc bàc bàu 'noiç lê Haq, capoch 'mèç hlòm ca Haq.

⁶⁶ Trùh xroìh xroç, 'bài craç broç gàu ta jàn, 'bài pajàu càn wa 'bài thài ranenh Yothaiç, tagop pajùm mòiq nòi. Wì thê 'ràng Chuaq Jêxu trùh enh ngìa 'bài craç hadrah enh 'nhèç. ⁶⁷ Wì bòch Haq: “Tàng joç Ìh Crich, doi ca nhèn loq beq!”

Chuaq tèo wì haq: “Tàng Au doi, pì ùh lùì. ⁶⁸ Tàng Au bòch, pì ùh tèo. ⁶⁹ Mahaq pàng cô ta èh, Con Mangai padon ha'ngui pah 'ma Boc Plình i cwàng itai.”

⁷⁰ Dìç ca wì bòch: “ 'Màng aih, Ìh i joç Con Boc Plình ùh?”

Haq tèo: “Jòç troi pì ma doi aih raç!”

⁷¹ Wì doi ca dabau: “Bèn pì nhet ca i mangai anoi hlài ca bèn hòm, ma jah 'màng don bèn khoi tàng bàu cla Haq doi.”

23

Chuaq Jêxu Enh Ngìa Philat wa Hêrôt

(Mat 27:1-2,11-26; Mồc 15:1-15; Jon 18:28—19:16)

¹ Khoi èh dìç ca wì ma pajùm yòng, 'ràng Haq ta hnem Philat, tình truang Rôma. ² Wì baxèm capoch bàu kìa Haq, wì doi: “Nhèn hnoç Haq parông jàn broç manhài ùh thê am thèç ca Sêsa, èh Haq doi dađeh Crich, Haq bùa.”

³ Philat bòch Haq: “Ìh Bùa Mangai Yothaiç joç ùh?”

Chuaq Jêxu tèo: “ 'Màng ca bàu ìh khoi doi.”

⁴ Philat doi ca pajàu càn wa mangai pajùm: “Au hnoq Mangai cô ùh i ca tôiq cleq.”

⁵ Mahaq xôq wì cachian: “Mangai cô baxrùq con jàn, anoi biac Diac Plình jàp jìa ta Judìa, baxèm enh Ga-li-lê tồc trùh ta cô.”

⁶ Tàng bàu aih, Philat bòch: “Mangai cô òi Ga-li-lê 'mòh?” ⁷ Loq ca Haq jàn ta nòi bùa Hêrôt ma wèq cwìang, Philat thê wì 'ràng Chuaq Jêxu ca bùa Hêrôt, ma jah 'màng aih, ta 'bài hì aih bùa Hêrôt hadai òi ta Jê-ru-sa-lem.

⁸ Bùa Hêrôt hnoq Chuaq Jêxu, haq bùi dìq jaq, ma jah 'màng aih khoi dùnh, bùa ngèh enh glàm Haq. Bùa khoi tàng anoi yôt biac Haq, èh enh ngan thù Haq broq biac halac. ⁹ Hì khoi bùa bòch Haq bacc, mahaq Haq ùh tèo. ¹⁰ 'Bài pajàu càn wa thài ranenh yòng ta aih, kian Haq dìq jaq. ¹¹ Bùa Hêrôt wa 'bài hapông bù halê Chuaq Jêxu, capoch 'mèq ca Haq dìq jaq wa wì caxùnh ca Haq eo lem lình da bùa, hì khoi ahlài Haq ta Philat. ¹² Adroi ca aih, Hêrôt wa Philat git ca dabau. Pàng hì aih, wa haq loh ca hatroq.

¹³ Philat creò dìq ca 'bài pajàu càn, 'bài cwan hadrah, wa 'bài jàn pajùm mòiq nòi. Haq doi: ¹⁴ “Mangai 'mat pì khoi 'ràng ca au, taiq biac Haq broq jàn loh ca manhài, mahaq enh ngìa ca pì, au khoi bòch Haq biac aih. Au ùh hnoq Mangai cô i tôiq cleq troi pì ma kian Haq. ¹⁵ Bùa Hêrôt xôq hnoq 'màng aih, èh haq ma jah xôq ahlài hòm ca au. Tàng 'màng aih, Haq ùh broq cleq ma đàng ca cachit. ¹⁶ 'Màng aih au blai Haq, hì khoi ca'naih Haq lam.”

¹⁷ Rìm yàng i Lè Lam Cwa, Philat ca'naih mòiq ngai tù jao am ca jàn.

¹⁸ Dìq ca wì cachech bàu dêh doi: “Jêh đac Mangai cô beq! Ca'naih ca nhèn 'Ba-ra-ba!”

¹⁹ 'Ba-ra-ba ỏi tù taiq haq broq manhài ta jàn, wa jêh đac mangai.

²⁰ Philat i manoh enh ca'naih Chuaq Jêxu, dài haq doi hòm ca mangai jàn, ²¹ mahaq wì cachech bàu dêh: “Tiang đình Haq ta long pagat beq! Tiang đình Haq ta long pagat beq!”

²² Philat doi hòm ca wì yàng piq: “Mahaq mangai cô khoi broq bìac dù cleq? Au hnoq Mangai cô ùh i broq bìac cleq ma đàng ca cachìt. 'Màng cô, khoi ca blai, au ca'naih Haq.”

²³ Mahaq wì xôq cachech wenh denh, thê phai tiang đình Haq ta long pagat. Bàu cachech đã wì jah 'blêq. ²⁴ Philat hi tiaq bàu wì, thê broq troi wì ma khoi bòch. ²⁵ Haq hi ca'naih mangai tù, wì ma xìn thê haq ca'naih aih, mangai ma broq manhài tablah wa jêh đac mangai; hi khoi am Chuaq Jêxu ca wì haq tiaq manoh wì ma enh.

Chuaq Jêxu Chiuq Wì Tiang Đình Haq ta Long Pagat

(Mat 27:32-56; Mốc 15:21-41; Jon 19:17-30)

²⁶ Jò wì 'nong Chuaq Jêxu lam, hnoq mòiq ngai mangai Siren, hiniq haq Simôn, 'nang hlài enh plài 'noiq lam pagat trong aih. Wì rùp haq xùi long pagat lam atiq ca Chuaq Jêxu. ²⁷ 'Bài mangai bàc lam tiaq Haq wa 'bài mangai cadrì crò hmoi ca Haq. ²⁸ Mahaq Chuaq Jêxu wìh hlài doi ca wì haq: “Ô 'bài con cadrì Jê-ru-sa-lem, apaq hmoi ca Au, mahaq hmoi ca cla pì wa ca con caiq pì

beq! 29 Ma jah 'màng aih, jah i hì pì doi: 'Xôq ramõt ca 'bài mangai cadri xon, mangai ùh i ca con, wa tôh ma ùh i ca con ùq!'

30 " 'Cô èh wì doi ca wang: "Ta-ùc enh 'nhèq ca nhèn beq!"

Doi ca 'bài go: "Gùp nhèn beq!" '☆

31 Ma jah 'màng aih tàng wì broq 'màng cô ca long rih, long croh èh 'màng leq?"

32 Wì hadai 'ràng mangai atùng baiq ngai òoiq jêh đac pajùm ti Haq. 33 Lam trùh mòi q nòi wì creo Cadôh, wì tiang đình Chuaq Jêxu ta long pagat ti wa baiq ngai, mangai atùng, mòi q ngai pah 'ma, mòi q ngai pah 'ngeo. 34 Chuaq Jêxu waiq khàn: "Ba q ôi, xìn baxông tôiq ca wì, taiq wì ùh 'nì dađeh 'nang broq cleq!" Èh wì pàih panaih ma leq jah eo Haq.

35 'Bài mangai pajùm yòng ha'miang ngan, mahaq 'bài mangai wèq cwiang Yothaiq hanip do ca Haq, doi: "Haq khai dèch mangai 'noi q; tàng Haq Crich ma Boc Plình khai ràih, òoiq Haq dõih dađeh beq!"

36 'Bài lình hadai halê Haq, trùh haten yõc diac jòq am Haq ôq, 37 hi doi: "Tàng joq ìh Bùa mangai Yothaiq, ca'naih dađeh beq!"

38 Enh 'nhèq ca gàu Haq, i chù ta capiac long ban achìh: Mangai Cô Bùa Jàn Yothaiq.

39 Mòi q ngai òi ta baiq ngai, mangai ma atùng, 'nang chiuq atua ta long pagat, hadai hanip Haq doi: "Ìh ùh xài Crich 'mòh? Dèch dađeh beq, hi dèch ma òiq!"

☆ 23:30 23:30 Ôsê 10:8.

⁴⁰ Mangai ma tau lech ca haq, doi: “Ìh hadai 'bìq baxa 'màng 'mat, hagleq ma ùh yùq ca Boc Plinh? ⁴¹ Phàn da ba cô 'bìq hadrah baxa 'màng cô joq khoi ta-atoq. Biac xa ba ma chiùq khoi đàng ca biac ngang dù ba ma broq, mahaq Mangai cô ùh lah broq tôiq cleq.”

⁴² Khoi ca aih, haq doi ca Chuaq Jêxu: “Chuaq ôi, jò ìh hlài Diac Plinh, xin hmàng trùh ca au dìq!”

⁴³ Chuaq Jêxu tèo: “Au doi ca ìh: Hì cô ìh jah ôi ti Au ta nòi 'Ba-ra-đi.”

⁴⁴ Jò aih, 12 jò, dìq ca gùng aih clam đổng trùh piq jò chiù. ⁴⁵ Plinh loh ca clam clôiq. Bai prình ta Hnem Cùh Waiq loh ca dahich trong 'ne loh baiq apah. ⁴⁶ Chuaq Jêxu creò bàu dèh doi: “Baq ôi, Con jao đeh mahua ta tì ìh!”[☆] Capoch bu hêq, Haq pat hihèm.

⁴⁷ Đôiq trùang hnoq biac aih, haq manè pôi Boc Plinh, doi: “Jòq 'nàng Haq cô Mangai ta-atoq.” ⁴⁸ Khoi ca aih, dìq ca wì thia ngan hnoq biac 'màng aih, rai tep dèh rada rai hlài dèh ta hnem. ⁴⁹ Mahaq 'bài mangai ma canao ca Haq wa 'bài mangai cadrì ma khoi tiaq Haq enh gùng Ga-li-lê, yòng enh hangai ngan biac aih.

Biac Catùh Chuaq

(Mat 27:57-61; Mốc 15:42-47; Jon 19:38-42)

⁵⁰ I mòiq ngai, hiniq haq Jôsep, ôi phôq A-ri-ma-thê, gùng Judia, broq cwan hadrah ca mangai Yothaiq. Aih mangai lem manoh wa ta-atoq, 'nang nghè gòm ca Diac Boc Plinh. ⁵¹ Haq ùh mòiq manoh broq tiaq wì ma broq biac aih.

[☆] 23:46 23:46 BCP 31:5.

⁵² Haq lam trùh ta Philat, bòch hanang Chuaq Jêxu, ⁵³ 'noh hanang Haq khi ca long pagat, yôc bai habùac xom, hi lam 'mùt ta nòi trom ralùng wì khi pùng ðòiq ta hmu. Ralùng aih 'nhòq lah tah cabô. ⁵⁴ Hì cô khi padon Lè Lam Cwa ten trùh hì Sabat.

⁵⁵ 'Bàì mangai cadrì khi lam ti Chuaq Jêxu enh gùng Ga-li-lê hadai tiaq Jôsep lam ngan hanang Haq wì ðòiq 'màng leq, khi èh hlài padon dahwèq xua thùm. ⁵⁶ Trùh hì Sabat, wì padài tiaq bàù thê mangai Yothaiq.

24

Chuaq Jêxu Rìh Hlài

(Mat 28:1-10; Mòc 16:1-8; Jon 20:1-10)

¹ Hì gàu tùang lè, bu 'ngah, 'bài con cadrì aih yôc dahwèq xua thùm wì ma khi padon ðòiq 'ràng ta ralùng Chuaq. ² Hnoq hmu khi cadro òi pah kenh ca 'mang ralùng, ³ wì mùt, mahaq pì hnoq hanang Chuaq Jêxu. ⁴ Wì 'nang hèm 'nì 'màng leq cô. Wop jò aih, wì hnoq baiq ngai con calô i eo ca'bla yòng enh ngia ca wì haq. ⁵ Wì yùq crè cadrat, cùp gàu ta taneh. Mahaq wa bòch wì: "Hagleq pì ma chaq Mangai 'nang rìh ta nòi mangai cachit? ⁶ Haq pì òi ta cô. Haq khi rìh hlài. Pì phai hmàng jò òi ta Ga-li-lê, Haq doi ca pì 'màng leq. ⁷ Haq khi doi: 'Con Mangai phai 'mùt ta tì wì mangai i tôiq, chiùq wì tiang ðình Haq ta long pagat, trùh hì piq, Haq rìh hlài.'" ⁸ Wì hmàng hlài bàù Chuaq Jêxu khi doi nèh.

⁹ Wì drah hlài anoi ca 11 ngai sùq ðô wa 'bài mangai ma 'noi. ¹⁰ Ta wì gù cadrì aih, i Mari

Ma-dò-len, Jô-an-na, wa Mari miq Jacò, xam 'bài gu cadrì 'noiç lam ti wì, khoi wiang anoi biac aih ca 'bài sùç đò. ¹¹ Mahaq 'bài sùç đò ùh lùì. Wì doi: Bàu aih bàu liç làn. ¹² Mahaq Pêtrô yòng cadàu lam ngan ralùng. Haq ki ngan hnoç toq bai habùac xom òi jang aih. Khoi ca aih haq hlài ta hnem rai hamàih ta manoh ca biac khoi loh.

Ta Trong Em-ma-ut

(Môc 16:12-18; Mat 28:16-20; Jon 20:19-23; BYH 1:6-8)

¹³ Hì aih raq, i baiç ngai, mangai hõc tiaç lam ta trong trùh plài Em-ma-ut, enh Jê-ru-sa-lem trùh ta aih 12 kê sôç. ¹⁴ Wa hatùang ca dabau dìç ca biac ma khoi loh. ¹⁵ Wa 'nang hatình ca dabau, èh Chuaç Jêxu thia haten ca wa haq, hadai lam mòiq trong ca wa. ¹⁶ Mahaq Chuaç broç ca mat wa haq ùh canao ca Haq.

¹⁷ Chuaç bòch wa: “Jò chòp ma lam ti trong, chòp 'nang anoi ca dabau biac cleç?”

Wa yòng, i hadrò mango dìç jaç. ¹⁸ Ta wa baiç ngai, i mòiq ngai hiniç haq Clê-ô-pa, tèo Haq: “Jòç toç ìh raq mangai òi enh hangai trùh Jê-ru-sa-lem, ma ùh 'nì ca biac neo loh baiç piç hì cô 'mòh?”

¹⁹ Chuaç bòch hòm: “Biac cleç aih?”

Wa tèo: “Aih biac ma trùh ca Chuaç Jêxu Mangai Na-xa-ret. Haq Mangai Capoch Thai Boc Plình, i cwìang itai enh bàu capoch trùh biac broç, enh ngìa ca Boc Plình wa enh ngìa dìç ca mangai jàn. ²⁰ Ùh 'nì hagleç 'bài pajàu càn wa 'bài craç hadrah Yothaiç ma rùp Haq tiang òi nhing Haq ta long pagat. ²¹ Nhèn ngèh enh Haq jah

dèch claih 'bài mangai Is-ra-ên. Biac cô trùh khoi piq hì cô. ²² Mahaq 'bài mangai cadrì òi ti nhèn anoi hlài, broq ca nhèn hamàih dìq jaq. Jò xrõih xroq wì lam ngan ralùng, ²³ ùh hnoq hanang Haq. Wì haq hlài doi ca nhèn: I 'bình plình mahno loh doi: Haq khoi rìh hlài. ²⁴ Khoi ca aih, ta nhèn hadai i toq 'biaq ngai lam ta ralùng, hnoq rìm biac tìah ca wì mangai cadrì khoi doi, mahaq ùh hnoq Haq.”

²⁵ Chuaq Jêxu doi: “Ô chòp ma awàt ma ùh lùì bàu 'bài mangai capoch thai Boc Plình khoi anoi! ²⁶ Ma ùh joq Crich phai chiuq nan xa 'màng aih, men jah mùt ta biac 'ngah 'ngai lem Haq 'mòh?” ²⁷ Khoi èh, Haq baxèm enh Môise, trùh 'bài mangai capoch thai Boc Plình, capoch patô ca wa bàu ma anoi Haq òi ta Sech Hadròih.

²⁸ Jò wa lam ten trùh plài Em-ma-ut, wa hnoq tìah ca Haq enh lam yì hangai. ²⁹ Mahaq wa padràng Haq, doi: “Xìn ìh mùt òi òò ti ma, ma jah 'màng aih plình khoi xèq.” 'Màng aih Haq hi mùt ta hnem òi òò ti wa xèq aih.

³⁰ Jò 'nang ha'ngui acaq ti wa, Haq yõc 'benh manè Boc Plình, hi khoi goh 'benh am ca wa. ³¹ Jò aih mat wa tapèh. Tajòì 'mòi wa canao ca Chuaq. Wop jò aih raq Haq hnhung hnhaiq. ³² Wa doi ca dabau: “Jò lam ti trong ìq, Haq capoch tùang ca ba, èh khoi anoi paro Sech Hadròih ca ba, tàng manoh ba tôq, tìah ca ùnh cheo joq ùh?”

³³ Tajòì 'mòi wa padinh yòng drah hlài Jê-ru-sa-lem, hnoq wì 11 ngai sùq đò 'nang ha'ngui pajùm ti 'bài mangai 'noiq. ³⁴ Wì doi ca wa: “Jòq Chuaq khoi rìh hlài! Haq mahno ca Simôn.”

³⁵ Èh wa aih hadai anoi hlài biac wa ma glàm ti trong jò wa lam, wa 'màng leq wa haq jah canao Chuaq jò Haq goh 'benh.

Chuaq Jêxu Mahno dađeh ca Wì Sùq Đô

³⁶ Mangai hỏc tiaq 'nang capoch ca dabau biac aih, cla Chuaq Jêxu yòng ta'ne wì haq. Chuaq doi: “Catèm am ca pì!”

³⁷ 'Bài mangai hỏc tiaq crè yùq òi q jaq, ma jah 'màng aih, wì xoh wì khoi hnoq kiac cachỏc.

³⁸ Mahaq Chuaq doi: “Gleq pì ma yùq crè? Hagleq pì i manoh ra'ngòt 'màng aih? ³⁹ Ngan jèn h, tì, Au cô beq, joq 'nàng Au! Pì bèq beq, ngan beq! Kiac cachỏc ùh i ca akia, ùh i ca xech, ùh i ca caxèn h, mahaq Au i!”

⁴⁰ Rai capoch 'màng aih, Haq rai dèch jèn h tì am ca wì ngan. ⁴¹ Mahaq wì xôq 'nhòq lù i taiq wì haq rai lem bù i, rai hamài h. Chuaq bòch: “Ta cô pì i cleq caq ùh?” ⁴² Mangai hỏc tiaq am ca Haq mòi q ha'nech ca croh. ⁴³ Haq yỏc caq hloi enh ngìa ca wì.

⁴⁴ Hi khoi Haq doi: “Cô biac Au khoi doi ca pì jò Au ma ỏ i ti pì: Aih rìm biac ma khoi achì h anoi Au ta sech Ranenh Môise, ta sech 'bài mangai capoch thai Boc Plình, wa ta sech Calêu Plình, phai jah xit joq 'nàng.”

⁴⁵ Jò aih Haq pèh manoh wì, waq ca wì jah loq ca Sech Hadròih. ⁴⁶ Haq doi: “Sech Hadròih khoi achì h: Crich phai chiùq jì q xa 'màng aih. Trù h hì piq, Haq jah rì h hlài enh mangai cachì t. ⁴⁷ Phai canòm ca hiniq Haq òi q lam anoi hlài ca rìm Diac, cađac dèh manoh broq tô i q, òi q jah baxỏng tô i q, baxèm enh Jê-ru-sa-lem. ⁴⁸ Pì

mangai ðòiq anoi hlài rìm bìac aih. ⁴⁹ Èh Au jah am ca pì bìac Baq Au ma khoi hùaq. Phàn pì, pì òi gòm ta phòq trùh jò pì jah nhàn yóc cwiang itai enh 'nhèq."

Chuaq Tõc ta Plình

(Mõc 16:19-20; BYH 1:9-11)

⁵⁰ Khoi ca aih, Chuaq 'nong wì mangai hõc tiaq lam trùh plài 'Bê-tha-ni. Haq dèch tì Haq, am xôq ramõt ca wì. ⁵¹ 'Nang jò am xôq ramõt, Haq loh khoi ca wì hi jah dèch tõi ta plình. ⁵² Mangai hõc tiaq cùh waiq Haq, hi khoi hlài phòq Jê-ru-sa-lem, rai manè, lem bùi ðìq jaq. ⁵³ Wì haq hloi hloi òi ta Hnem Cùh Waiq, manè apôi Boc Plình.

cix

Sech Hadròih
Sech Hadròih

copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

e5023a07-9831-5256-a315-1cae0f33043d